

民國叢書

第四編

96



民國叢書

第四編

· 96 ·

綜合類

約園雜著續編

約園雜著三編

張壽鏞著

張壽鏞著

上海書店

張壽鏞著

約園雜著三編

序

余執友約園張君早歲侍尊人肖菴先生京邸先生授以經史並宋五子書根柢深厚壯而施於政數歷南北焯焯著聲續顧君之素願在藏富於民槃根錯節不能盡行其志也退居海上立光華大學躬領講席綜諸經及子史大義勲勲教學子遭世多故遵時養晦亦不能盡如其願廣搜鄉先賢著述手校付刻多至一百六十種諸書必有序跋發揮要指言無不盡既乃彙錄別行兼及所作詩文題曰雜著君之言曰以詞求吾文則詞未修以法繩吾文則法未守獨理之所在則不敢輕意掉焉余謂如君言非卽所謂因文載道者歟既得爲文之本詞與法安有不從者頃君諸子復錄君近所作都八卷次爲三編君旣富藏書尤好搜羅未刻稿本同郡人述作復彙爲四明叢書八集他種亦皆爲序跋詳舉其概要並其撰述緣起君之言曰吾文不足存存其書存其事庶幾吾文亦存余則以爲其書其事正賴君文以傳相得益彰則有之矣君何言之謙也君博採旁搜不遺小善史館同事姚君仲實嘗爲惜抱軒詩作注史成館撤散處鄉里仲實以其書屬其友趙君攜以致余臨發舉冬至飲吳白華齋中詩注有闕誤口授趙君改正余感其意深摯因讀之終卷凡其中闕誤余所見及者悉爲補正將以寄仲實商榷更定初不欲以自名也今仲實已旅沒桂林君見之乃採入君書卽此一端君書之詳博確實可知矣初編刻成君正六十君諸子縷述庭聞以書其後今年君七十而三編適成余乃爲之序以爲視世俗祝延介壽之文當復稍勝君方感疾余文誠不逮古倚枕讀之當自快著作等身陽氣滿大宅也乙酉四月甌山愚弟金兆蕃拜序



自序

天錫我老而老我以文豈偶然哉以文娛老不過自娛而已數十年來不敢以文自娛然借我之文以傳人之事而其事傳而我之文工拙則不必計焉且古人所謂識大識小者莫不有文武之道道固無分大小也守泰然之天君以窺自然之道妙就就者此耳如余年六十編集約園雜著越五年又輯續編今由續編更爲三編余文多不足存然古人之事則或藉此以存抑余以讀書人而號藏書家者所得皆中駟耳人曰倭宋我曰避宋購一宋而非宋者百部千部甚或萬部去矣獨可誇者鈔本耳歷年之所著都二百餘種有批校本焉有精鈔本焉有稿本焉有普通寫本焉余既幸而得此若不爲之闡揚幽渺苟一零落後人安知更有此書存者乎余積年本有題誌此五年中講學餘閒汲汲焉更爲補綴所以爲此者聊誌其書之淵源然世之君子讀我題跋腐朽發光得所所見或因喜其跋而追求其書共相鈔錄或擇其善者思雕印以廣其傳則世必不譏余爲優藏目余爲獻珍炫而諒余印斯編之意亦所以述其業傳其書也憶丁丑之冬避難僻地編輯書目以刊本刻歲爲次開編目之創例卽元明刊本編年書目是也余以讀書人而號讀書人之藏書者今又忽爲好古家之藏書人矣此則又可笑者也若夫鄉書之輯十已得八天其許我繼續爲之乎余喜咏元次山詩不識天地心徒然怨風雨夫天地自有位置我者我將覘諸它日以靜聽天地之位置而笑怨者之不達也乙酉冬約園



今歲仲夏 家君七秩覽揆光華大學諸校友議爲稱觴祝嘏 家君一再辭謝固請不獲
嘗語諸校友曰 家君自乙丑始辦光華退政以來益致力於斯其平生抱負厥惟陶毓人才與
保存文獻二事光華創立歷二十載今雖校舍片瓦無存而 家君誘掖學子之心曾不稍懈歷
年講稿已校印者有史學大綱與諸子大綱二書經學文學之部尙待整理至桑梓文獻則事變
以還猶獨力續刊四明叢書至第七集其第八集雖未歲事稿目亦已粗定邇來更將海內罕覩
之批校本稿本精鈔本一一爲之題跋並命之排比已成之善本書目以待付梓俾世之關懷
文獻者得稽覽焉諸校友聞之乃議集羣力刊行是編欲於 家君古稀華誕之日紀念廿載辦
學之勞於是再請於 家君 家君莞爾許之於是諸校友彙集責諸薛君迪符其及之者有喬
進安俞傳鼎先生而以倪君一鳴擔任校對書成爰誌數語用表謝忱乙酉五月男之謹識

約園雜著二編目錄

卷一 藏書題跋一 批校本

經部 小學書 明嘉靖本三禮 弘治本五經白文 誠齋易傳 周易集註 雍正仿宋監

本書經 刊謬正俗 篆法偏旁點畫辨 釋篆法辨

史部 劉今度批校史記 翁元圻批校史記 全祖望刪定晉書 手校宋南宮靖一小

學史斷 張挺批函史 絳雲樓書目 拜經樓題跋 曝書雜記

子部 潘爵批南華真經副墨 舊校春秋繁露 先給諫批校困學紀聞 夏文燾爲黃

蕘圃校閻注困學紀聞 黃蕘圃批校蘆浦筆記 黃蕘圃校灑水燕談錄 黃蕘圃校

宋姚寬西溪叢語 譚復堂獻手校意林 阮元集幕友何元錫等校太平御覽

集部 屠赤水隆評點徐孝穆集 顧東巖手錄汪堯峰王西樵王漁洋批點杜詩偶評

無名氏批杜律虞注 翁叔平同蘇手錄五色評韓昌黎詩注 依宋本校樓攻媿集

孫玉仙師鐫手校剡源集 潘次耕未批點青邱詩集 張讓三丈美翊手校張蒼水公

全集 先給諫校註彭湘涵兆蓀小謨觴館文集 楊秋室鳳苞批校鮎埼亭札記 陳

仲魚鱣手批唐詩英華 吳穀人錫麒批點唐詩鼓吹 李春湖手批二馮評點才調集

西崑酬唱集 唐宋金元明歷代著題詩鈔 李尊客慈銘手批越風 先給諫校註李

兆洛駢體文鈔 金錢孫兆蕃校注惜抱軒詩集訓纂

藏書題跋二 明參精妙本

經部 啓新齋易像鈔 孝經 春秋集傳 詩經圖譜慧解 廟制圖考 考工記圖解

說文考異 漢詁纂 論韻 說文字原

史部 前漢書隨筆 宋史記 明史稿跋一 明史稿跋二 世本集覽 統系源流

從亡隨筆 明小紀 皇明末造錄 甲申傳信錄 明季見聞輯錄 南疆逸史 明

季南略 燭火錄 莊氏史案本末 東坡指掌圖 今古輿地圖 臨安志 四明文

獻錄 句章徵文錄 四明郡志 寧波府志 牛首山志 寓山志 南田開壑新舊

檔案 雪竇寺志略 師友淵源錄 兩浙耆獻傳略 兩浙明遺獻傳略 平定交南

錄 王腹軒楚材 初名粹材更名楚材 手錄全氏七校水經 原題無注字今仍之 浙東山水簿目 南疆勘界日

記圖說 寶刻叢鈔 雨齋軒校漢碑錄 兩浙藏書錄稿 四明經籍志 四明經籍

提要甲集 章太炎自定年譜

子部 鐵網珊瑚 珊瑚木難 聖門禮樂統 元儒學案 歷代道學統宗淵問對 類

輯姚江學脈附諸賢小傳 王陽明先生書疏證 萬季野講經口授 老子斷注 張

冷僧訂並手鈔高註三書異同訂 御製天玉曆祥異賦 草廬合璧遺書 太乙秘訣

職官分紀 喻彙 寶日堂札記 一題寶日堂札記 山居隨筆 尊行日記 瑄朗乞巧錄 青林

山房雜誌 五色線補 養疴漫記 畫繼 千卷樓隨筆

集部 皮子文藪 范文正公別集四卷 文潞公文集 北山小集 公是集錄 友林

乙彙 劉後村集續編 石堂遺集 慈湖遺書 網山集 閒過齋集 不繫舟漁集
剡源集 夷白齋稿 相江集續集 胡仲子集 張冷僧宗祥手鈔趙氏家藏集 紫
薇堂集 董山文集 留仙詩集 睫巢集後集 忘泉文恆詩漸 忘泉文存殘本
杲堂文鈔內集別錄附錄李氏家傳詩鈔 湛園未刻稿 復齋遺集 定海黃氏父子
兄弟未刻遺書 袁西山文集 二硯窩詩稿偶存 童柘叟遺著十八種 方啓南碩
輔遺著三種 楠梅花廬詩集 養素樓吟稿 西崑醉唱集 崇古文訣 石林詩話
雍熙樂府 姚復莊瘦手寫蛟川詩繫 四明詩萃

卷三 藏書題跋三 普通妙本

經部 野崖心易發微 禹貢說長箋 魯詩世學 毛詩鄭箋纂疏補協 詩經廣詁

周官祿田考 釋骨 春秋左氏傳續說

史部 春秋簡秀集 補三國兵志 皇朝紀年 明史傳稿 節鈔明史列傳 萬曆三

大征考 迎鑾三紀 皇清開國方略 北戶錄 家世舊聞 舊聞證誤 呂公實政

錄 玉几山房聽雨錄 歷代奏議精粹 東觀奏記 賀監紀略 皇明名臣墓誌

續表忠記 二續表忠記 歷代節義名臣錄 儒林傳擬稿 同姓名錄 古今氏族

雜證 浙江磚錄 唐書直筆 唐史論斷

子部 長短經 經筵玉音問答 筆囑 維禎錄畜德錄拘虛寤言詢芻錄 女範淑烈

集 問津錄 穎川語小 古今釋疑 釋車 余炳文手札 小眠齋讀書日札 物

類相感志 空際格致附地震解 道書 經咒序彙 硯箋 郁氏書畫題跋記殘本
通文館志

集部 鹿門集 宗玄先生文集 釣磯文集 東觀集 斜川集 廣陵集補遺拾遺附

錄 盤洲全集 呂東萊文集 謝疊山集 鄱陽集 龍洲集 履齋遺稿 退菴先

生遺集 安岳吟稿 宋黃幹勉齋集 茗溪集 陳止齋集 龍雲集 都官集 盧

溪集 溪堂集 陳后山集 盤洲文集 蛻庵集 勤齋集 巴西文集 玉斗山人

集 所安遺集 默菴集 三元人詩 桃溪百詠鯨背吟 瓊芳集 金子有集 朱

文肅詩集 休休齋集 劍溪謾語 鳩茲集選 養疾唱和詩 嬌雄子集 愚谷詩

稿 密娛齋詩集 趙尙書集 萬氏家寶九種 陳新涯銘海補注全謝山句餘土音

雲石居詩稿 官梅閣詩稿 十二山人文集 不伎求齋文存詩存 雪汀詩集殘卷

元本張小山樂府 任則明樂府 錄兔簿 四明人著述鈔本彙跋 編製書目彙誌

卷四 約園元明刻本編年書目上

卷五 約園元明刻本編年書目下

卷六 四明叢書第八集序文

虞預晉書 放齋詩說 舒嬾堂詩文存 石魚偶記 安晚堂詩集 梅讀稿 白嶽游

稿 攝生衆妙方 徐徐集 碑帖記證 甬上高僧詩 四明文徵 周季編略 鄉謠

證古 徐偃王志 容膝軒詩文集 味吾廬詩文存 峽源集

卷七 雜文

今古輿地圖序 詩史初稿序 史學大綱序 諸子大綱序 讀詩臆斷序 莊子臆斷序 謚墅文集序 恆簡齋詩文集序 潛龍漕李氏家乘序 象山姜氏宗譜序 酸醃工業序 工程師手冊序 領袖學序 跋董吳仲允璘上苑國燁光陽論周元公太極圖說札 峽江李氏南壽祀記 題史兆琳藏陸純嘏山水畫冊 贈徐君肅青序 贈陳君九皋序 贈胡君錫安六十壽序 陳季壽先生八十晉一暨鄭淑人七十晉一壽言 方君椒伯六十壽序 傅德予先生六十壽序 贈葉君叔眉六十壽序 江亭芙先生家傳 擬紹興志王家襄傳 馮雪卿先生家傳 陳禾生先生家傳 方選肯先生家傳 李節母王太孺人家傳 財政部庫藏司司長李祖恩墓誌銘

卷八 詩

哀季弟兼自述十二首 詩付星聯 詠楊見心宋元輿志題識叢錄 古驢室歌 題先父賜伯姊扇面遺墨 題虞和欽詩蕭精舍圖用杜工部樂遊園歌韻 六十五歲生日 題天遊廬詩 贈錢士青七十 壬午夏光華同學來會戲作光華歌 和李木公自況韻 兼示恩廉 憶昔贈寧波公報 輓方母王夫人 題汪宏聲藏海日樓遺墨 爲史兆琳題二老遺翰 題鄧江送別圖 爲瞿季剛題詩禮懷永圖 題孫華成桐蔭高逸圖 書蔣竹莊七十二首 覺園有小池池邊白梅初葩偶賦二絕 壬午夏王蓉卿以袁爽秋先生墨蹟見眎爰用遺詩本事題一律 輓顏煥奎同學 輓徐積餘 題史兆琳永儀閣

圖 饒別光華大學十六屆畢業同學 壬午除日 贈張孟劬七十 贈別壬午畢業同學
學 癸未夏與光華戊辰年畢業同學攝影 癸未冬與光華三三級畢業同學攝影 癸
未生日滬上攝影 癸未除日二首 甲申元旦 壽周止庵先生八十 甲申夏與光華
校友敘舊 乙酉元旦 欽懋長姪孫合卷 乙酉三月初三日五十年花燭重逢 有悟
乙酉七十生日

約園雜著二編卷一

藏書題跋一 批校本

經部 小學部

明嘉靖本三禮 明吳郡徐氏縉宋刻三禮曰儀禮十七卷周禮十二卷禮記二十卷皆鄭注也三禮尤以儀禮爲最善汪氏家禧亟稱之得一已難況得其全乎今由陶氏涉園移歸於余余尤喜儀禮爲顧千里^{所藏}手校雖千里校書勇於自信然究與尋常不同也周禮禮記惜未之校余因取士禮居所刻周禮與之互勘略校一過著之書楣惟禮記無善本可讐校耳吳君眉生曾借此書爲攷淵源題綴數語余併附錄於此亦以見校書之難也乙酉春約園

吳眉生誌云徐刻三禮以儀禮爲最善然有初印後印之別後印本有剜補擠刻之字於宋本並不盡同甚有改從俗本者如喪服大夫去君婦其宗席初印本作婦與唐石經同宋嚴州小字本亦作婦乃後印本改婦作歸依通行俗本大謬四部叢刊假葉部園藏本景印卽後印本也此本紙墨不甚精乃初印之次者尙無改刻之字顧千里據北宋本覆校並取唐石經本嚴州本景海單疏本張洎識誤大略參校至可珍貴惟顧氏校書往往勇於自信如聘禮對曰非禮也敢辭謂唐石經敢下衍一辭字自宋以來經注各本皆仍其譌此猶可援賈公彥疏及魏了翁要義之說爲解若士喪禮卜宅如初儀謂卜宅依別本作卜擇唐石經北宋本岳本併誤愚意卜宅者卜喪居也嚴州本亦作宅今依通行俗本改宅作擇謂諸善本一切皆誤如何可

從顧校本舊在陶蘭泉處今歸張氏約園介胡孟嘉同學借讀併傳校一過略識數語以誌因緣乙亥端陽後十日丹徒吳庠記

徐刻儀禮陳簡莊葉邵園各有長跋一通陳校用初印本專取唐石經對勘葉用後印本專取嚴州本對勘陳跋在經籍跋文十九篇中刻入別下齋叢書乃管芷湘所手校譌奪之處甚多才疏學淺不獨儀禮芷湘在當時薄負校書名不知何以荒率至此葉跋在邵園讀書志中鉛字排印誤字亦多葉氏校書時並不知所見爲後印本遂於初印本佳處略去甚矣校書之難也後二日庠再記

弘治本五經白文 此五經白文十六冊爲明弘治九年丙辰栗川周氏刻本其自跋云覆考舊文字加鑒校謹遵正韻而端刻之洵哉端刻也此書經抱雌讀過抱雌不知何人待考其於易獨詳詩次之禮又次之禮之曲禮朱筆題者別一人非抱雌也書春秋則又次之然五經徧讀到底不懈有恆人也書面題抱雌臆說或題偶解所說不矜奇立異而平易近人於詩遵序惟關雎則持異論統觀之不失爲篤實君子余以四百番購置之子孫宜寶焉壬午秋約園

誠齋易傳 余既得明療鶴亭本誠齋易傳二十卷今更得此爲慈谿鶴麓山房葉氏元堦刻也常熟翁相國同餘取古今史事有益世道人心而可挽救末俗者盡錄於眉端其是否舛生親筆雖尙待攷而自始至終一筆不苟所錄均爲粹語則誠有足寶者焉茲取其卷端自記錄後亦可見古大臣於治亂之幾否泰之兆無時不在心也世之詆常熟者謂甲午主戰戊戌主變法余讀其日記甲午主戰者實出自兩宮但常熟未能阻之耳戊戌之變法盡人知其不得不變矣更

何能爲常熟罪也爰論及之乙酉春約園

同治四年臣銖入直弘德殿其時穆廟冲齡臣實司講事今上御極臣授書殿中上尤喜周易往往引史事下問臣對以宋臣楊萬里易傳最爲簡切因進是書日講數葉於治亂之幾否泰之際未嘗不反覆三致意也臣夙藏一本爲宣宗潛邸時所儲有皇太子圖書養正書屋各印書之上下方有秦蠲曾敬錄史事而題籤則蕭山湯文端筆也旣以進御乃就每日所講諸史錄於此本以備遺忘戎歸田舊帙散佚忽於篋中見之西清帷幄已如隔世而猶得以炳燭殘年省愆讀易其感幸爲何如哉光緒辛丑四月朔臣翁同龢敬記

周易集註 清嘉慶間欽吳定字澹泉旣作周易集註八卷自序謂年三十八始殫精於易有一言一義之盲於心每捐寢食求之不可得則筮之必意與聖通而後慊不自量度敢排纂衆論而棄取之筆諸書以貽諸二三子若曰此古人之遺訓云耳序作於嘉慶壬戌書刻於甲子旣刻以後更有改定其小者如稱引之姓字歸於畫一以爲集註之例自唐以前李氏集解所列諸家皆僅舉其氏以傳者希舉其氏卽知其人也其有一氏兩人或數人者則必有以別之唐降迄今傳者衆矣故不得不著其字字不知則敬記其名或名字皆不知亦但舉其氏而已故改本悉依此例其大者凡已刻本所采諸說間有漏略則必詳爲訂補自卷一至八卷均有訂正皆勝於初本末有門人識云謹照澹泉師有改本更校一過時在嘉慶戊寅重九前三日蓋距甲子十五年矣將以重刻也此稿本乃得之於余是可貴也乙酉春約園

雍正仿宋監本書經 此爲劍溪堂雍正二年刻本而張叔未自始至末一一取諸家之說

錄之眉端不足則書於每行之末其於禹貢水道源委考之尤爲詳備凡所取者不拘漢宋惟是之歸不特可以之課初學卽求書之精義亦不外是也誠可寶也凡墨筆書者乃錄書序當別一人之所錄非叔未筆也此書間有殘簡宜重裝之乙酉春約園

刊謬正俗 余先得安成顏氏欲章所編顏氏遺書中之顏師古刊謬正俗八卷因錄副焉適又見張氏苾圃舊藏黃蕘圃校影宋鈔本爲之一一讎校顏氏刻本謂得於沈孝廉士龍家藏校本並手爲增補原缺固較黃見舊鈔本謬訛較少但如卷八竟脫沙苑苦菜條至數百字之多此外舊鈔勝處尤多時值太平洋戰爭爆發天下雖亂吾心不亂竭七日之力爲之寫校訖凡用墨筆者非刻本之誤乃錄副者之誤也藉以別之辛巳夏正十一月朔日約園

篆法偏旁點畫辨 釋篆法辨 余訪書得篆法偏旁點畫辨釋篆法辨知爲吾四明人士應在撰而不知其何時人嗣見錢塘汪沆小眠齋讀書日札云篆文辨訣一卷明句章應在止善輯仁和莫可易震生增次海鹽孫爾振允揚篆正私以爲汪氏既題明代人必有所據但未知明代之初抑明代之季且不知句章者慈乎鄞乎今偶檢張金吾藏書志有應子篆法偏旁點畫辨一卷釋篆法辨一卷註明刊本元應在撰前有自序從舊鈔本補錄是書根據篆書以訂隸楷之誤取俗書之戾於篆者辨正點畫剖析毫釐括作七言詩歌以便誦讀冠之篇首曰篆法偏旁點畫辨在又自爲之注曰辨釋篆法辨其書刊謬訂誤至爲精密非究心篆法者不及此述古堂書目倪氏補元史藝文志俱著錄皆未詳其名知其未見自序也伏讀欽定佩文書畫譜有元應在篆法辨訣採入卷四論書卽篆法偏旁點畫辨也張金吾藏書記又載篆法偏旁點畫辨一卷注舊

鈔本後錄應在止善甫自序然則汪氏所謂明人者誤矣抑或汪氏別有所據元享國僅八十年元之末明之初亦未可知也要之此書可寶況爲吾鄉哲之書當歸安姚彥侍刻咫進齋叢書時搜得此本將入之故題咫進齋叢書五字於書縫不知何以於第一第二集未錄意者以其時代無可考乎余既先見讀書日札又見愛日廬藏書志因得考其詳焉且卽以詩歌言亦古奧不俗余曩歲得湯豫亭^題六書辨異二卷將刻入四明叢書以其於六書多有辨證茲又得此擬同刊入第八集咫進所遺者由余補之不成一佳話乎甲申孟冬約園

史部

劉今度批校史記 辛未秋余得此書於金陵卷首有涉江者記曰莫氏邵亭書目記何子貞有明武進吳中珩刊史記正文當卽此本莫氏誤記新安爲武進耳惟一卷本紀題吳中珩而表書以下則題吳勉學當是一家所刊俟考其眉批書法致佳而一卷有象先今度二印是國初劉今度也今度工書應出其手筆余初得其前半繼得後半乃合爲全璧亦奇矣云云涉江姓氏未詳眉批大致不出議事評文校勘三類自首至尾精神貫澈不論其是否出劉今度手筆要可貴也涉江兩次始獲全璧得書豈無因緣耶爰誌之乙酉春約園

翁元圻批校史記 此書壬申冬得於海上凡三十二冊卷首有姚江翁元圻手批七字卷末有翁元圻誌云余讀書龍泉山莊每遇春夏無事之際閱此消閒並批是傳數年之心力今春始成爰綴數言於後道光壬午花朝日余徧覽之目錄上加圈者二十一

五帝本紀項羽本紀秦楚之際月
表高祖功臣侯者年表孔子世家

升成世家列傳晉晏列傳孟官平順傳陵傳范舉傳廉頗藺相如傳屈臣傳張良傳李斯傳蘇秦張儀傳貨殖列傳

眉批分墨筆朱筆深藍筆三種而以朱筆爲

多觀字體出自元圻親筆者絕少且詳略不一如夏殷周本紀秦本紀皆無批至始皇本紀項羽本紀則特詳高祖呂后孝文孝景孝武本紀亦無之三代世表以下至惠景間侯者年表止又詳焉禮樂律歷天官書極略惟封禪較詳而平準爲最備及至世家如吳齊魯以迄田氏可謂片句全無雖孔子世家亦然也獨列傳詳者居多然如匈奴傳西南夷傳則又不加一語矣余正推勘此書十年前有友某告余曰此趙晉半部論語耳余聞而怪之友曰俞氏批是書本全部也書買作偽分而二之君得其半其半得者余尙識其人它日可爲媒介合璧余乃恍然於是書詳略之故矣然友某未獲再見今其姓名亦忘之安得如涉江氏兩次獲全書以成此因緣耶然卽半部論語其精核處確已有過人者矣俞氏元圻字載青號鳳西乾隆四十六年進士授禮部主事迭晉湖南布政使兩攝巡撫里吏議內用太常少卿致仕著有困學紀聞注餘姚縣志有傳乙酉春約園

全祖望刪定晉書 謝山有此書余久知之陳良初叔謂余如欲得此可與余本家丹澤叔仲後裔相商或可讓也言之數年未曾踐行歲已巳晤孫鶴皋謂有甬人以書求售者是書在其中余趨而視之乃以五百番購歸晉中鈐有盧氏抱經樓藏書圖記書首有陳詠橋先生勸題云汪嘯麓甥示余晉書舊爲郡中盧氏抱經樓所藏經謝山全先生點竄刪削因歎前賢讀書獨出手眼其用功之精勤如此竊意先生於諸史必當各有校勘定本惜今不獲書見盡卽此一編良足珍也嘯麓其寶藏之同治壬申重九日題於四餘讀書之室云余旣得此因屬王彥聞謹就謝山

所刪改者一一遂錄名曰謝山點竄晉書校記別存之其刪削大旨納司馬懿師昭於武帝本紀懿仍宣王之號師仍景王之號昭仍文王之號史例宜爾至於列傳之人有宜移入載記者一一改列此外文辭亦多刪改所見正大然此書欲付刻非細爲整齊不可若思其次惟有用珂板印行以存其真耳姑俟它日與作家商定乙酉春約圖

手校宋南宮靖一小學史斷 余於壬戌歲春得小學史斷於海上乃明嘉靖戊戌年仿端平

丙申刻也靖一字仲靖又號靖叔又曰坡山主人

一作

主人有序云自古國於天地間者能使

朝廷清明君君臣臣父子子夫夫婦婦各盡其分而小人不得以勝君子夷狄不得以干中夏者以其能扶植此道也孔子作春秋實倡此道遷固而下則昧於是至本朝伊洛大儒與門人論史始發明此意故范氏作唐鑑其出於程門者爲多至朱文公綱目一書成而後古今之大經大法粲然如指諸掌余讀史撫卷而竊嘆夫古今盛衰治亂之原不外是也云仲靖史斷之作大指在是宋以後則廬陵晏彥文續著也至元爲止其議論亦復正大刻者則吾四明張木氏余寶是書久矣歲壬午見適園張氏鈞衡所藏宋本爲黃苑圃舊物有嘉慶十年九月跋又有道光丙戌秋琴川張蓉鏡芙川氏誌因以宋本一一與嘉靖張刻本對勘校於是書之上然宋本雖有誤者而實勝明刻遠矣惟宋以後晏氏所續者則無可校耳此書不獨爲初學讀史之津逮卽精於史者亦宜迴誦一遍庶得史學之正統余故樂爲之手校焉黃跋張跋並附存之乙酉春約圖

黃跋云此小學史斷錢唐何夢華藏書也夢華居杭每至吳必向坊間捆載而去謂有友人托購者曾欲購余宋元諸名家詞并元人曲本議價未果而去旣而攜宋刊魏鶴山儀禮要義欲

與余易殘宋本太平御覽又以婉言謝之心甚快快最後攜此冊來欲易余宋刻大字通鑑無注本九十餘卷余因其欲之屢不遂也竟以易之非不知通鑑之有用勝於此書者多而夢華之懣懣於此者或有可補益之處安見非託購之友人所使耶通鑑叢殘已甚余初得價不過四千餘錢若加裝潢不知又費幾倍此冊雖六重裝然卷帙少所費尙省故爲此相易之舉恐旁人聞之謂余輕所重而重所輕也因著其顛末如此嘉慶十年九月立冬前二日是日余舉中吳詩課第十四集酒闌客散燒燭尙未見跋偶檢書及此蒐翁黃丕烈書于百宋一廬

張跋云此書議論名通讀史者得之洵是枕中秘宋刻傳本絕少是冊士禮居散逸黃蒐翁手跋校正者其模糊處復假善本屬秋山先生用淡墨雙鉤原是朱竹垞先生曝書亭所藏識者當能知寶貴也道光丙戌秋中琴川張蓉鏡笑川氏誌時早桂初花明窗展玩快讀一遍亦人生一樂也

張挺批函史 明盱郡鄧元錫纂函史上編八十一卷下編二十一卷五十年甫就而同郡文學張長卿先生粹雅博洽覃精佐之惜訂攷方竣長卿遽逝令子煒孫家鳳俱庠生祇承先志欲奉此批評上獻於朝併欲鐫刻行之海內云見崇禎丁丑馬士驊序此書余於癸亥冬得於海上鄧元錫序後有張挺批三字上編卷一有南城張挺批張煒述八字上下二編自始至終眉端卷身均用硃筆細寫一一批綴當是長卿手筆而後人遂錄者也鄧書奇矣而張氏之批益奇非胸羅萬象目空千秋者莫能道誠寶書也此書流傳極稀嘗與商務印書館友人商酌印行以爲涉及史蹟者少未允然史之精神亦豈可少耶乙酉春約園

戊戌

己亥

庚子

辛丑

壬寅

舊唐書二百卷 晉劉昫等

韓詩外傳十卷 康韓嬰

雅宜山人集十卷 明王寵

唐詩品彙九十卷拾遺十卷 明高棅

墨談十卷 明陳璘

顧氏文房元明四十家小說 明顧元康編

淮海集四十卷後集六卷長短句三卷 宋秦觀

通典二百卷 唐杜佑撰宋曾鞏

大家文選二十二卷 明薛甲編

唐百家詩一百八十四卷 明朱警編 附唐詩品一卷 明徐康編

萬首唐人絕句一百零一卷 宋洪邁

樂城集五十卷樂城後集二十四卷樂城三集十卷應詔集十二卷 宋蘇軾

東田文集二卷 明馬中錫

誠齋易傳三十卷 宋楊萬里

鄂國金陀粹編二十八卷 宋岳珂

聞人詮刻本

蘇獻可通律草堂刻本

賴守康氏刻本

自刻本

顧氏刻本

張綏鄂州刻本

方獻夫刻本

徐獻忠刻本

陳敬學刻本

清夢軒刻本

尹耕療鶴亭刻本

洪富刻本黃日敬修

唐宋元名表四卷

明胡表

芝園外集二十四卷

明張時敏

蟻螻集五卷

明直補

熊士選集一卷

明熊卓

千金要方九十三卷

北周孫思邈
宋林億校

文章正宗二十四卷

宋真德秀選

通鑑考異三十卷

宋司馬光

古今說海一百四十二卷

明陸耕

春秋左傳三十卷

岳遊紀行錄一卷重遊南岳紀行錄一卷

明陸若水

殿閣詞林記二十二卷

明廖道南

陸儼山外集二十二卷

明陸深

鄂州小集

宋羅願

鈴山堂集三十二卷附一卷

明嚴嵩

嘉靖丙午科浙江鄉試題名錄一卷

法藏碎金錄十卷附晁文元公逸事一卷

宋晁觀

陸儼山文集一百卷

明陸深

胡松刻本

自刻本

陳德文重刻本

喬世定小丘山房刻本

孔天胤刻本

雲間陸氏家塾刻本

宗文堂刻本

一泉書堂刻本

陸楫刻本

七世孫羅傳道重刻本

張治刻本

晁璫寶文堂刻本

陸楫刻本

癸卯

甲辰

乙巳

丙午

丁未

新序十卷 漢劉向

何夏俊刻本

說苑二十卷 漢劉向

全上

王端毅奏議六卷 明王起

揚州刻本

讀禮疑圖五卷 明季本

漢紀三十卷 漢荀悅

黃姬水刻本

後漢紀三十卷 晉袁弘

全上

東水質疑 讀史質疑四卷 諸子質疑二卷 六卷 明胡衷

戊申門生楊山等刻本

東川羅先生潛心語錄 羅文鑑編

羅文彬重刻本

勸忍百箴四卷 明許名奎

四明張謙刻本

蔡中郎集六卷 漢蔡邕

俞憲成喬世寧刻本

漢書一百二十卷 漢班固 唐顏師古注 明汪文盛高謙傳發身校

福建汪文盛刻本

後漢書一百二十卷 宋范曄 唐李懷太子賢注

全上

五代史記七十四卷 宋歐陽修 徐無黨注

全上

蕭綵集二卷 明張之象

程衛道刻本

周恭肅集十六卷 明周用

子周國南刻本

黃帝內經靈樞素問二十四卷

顧從德占恆室刻本

拼欄集十二卷 宋鄧庸

明十八代孫鄧四教維重刻本

庚戌 壬子

己酉

戊申

唐雅二十六卷 明張之象編

唐十二家詩集 明張之象編

和實王 李 金 杜 審言 王 勃 陳子昂 王 孟浩然 宋之問 沈佺期 蘇 頌 盧 照 高 適 王 維

六朝詩彙一百十四卷 趙彭張謙編

墨子十五卷

鹽鐵論十二卷 廣相東

金石古文十四卷 明楊慎

唐二十六家詩集五十卷 明王質曾編

李嶠集三卷

蘇廷碩二卷

虞世南集一卷

許敬宗集一卷

李頎集三卷

王昌齡集三卷

崔顥集二卷

崔曙集一卷

祖詠集一卷

張之象刻本

江都黃埠東壁圖書府刻本

張氏自刻本

陸穩刻本

張之象刻本

黃氏浮玉山房刻本

癸丑

甲寅

常建集二卷

嚴武集一卷

皇甫冉集三卷

皇甫曾集二卷

權德輿集二卷

李益集二卷

司空曙集二卷

嚴維集二卷

顧况集二卷

韓君平集三卷

武元衡集三卷

李嘉祐集二卷

耿漳集三卷

蔡隱君集一卷

郎士元集一卷

包何集一卷

包佶集一卷

乙卯

宋史新編

明柯維騭

南澣會景編十二卷

明趙廷璣

孫子十家注十三卷

宋吉天保集註

讀書錄十卷續錄十二卷

明薛瑄

歐陽文忠公集一百三十五卷

宋歐陽修

晞髮集

宋謝翱

文則四卷

明張雲龍

醫經大旨八卷

王右丞集類箋詩集十卷文集四卷

唐王維

程洛水集二十六卷

宋程瑛

晉臺先生集二十卷

明袁宏

小山類彙選二十卷附錄一卷

明張岳

皇明太學志十二卷

歐陽南野集三十卷

明歐陽德

徐少湖集

明徐階

泰書疏三卷

明徐紳

西漢書疏六卷東漢書疏七卷

明李瑄

柯氏刻本

章煥重刻本

談愷度臺刻本

沈維藩刻本

陳珊刻本

程熙刻本

顧起經奇字齋刻本

程元昉刻本

衡藩重刻

王宗沐刻本

宿應麟重刻本

吳國倫刻本

全上

丙辰

丁巳

戊午

己未

庚申

辛酉

壬戌

癸亥

兩漢博聞十二卷 宋楊侃

黃魯曾刻本

何大復集三十八卷 明何景明

新序十卷 漢劉向

楊美益刻本

說苑二十卷 漢劉向

全上

王右丞詩集六卷 唐王維 明顧可久註

王臨川集一百卷 宋王安石

撫州刻本

文山先生全集二十卷 宋文天祥

鄆懋卿刻本

宗子相集十五卷 明宗臣

張時徹刻本

戴中丞遺集八卷 明戴氏

張時徹刻本

廬山紀事十二卷 明梁齊

張鼎文刻本

韓非子二十卷

張鼎文刻本

象山集三十六卷 宋陸九淵

范惟一刻本

遜志齋集二十四卷附錄一卷 明方孝孺

歸有光刻本

莊渠遺書十二卷 明魏校

熊廻重刻本

周易象旨決錄七卷 明熊璠

熊廻重刻本

左傳始末十二卷 明唐順之編纂

吳鳳瑞刻本

周禮傳五卷附翼傳上下二卷圖說上下二卷 明王應龍

吳鳳瑞刻本

古今原始十四卷 明趙欽

邱隅集十九卷 明黃世實

遊名山記總錄十九卷 明何鑑

華陽國志十二卷附一卷 晉常璩

列子通義八卷 明朱善之等

閑闢錄十卷 明程敏

陸子餘集八卷附錄一卷 明陸龜

羅念庵集十三卷 明羅汝先

趙浚谷詩文集十六卷 明趙時春

古言二卷 明鄭曉

今言四卷 明鄭曉

皇甫少玄集二十六卷 明皇甫

孫應鑒刻本

張佳胤刻本

浩然齋刻本

家刻本

江西撫郡刻本

李開先刻本

甲子

乙丑

丙寅

約園雜著二編卷五

約園元明刊本編年書目下

嘉靖末著年代

周易白文不分卷四冊

周易注十卷 晉王弼注

詩緝三十六卷 宋嚴粲

書傳會通六卷 明劉三吾等奉敕撰

春秋經傳集解三十卷

周易大全二十四卷

書傳大全十卷

詩集傳大全十卷

春秋大全三十七卷

禮記大全三十卷

四書大全七十卷

爾雅三卷 晉李善注

釋名八卷 漢劉熙

陳儒刻本

趙府味經堂刻本

全上

全上

明繙宋乾道阮氏種德堂本

經廠本

全上

全上

全上

全上

全上

畢效欽刻本

全上

廣雅十卷

魏張揖撰
附曹憲音解

全上

埤雅二十卷

宋陸佃撰

全上

爾雅翼三十二卷

宋羅願撰

全上

以上五種世稱畢刻五雅

說文解字五音韻譜十二卷

宋李燾撰

孫西浦翁刻本

宋元通鑑一百五十一卷

明薛應旂撰

戰國策十二卷

宋施亮注

洛陽伽藍記五卷

魏楊街之撰

如隱堂原刻本

忠武錄五卷

宋岳飛撰
明此律編

論衡三十卷

漢王充撰

蘇獻可通津草堂刻本

孔子家語八卷

晉王肅注

黃省曾刻本

周易古占法二卷

宋程迥編

天一閣范氏刻本

麻衣道者正易心法一卷

五代麻衣道者撰

郭子翼莊一卷

明高登撰

孔子集語二卷

宋薛據撰

穆天子傳六卷

晉郭璞注

竹書紀年二卷

集此的附註

潛虛一卷附潛虛發微論一卷宋司馬光

素履子三卷唐張翥

廣成子解一卷宋蘇軾

商子五卷秦商

虎鈴經二十卷宋許洞

乾鑿度二卷漢鄭玄

乾坤鑿度二卷漢鄭玄

以上十三種世稱范氏奇書宋天一閣范氏奇書二十種余得十三種向少七種為京氏易傳關氏易傳周易略例周易舉正元包經傳元包數論三統

鶴林玉露十六卷宋羅大經

白孔六帖一百六卷唐白居易

蔡中郎集六卷漢蔡邕

曹子建集十卷魏曹植

陸士龍集十卷晉陸雲

陶淵明集八卷晉陶潛

陶淵明集十卷晉陶潛

孟浩然集四卷唐孟浩然

陳伯玉集二卷唐陳子昂

俞憲喬世寧刻本

郭萬里仿宋刻本

全上

彈琴室仿宋刻本

仿宋本

全上

全上

蘇州集十卷 唐韋應物

青社伐檀集二卷 宋黃庭堅

嘉祐集十五卷 宋蘇洵

三蘇文粹七十卷 宋蘇軾蘇轍蘇洵

洵詞十二卷 明崔銑

山帶閣集三十三卷 明朱日藩

王文恪公集三十六卷 明王鏊

已文懿公集十二卷 明呂原素

馬東田漫稿六卷 明馬中憲

國雅二十四卷續四十卷 明顧炎武

唐詩紀事八十一卷 宋計有功

隆慶

白沙詩教解十五卷 明陳獻章

何燕泉集四卷 明何孟春

文苑英華一千卷 宋李昉編

天祿外史八卷 宋黃憲

春秋名臣傳十三卷 明錢谷

全上

趙府味經堂刻本

董其昌寫刻本

錢塘洪楸校刊本

蔣文化刻本

胡維新刻本

沈守愚刻本

安紹芳刻本

庚午 辛未

壬申
年

癸酉

甲戌

鄉約不分卷 明尹崇

劉良弼刻本

誠齋文贈前集十二卷後集十二卷 宋楊萬里

杭州刻本

盡言集十三卷 宋劉安世

金華石星刻本

萬曆

函史上編八十二卷下編二十一卷 明鄒元揚張挺批校

蔡中郎文集十卷外傳一卷 虞翻撰

蔣注韓昌黎集四十卷柳河東集四十五卷外集五卷遺文一卷附錄一卷 明蔣之翘注

袁文榮公文集八卷初集五卷

山帶閣集三十三卷凌谿集十八卷 明宋日齋朱應登

易經存疑十二卷 明林希龜

通鑑紀事本末四十二卷 宋袁樞

豐城李栻岳州刻本

老子口義二卷

施龍岡刻本

列子口義八卷

全上

莊子口義十卷

全上

以上世稱三子口義林虛齋作也

顏氏家訓二卷 隋顏之推

綠雨樓詩集六卷 明吳頤

胡汝嘉刻本

乙亥

丙子

丁丑

戊寅

己卯

史記評林一百三十卷

凌穉隆刻本

新五代史記七十四卷 宋歐陽修

周氏刻本

皇甫司勳集六十卷 明皇甫汈

重修政和經史證類備用本草三十卷 宋唐慎微增附蘇頌與本草衍義 覆大德刻本

弁州山人四部稿一百八十卷 明王世貞

直音篇 明章鉅

虞德燁重刻本

二十家子書 明諸共成編

吉府刻本

老子 關尹子 亢倉子 文子 尹文子 子草子 管子 公孫龍子 鬼谷子 列子
莊子 荀子 揚子 文中子 抱朴子 劉子 黃石公 玄真子 大隱子 無能子

南村輟耕錄三十卷 明陶宗儀

徐球刻本

歐陽史鈔新唐書二卷五代史二十卷 宋歐陽修明茅坤評

茅一桂刻本

韓子迂評二十卷 何休校

門無子刻本

老子二卷

坊間仿張刻本

莊子十卷

管子二十四卷

淮南子二十四卷

以上世稱中立四子蓋張登雲任中立守嘗刻中都四子坊間仿之

諧史六集 明徐士範輯

庚辰 辛巳 壬午

唐宋八大家文鈔一百五十六卷 明茅坤題

越絕書十五卷 漢袁康

漢書評林一百二十卷 明凌彞堪

管子二十四卷

韓非子二十卷

新語二卷 漢陸賈

賈子十卷 漢賈誼

春秋繁露八卷 漢董仲舒

鹽鐵論十卷 漢桓寬

白虎通二卷 漢班固

潛夫論二卷 漢王符

仲長統論一卷 漢仲長統

風俗通十卷 漢應劭

中論二卷 漢徐幹

人物志三卷 魏劉劭

申鑒五卷 漢荀悅

文心雕龍十卷 梁劉勰

姪茅一桂刻本

徐丁黼刻本

凌穉隆刻本

趙用賢刻本

全上

胡維新刻本

癸未

甲申

乙酉

以上十二種世稱兩京遺編

孔聖全書三十四卷 明方塘唐伯元同纂

對山集四十六卷 明康海

茅氏白華樓藏稿十一卷續稿十五卷吟稿八卷玉芝山房稿二十二卷老年錄七卷 明茅坤

東觀餘論三卷 宋黃伯思

漢雋十卷 宋林敏

馮元敏全集十四卷 明萬時可

飯甄洞稿五十四卷續稿詩十二卷文十五卷 明吳國倫

飯甄洞稿五十四卷 明吳國倫

程文恭公遺稿三十二卷 明程文德

春秋左傳屬事二十卷 明傅應

明刑夏鑑錄三卷 明金華

讀史漫錄十四卷 明于慎行

南華真經副墨八卷 明陸百星

世說新語補二十卷 宋劉義慶撰 王世貞補 明何良俊增

少村漫稿四卷 明黃廷用

林見素文集二十卷奏疏七卷續集十二卷 明林俊

康杓刻本

項篤壽萬卷堂刻本

呂元刻本

郭應龍刻本

孫大綬刻本

崑山唐周刻本

奇孫及祖重刻本

丙戌

丁亥

戊子

己丑

庚寅

辛卯

少微通鑑并續四十一卷 宋魯元太

崇蘭館集二十卷 明莫如忠

翠羽閣集四十卷 明俞安期

將將記三十四卷 明李孟誠

老子翼三卷 明焦竑

莊子翼八卷 明焦竑

龍溪全集二十卷 明王畿
門人同治查知編

茅鹿門集三十六卷 明茅坤

孫子集注十三卷 明黃邦彥校

孟龍川文集二十卷 明孟鳳

靳兩城集二十卷 明靳學顏

華陽洞稿二十二卷 明張祥壽

國史經籍志六卷 明焦竑

一峰集十卷 明羅倫

興山房稿十四卷 明殷士樞

堂別集一百卷 明王世貞

龜山集四十二卷 宋陽時

徐即登陳應芳刻本

王元貞刻本

全上

新都黃氏刻本

王氏刻本

金陵刻本

吳期炤刻本

俞良瑜刻本

林熙春刻本

汪大函副墨八卷

明汪道昆

佩韋子存稿二卷

明周憲長

蹄涔集一卷

元周定卿

提舉集一卷

元周安卿

漢魏叢書三十八種

京房易傳三卷

漢京房吳陸績注

周易略例一卷

晉王弼唐李鼎祚注

三墳書一卷

詩說一卷

漢申培

韓詩外傳十卷

漢韓嬰

大戴禮十三卷

漢戴德

春秋繁露十七卷

漢董仲舒

白虎通二卷

漢班固

獨斷二卷

漢蔡邕

忠經一卷

漢馬融鄭玄注

方言十三卷

漢揚雄平都夢注

元經薛氏傳四卷

附王通阮楚注薛敷傳

新安程榮刻本

壬辰

汲冢周書十卷

晉孔晁注

穆天子傳一卷

晉郭璞注

西京雜記六卷

晉葛洪

素書一卷

漢蒯石公
宋張商英注

新語一卷

漢陸賈

孔叢子三卷

漢孔鮒

新序十卷

漢劉向

說苑二十卷

漢劉向

新書十卷

漢晁錯

法言十卷

漢楊雄

潛夫論十卷

漢王符

申鑒五卷

漢荀悅
明黃省曾注

中論二卷

漢徐幹

顏氏家訓二卷

北齊顏之推

商子五家

秦商鞅

人物志三卷

魏劉劭

風俗通義十卷

漢應劭

劉子新論十卷 梁劉勰撰

神異經一卷 漢東方朔撰

洞冥記四卷 唐郭憲撰

述異記三卷 宋任昉撰

王子年拾遺記十卷 晉王嘉撰

甘石星經二卷 石申撰

飛燕外傳一卷 漢伶玄撰

古今刀劍錄一卷 梁陶弘景撰

論衡三十卷 漢王充撰

呻吟語六卷 明呂坤

白榆集二十八卷 明屠隆撰

靈隱子六卷 唐鄭玄撰

顏魯公集十五卷 唐顏真卿撰

豐對樓詩選四十三卷 明此明臣撰

清源文獻十八卷 明何紹基撰

元豐類稿五十卷 宋曾鞏撰

槎翁詩選十二卷 明劉崧撰

陳大科刻本

二十五代孫胤祚重刻本

陳大科刻本

裔孫曾敏才刻本

張應泰刻本

癸巳

甲午

丙申

丁酉

戊戌

己亥

庚子

壬寅

癸卯

甲辰

孔門傳道錄十六卷 明張新造

精采編三十六卷 明嚴本峻編

吾學編大政記十卷遜國紀一卷同姓諸王表二卷傳三卷附異姓三王孔氏世家一卷異姓諸侯表一卷直文淵閣諸臣表一卷西京典銓表一卷名臣記三十卷遜國臣記入卷三禮述二卷百官述二卷 明鄭曉

天文建一卷地理建一卷四夷考二卷北唐考一卷注缺實以附雜書別

古今曆律考七十二卷 明邢雲路

真誥二十卷

蘇長公合作內外篇 鄭之萬評選

諸儒語要十卷 明唐順之編

睡庵文稿初刻四卷 明湯賓尹

蠟蝶集六卷 明盧耕

唐類函二百卷 明俞安期

甫里集十九卷附錄一卷 唐陸龜蒙

空同集六十六卷附錄二卷 明李夢陽

皇明詞林人物考十二卷 明王先謙

史通二十卷 唐劉知幾

余寅刻本

魏文樞刻本
俞安期刻本

吳達可刻本

李曙賓刻本

曾孫盧啓禎啓宇刻本

徐顯卿校刻本

松江許自昌刻本

鄧雲霄刻本

張之象刻本

元氏長慶集六十卷補遺六卷 唐元稹

馬元調寶儉堂刻本

白氏長慶集七十一卷 唐白居易

全上

米襄陽全集十七卷 宋米芾

苑明泰刻本

穀城山館詩集二十卷 明于慎行

邢侗刻本

農丈人集二十卷詩集八卷 明余寅

麟經統一十二卷 明張杞

詩名物疏五十五卷 明馮復京

過浩齋語錄二卷

十六世孫過繼美刻本

學蔣通辯前後續終各三卷 明陳建

馮北海集四十六卷 明馮琦

唐荆川右編四十卷 明唐順之編
劉日宣補

樂律全書十六種四十八卷

鄭藩世子載堉刻

律呂精義內篇十卷外篇十卷律學新說四卷樂學新說輯一卷周禮經文卷算學新說一

卷操縵古樂譜一卷旋宮合樂譜一卷鄉飲詩樂譜六卷六代小舞譜一卷小舞鄉樂譜一

卷宋儒朱熹論舞大略二僧綴兆圖一卷靈星小舞譜一卷都三十八卷聖壽萬年曆二卷

萬年曆備考三卷律曆融通四卷律曆融通附錄一卷合上四十八卷

宋史紀事本末二十六卷 明陳邦彥編

乙巳

丙午

丁未

戊申

己酉

庚戌

辛亥

元史紀事本末四卷 明陳邦彥編

二程全書六十八卷 明吳必德編

心齋集六卷 明王貞

圓繪宗彝八卷 明楊爾曾輯

人物編三十六卷 明鄭賀編

韓魏公集三十八卷家傳十卷附錄一卷 宋韓琦

東坡外集八十六卷 宋蘇軾

周易宗義十二卷 明程汝璣

延平先生問答一卷附錄一卷 宋李侗

世說新語三卷 宋劉義慶

排韻增廣事類氏族大全二十八卷 元人編

沈休文集四卷 宋沈約

西塘文集九卷附錄一卷 宋鄭俠

二十一史論贊三十六卷 明彭以明輯

海內奇觀十卷 明楊爾曾

徐文長三集三十卷 明徐渭

古史六十卷 宋蘇轍

徐必達刻本

文林閣刻本

康丕揚刻本

全上

熊尚文刻本

周氏博古堂重刻本

陳奇泉積善堂刻本

楊鶴刻本

葉向高刻本

楊爾曾刻本

衛氏刻本

古蒙莊子四卷 王雱撰訂正

睡庵文稿二十五卷 明歸有光

歇菴集十六卷 明陶益

歇菴集二十卷附錄一卷 明陶益

古逸書三十卷 明潘昂相

文選纂註十二卷 明王象乾

吳淵穎集十二卷附錄一卷 元吳章

太岳集四十六卷行實一卷 明張居仁

張江陵全集四十七卷 明張居正

白沙子全集九卷 明陳獻章

刊定孔子世家七卷 明馮樸

穀山筆塵十八卷 明于慎行

詩紀一百五十六卷 明高棅

陽明祠志三卷 明周汝學

益智編四十一卷 明孫能傳

徐文長集三十卷 明徐文

薛文清集二十四卷 明薛瑄

潘慶基刻本

張鳳翼刻本

裔孫吳邦彥刻本

子張懋修刻本

唐國達刻本

馮樸刻本

黃承玄刻本

周汝學刻本

鍾瑞刻本

薛士弘刻本

壬子

癸丑

甲寅

萬姓統譜一百四十卷 明虞維知

氏族博考十四卷 明虞維知

水經注四十卷 唐李益撰

駱丞集註四卷 唐駱賓王撰

淨溪文粹十五卷 宋許道

王文肅集五十五卷 明王鏊撰

沈石田詩集十一卷 明沈周

陳眉公集十七卷 明陳繼儒

張文忠公集八卷文稿五卷詩稿四卷續一卷 明張學

湛甘泉集三十五卷 明湛若水

國語九卷

戰國策十二卷

老子道德經二卷

莊子南華真經四卷

列子沖虛真經八卷

古詩歸十五卷 明鍾惺譚元春編

唐詩豔逸品 明楊夢祥編

錢芹刻本

孫王時敏刻本

閔氏朱墨套本

全上

全上

全上

全上

全上

全上

文心雕龍十卷 梁劉勰

全上

草堂詩餘五卷 明楊慎評

全上

莆陽文獻十三卷列傳七十五卷 明鄭岳

黃起龍刻本

鳳池吟稿十卷 明汪廣洋

王應允刻本

萬卷樓遺集六卷 明豐坊

重訂禮記疑問十二卷 明姚汝

漢魏叢書鈔四卷 明張邦翼選

淮海集四十卷後集六卷長短句三卷 宋蘇軾

江湖長翁集四十卷 宋陳造

道鄉集四十卷 宋鄭浩

黃楊集三卷補遺一卷 元華元武

趙梅峰先生遺稿 明趙仲全

諸葛忠武書十卷 明楊時偉編

陶靖節集十卷 明楊明偉編

儀象管見四卷 明錢一本

聖門通考十五卷續聖門通考三卷 明包大樽

滄溟集三十一卷附錄一卷 明李維翰

全上

全上

黃起龍刻本

王應允刻本

李之藻刻本

全上

鄒中允刻本

十世孫華興敬重刻本

楊時偉刻本

全上

包聖刻本

徐中行刻本

丁巳

平

己巳

甲辰

辛巳

甲戌

丙子

庚申

丁卯

未著
年代

天下名山諸勝一覽記十六卷 黃廉增編

劉子威集五十二卷 明劉鳳

梓溪內集八卷外集十卷 明舒芬

石田詩選不分卷 明沈周

春秋集解十二卷 宋蘇轍

春秋戰國評苑 明穆文熙編

晉書一百三十卷 唐房玄齡等撰

路史四十七卷 宋羅泌

續文獻通考二百五十四卷 明王圻

儒林全傳二十卷

續吳先賢傳贊十五卷 明劉鳳

李氏藏書六十六卷續藏書二十七卷 明李贊

老莊通十二卷 明沈一貫注

莊子四本不分卷

淮南鴻烈解二十一卷

老子道德經二卷

莊子南華真經三卷

吳興慎氏刻本

舒環刻本

錢允治刻本

刻本

吳琯西爽堂刻本

洪縝刻本

王氏刻本

魏顯國刻本

劉鳳刻本

王樹刻本

茅一桂刻本

新安黃之案刻本

荀子二十卷

揚子十卷

文中子十卷

以上五種世稱黃刻五子

老子道德經二卷

關尹子文始真經一卷

文子二卷

莊子南華真經三卷

列子仲虛真經八卷

管子二十四卷

晏子春秋四卷

荀子二十卷

韓非子二十卷

商子五卷

鬼谷子一卷

吳子一卷

孫子一卷

新安吳勉學刻本

司馬子一卷

黃石公素書一卷

呂氏春秋二十六卷

淮南子二十一卷

揚子法言十卷

文中子中說十卷

譚子化書六卷

以上二十種世稱吳刻二十子

雲子一卷

晏子二卷

孔叢子三卷

賈子新書二卷

陸子一卷

小荀子一卷

鹿門子一卷

文子二卷

關尹子一卷

亢倉子一卷

鷗冠子一卷

黃石公素書一卷

天隱子一卷

玄真子一卷

无能子一卷

齊邱子一卷

鄧析子一卷

尹文子一卷

公孫龍子一卷

慎子一卷

鬼谷子一卷外編一卷

墨子一卷

子華子二卷

劉子一卷

以上二十四種世稱子集

魯齋遺書十四卷

元許齊

研北雜志二卷 元陸友

讀書一得四卷 明黃輝

皇明世說新語八卷 明李紹文

指月錄三十二卷 明羅汝璣

山堂肆考 明彭大翼纂
張幼學編輯

墨苑二十四卷 明程君房

墨譜六卷 明方于魯

蔡中郎文集十卷附外傳一卷 漢蔡邕

東雅堂韓昌黎集四十卷外集十卷 唐韓愈

韓昌黎文集不分卷 唐韓愈
明郭正域評選

呂氏春秋二十六卷

楞嚴經十卷 唐天竺沙門般刺密章譯

陶淵明集八卷 晉陶潛

唐駱先生集八卷 唐駱賓王

韓文公文鈔十六卷 唐韓愈

韋蘇州集十卷 唐韋應物

孟浩然集二卷 唐孟浩然

黃口齋校刊本

程氏刻本

方氏刻本

徐子器刻本

徐氏刻本

吳興凌氏朱墨套本

全上

全上

全上

全上

全上

全上

李長吉集四卷外集一卷 唐李賀

全上

王摩詰集七卷 唐王維

全上

孟東野集十卷 唐孟郊

全上

杜詩選六卷 唐杜甫

全上

歐陽文忠公文鈔十卷 宋歐陽修

全上

吳文肅文集二十卷附錄一卷 宋吳儆

裔孫吳瀛刻本

石門文字禪三十卷 宋釋德洪

浚川集二十二卷 明王冕

袁中郎十集 明袁宏道

唐一菴集不分卷 明唐樞

金闕稿二卷石湖稿二卷雨杭吟稿三卷 明馬時可

薛考功集十卷 明薛寬

謝四溟集二十四 明謝康

天目先生集二十卷附一卷 明徐中行

賦海補遺三十卷 明屠隆等

漢魏二十二家集一百二十八卷 四庫存目云自漢董仲舒至周廣信凡二十二家

董仲舒集一卷 漢董仲舒

冰玉堂刻本

明季長興縣刻本

汪士賢刻本

司馬長卿集一卷 漢司馬相如

揚子雲三卷 漢揚雄

東方先生集一卷 漢東方朔

蔡中郎集八卷 漢蔡邕

曹子建集十卷 魏曹植

阮嗣宗集二卷 晉阮籍

嵇中散集十卷 晉嵇康

潘黃門集六卷 晉潘岳

陸士衡集十卷 晉陸機

陸士龍集十卷 晉陸雲

謝康樂集四卷 晉謝靈運

陶靖節集十卷 晉陶潛

鮑明遠集十卷 宋鮑照

謝惠連集一卷 宋謝惠連

顏延年集一卷 宋顏延之

謝宣城集五卷 齊謝朓

昭明太子集五卷 梁蕭統

江文通集十卷

梁江淹

陶貞白集二卷

梁陶弘景

庾開府集十二卷

周庾信

任彥升集六卷

梁任昉

凡得十九家曹子建集十卷陶靖節集十卷昭明太子集五卷未得

元文類七十卷目錄三卷

元蘇天爵編

修德堂刻本

天啓

重編瓊臺會稿二十四卷

明丘濬

丘爾穀刻本

劉須溪先生詩鈔八卷

宋劉辰翁

張景岳類經三十二卷

明張介賓

寓林集三十二卷詩集六卷

明黃汝亨

春秋衡庫三十卷

明馮汝璣

春秋左傳標釋三十卷

管子二十四卷

爾雅翼三十二卷

宋羅願

盡忠錄八卷

宋陳東

合刻周秦經書十種

盧之頤刻本

朱純養花齋刻本

從裔羅朗刻本

四印堂刻本

丙寅 丁卯 未替 年代

乙丑

甲子

癸亥

辛酉

檀弓記 謝疊山評

孟子 蘇老泉評

冲虛經 諸家評

化書 楊升庵評

考工記 郝明龍評

陰符經 康德園評

廣成子 蘇長公評

詩經 鍾伯敬評

道德經 諸家評

素書 楊升庵評

潛確類書一百二十卷 明陳明編

卓氏遺書二卷 明卓敬

崇禎

寧澹齋全書十六卷 明楊守勤

資治通鑑二百九十四卷 宋司馬光

資治通鑑釋例一卷附問疑一卷 宋司馬光

資治通鑑目錄三十卷 宋司馬光

顧起元刻本

陳氏刻本

宋劉忠

宋元通鑑一百五十七卷

明薛應旂

甲子會記五卷

明薛應旂

釋文辨誤十二卷

元胡三省

以上七種陳仁錫纂評世稱資治通鑑全書

袁中郎集四十卷

明袁宏道

三易集二十卷

明唐時升

吳飲小草十卷

明唐時升

學古緒言二十五卷

明袁堅

圓松浪淘集十六卷

明程嘉燾

圓松偈菴集二卷

明程嘉燾

檀園集十二卷

明李流芳

以上嘉定四先生集

夢溪筆談二十六卷補三卷

宋沈括

香乘二十八卷

明周家官

天下名山勝概記四十八卷圖一卷附錄一卷

孔叢子三卷

陸之選刻本

謝三賓刻本

全上

全上

全上

全上

全上

周氏刻本

武林讀書坊刻本

孔胤植刻本

庚午

辛未

癸酉

乙亥 丁丑 己卯 庚辰 辛巳 癸未 甲申 未著年代

帝京景物略八卷 明劉侗

夏桂淵集十八卷 明夏言

同時尙論錄十六卷 明蔡士順撰

李忠定公集四十八卷 宋李綱

三鯉堂篆韻正義五卷 明昌文

宗忠簡集八卷 明宗澤

四明它山水利備覽二卷 宋魏觀

曆府鉤圓一卷

沈石田詩鈔十卷 明沈周

說郭一百二十卷 明陶珽撰

續說郭四十六卷 唐陶真撰

鐵函心史二卷 宋高思齊

宋學士集九卷附錄一卷 唐宋之撰

明刻 未著年代

易經蒙引二十四卷 明蔡情

春秋左傳杜林合注五十卷 晉杜預 宋林克夏

春秋四傳三十八卷

吳一璘刻本

熊人霖刻本

陳朝輔刻本

朱安雅刻本

耕石齋刻本

陶珽刻本

全上

曹荃刻本

林希元重刻

蘇穎濱先生春秋集解十二卷 宋蘇穎濱

春秋經傳集解

明覆桐臺岳氏本

大廣益會玉篇三十卷

明開封府翻元刊本

詳校篇海五卷 明宋濂

中華古今注二卷 馬竊

史記一百三十卷 漢司馬遷

明翻宋精刻本

史記一百三十卷 漢司馬遷

明吳中珩刻本

史記一百三十卷 漢司馬遷

全上

晉書一百三十卷 唐房玄齡等

十九史略大全 明曾先之編次

東萊呂氏東漢精華十四卷 宋呂祖謙

十七史百將傳十卷續編四卷附錄二卷 張預何贊新編

補續高僧傳二十六卷 明妙門明河

歷代帝王紀年纂要一卷 明白雲翁

彤管遺編二十卷 明鄭琬

建文年譜 明趙士昂

地圖總要內外卷 明朱國建等編

黃兆文刻本

水東日記四十卷 明葉盛

六世孫重華刻本

迪吉錄八卷 明顏茂積

金薤琳琅二十卷 明都穆

南遊真經十卷 晉郭象注
唐陸德明音義

關尹子三卷

朱蔚然刻本

韓子二十卷

六子書 黃石公素書一卷列子八卷老子二卷
鬼谷子一卷商子五卷晏子四卷

黃之察刻本

淮南子二十一卷

新序十卷 漢劉向

中說十卷 隋王通

童蒙訓三卷 宋呂本中

黃氏日鈔八十八卷 宋黃震

明仿宋刻本

世說新語補二十卷 明李贄批

明繙紹定本

齊東野語二十卷 宋周密

明活字本

釋氏稽古略四卷 元釋覺岸

仿元刻

灼艾集二卷續集二卷別集二卷餘集二卷 明萬安

明重刊元本

尚古類氏集十二卷 明王文翰編纂

羅田校刊本

柳州文集四十二卷別集二卷外集二卷唐柳宗元

游氏刻本

樊川文集二十卷外集別集各一卷唐杜牧

杜樊川集十七卷唐杜牧

朱一是吳樊評本

豫章熊先生家集七卷元熊明來

明初刻本

傅與勵詩元傅

青陽集六卷元余闕

甫田集三十五卷附錄一卷明文徵明

趙忠毅公集二十四卷明趙南星

天一閣集三十二卷明范欽

古源山人二論八卷明李呈祥

崔氏六種明崔銑

華泉集八卷華泉稿六卷明邊貢

魏允孚重刻本

喙鳴文集十七卷明沈一貫

王文端公尺牘八卷明王家屏

門人傅新德刻本

娑羅館清言二卷明屠隆

李獻吉何默仲文鈔不分卷明李夢陽何景明

何仲默先生詩集十五卷明何景明

李三才刻本

王蟾先生集六卷續集二卷

明葛長庚

選詩補注八卷補遺二卷續編四卷

元劉辰注

策準三卷

明初刻本
明仿宋本

詞致錄十六卷

門李天麟

汲古閣本

四書

大學一卷 中庸一卷 論語十卷 孟子七卷

五經

易經四卷 書經六卷 詩經八卷 春秋三十卷 春秋十卷

春秋胡傳三十卷

宋胡安國

說文解字三十卷

漢許慎

漢隸字源六卷

宋黃機

陸狀元通鑑二百八十八卷

宋陸唐老

史記索隱三十卷

唐司馬貞

五代史補五卷又闕文一卷

宋陶岳

吳郡志五十卷

宋范成大

蘇米志林二卷

宋蘇軾 宋黃

孔氏家語十卷

晉王肅注

輟耕錄三十卷

元陶宗儀

山居小玩十種

翦桐隨筆一卷明王象晉毛鳳苞訂梓

津逮祕書第一集八種第二集十種第三集六種第四集十六種第五集十一種第六集四種第七集十種第八集十二種第九集十種第十集十二種第十一集六種第十二集十種第十三集十種第十四集十種第十五集十種

離騷十七卷周楚屈平

陶淵明集晉陶潛

浣花集十卷五代韋莊

松陵集十卷唐陸龜蒙

雞肋集十七卷宋晁補之

馮定遠集十卷明馮至

滑耀編四卷夏三近彙集

盛唐二家集僅得一種杜工部集待訪

李翰林集二十五卷唐李白

三唐人集

孫可之文集十卷唐孫樵

李習之集十八卷唐李翱

皇甫持正文集六卷唐皇甫湜

五唐人集

孟襄陽集三卷

唐孟浩然

孟東野集十卷附一卷

唐孟郊

追昔遊詩三卷

唐李紳

金荃集七卷別集一卷

唐溫庭筠

香奩集一卷

唐韓偓

六唐人集

常建詩集三卷

唐常建

韋蘇州集十卷

唐韋應物

王建詩八卷

唐王建

鮑溶詩集六卷集外詩一卷

唐鮑溶

姚少內監詩集十卷

唐姚合

韓內翰別集一卷

唐韓偓

四唐人集

僅得二種

李賀歌詩編四卷集外詩一卷唐吳融三卷待訪

唐風集三卷

唐杜荀鶴

竇氏聯珠集一卷

唐竇常等

八唐人集

僅得三種

許渾丁卯集羅隱甲乙集薛能許昌集賈島吳紅集李嘉祐盧仝集待訪

碧雲集三卷

唐李中

文山集三卷

唐李華玉

義山集三卷

唐李商隱

唐三高僧詩

禪月集二十六卷

唐貫休

杼山集十卷

唐皎然

白蓮集十卷

唐齊己

唐人選唐詩八種

御覽詩一卷

唐令狐楚選

篋中詩一卷

唐元結選

國秀詩二卷

唐芮挺章選

河嶽英靈集三卷

唐殷璠選

中興閒氣集二卷

唐高仲武選

搜玉小集一卷

唐佚名

極玄集二卷

唐姚合選

才調集十卷

唐李嶽選

樂府詩集一百卷

宋郭茂倩編

唐詩紀事八十一卷

惠詩有功

陸放翁全集

宋陸游老學庵筆記入律建炎書

渭南文集五十卷

劍南詩稿八十五卷逸稿二卷

南唐書十八卷

家世舊聞一卷

齋居紀事一卷

詩詞雜俎十六種

東坡集一卷

宋蘇軾秀麗

蘇軾集二卷

宋李綱

田園雜興一卷

宋范成大

月泉吟社一卷

宋吳淵

谷音二卷

宋杜本

清江碧嶂集二卷

河汾諸老詩八卷

元房元

三家宮詞三卷

唐王建

宋王珪

蜀花嚴夫人

二家宮詞二卷

宋徽宗

宋曹宗

元宮詞一卷

明佚名

漱玉詞一卷 宋李清照

斷腸詞一卷 宋朱淑貞

女紅餘志二卷 宋黃德

元人十集

元遺詩山集二十卷 金元好問

薩天錫詩三卷集外詩一卷 元薩都刺

金臺集二卷 元趙貫

翠寒集一卷 元宋元

吟嘯集一卷 元宋元

雲林詩集六卷集外詩一卷 元倪瓚

南村詩集四卷 元陶宗儀

玉山草堂集二卷集外詩一卷 元顧瑛

句曲外史集三卷集外詩一卷補遺三卷 元張雨

霞外詩集一卷 元馬臻

元四大家詩

虞伯生詩八卷補遺一卷 元虞集

楊仲弘詩八卷 元楊奐

范德機詩七卷 元范仲

揭曼碩詩三卷 元揭傒斯

楊鐵崖樂府

樂府十卷 元楊維禎

樂府補六卷 元楊維禎

復古詩集六卷 元楊維禎

麗則道音四卷 元楊維禎

中州集十卷樂府一卷 金元好問

宋六十家名家詞八十八卷 明毛晉

列朝詩集 前集上下 甲前集十一卷 乙集八卷 丙集十六卷 丁集十六卷 閏集六卷

南監本正史

史記正義一百二十卷 漢司馬遷 嘉靖庚辰祭酒張邦奇司業江汝璧校刻 其本丙申祭酒馮夢龍司業黃汝良校修

前漢書一百二十卷 漢班固 查取錄 嘉靖己丑祭酒張邦奇司業江汝璧校刻

後漢書一百二十卷 宋范曄 全上

三國志六十五卷 晉陳壽 南齊集慶路學舊刻 其本丙申祭酒馮夢龍司業黃汝良校修

晉書一百三十卷 唐房玄齡等奉文撰 南齊集慶路學舊刻 嘉靖己丑祭酒張邦奇司業江汝璧校刻

宋書一百卷 梁沈約 萬曆甲午司業馮夢龍校 其本丙申祭酒馮夢龍司業黃汝良校修

南齊書五十九卷

梁蕭子顯

萬曆己丑祭酒趙用賢司業張一桂校刻

梁書五十六卷

唐姚思廉

萬曆乙亥祭酒余有丁司業周子義校刻

陳書三十六卷

唐姚思廉

萬曆戊子祭酒趙用賢司業余孟麟校刻

魏書一百十四卷

北齊魏收

萬曆丙申祭酒馮夢楨司業黃汝良校刻

北齊書五十卷

唐李百藥

萬曆戊子祭酒趙用賢司業張一桂校刻

周書五十卷

唐令狐德棻等

萬曆戌子祭酒趙用賢司業余孟麟校刻

隋書八十五卷

唐魏徵等

萬曆甲午祭酒季道統校刻

南史八十卷

唐李延壽

萬曆己丑祭酒趙用賢司業張一桂校刻

北史一百卷

唐李延壽

萬曆壬辰祭酒鄧以廣司業劉應秋校刻

新唐書二百五十五卷

宋歐陽修宋祁
出宋王洙舊唐書二十五卷

南雍集慶路舊刻嘉靖萬曆重補

新五代史記七十五卷

宋歐陽修

萬曆丙子祭酒余有丁司業周子義校刻

宋史四百九十六卷

元托克托等

成化庚子舉撫朱英酒嘉靖丁巳重補刻

遼史一百十六卷

元托克托等

嘉靖己丑祭酒張邦奇司業江汝璧攸元刻校刻

金史一百三十五卷

元托克托等

嘉靖己丑祭酒張邦奇司業江汝璧攸元刻校刻

元史二百十卷

明宋濂等
洪武舊刻崇禎間祭酒侯倬
司業梅德博補刻先於嘉靖間已修刻

嘉靖己丑祭酒張邦奇司業江汝璧攸元刻校刻

約園雜著二編卷六

四明叢書第八集

虞預晉書一卷

晉虞預著 隋楊士珍撰 虞預書房本

放齋詩說四卷

宋曹粹中撰 張昇補輯 舊本

舒嶺堂詩文存三卷附錄一卷

宋舒直撰 張昇補輯 舊本

石魚偶記一卷

宋楊簡撰 二老閣刻本

安晚堂詩集八卷補編一卷輯補一卷

宋鄭澥之撰 後補本

梅讀稿十卷附錄五卷

明梅自龜撰 刻本

白嶽游稿一卷

明沈明臣撰 伏居館藏經樓抄本大西山房影印本

攝生衆妙方十一卷

明張時敘撰 康熙三年重刻本

徐徐集一卷

明王從撰 嘉靖刻本

碑帖紀證一卷

明范大猷撰 鄧誠政影印本

廟制圖考一卷

清其新同撰

鄭寒村文鈔二卷附年譜一卷

清鄭舉撰 年譜鄭嗣撰

果堂內集文鈔二卷

清李彭嗣撰

甬上高僧詩一卷

清李彭嗣撰

四明文徵十六卷

清袁鈞編

伏野齋藏書本

周季編略九卷

清黃以周編

浙江官書局刻本

徐偃王志六卷

清徐時棟編

鄉談證古四卷

清陳康祺

張壽鏞編次

容膝軒詩文集十二卷

清王榮商

味吾廬詩文存二卷外紀一卷

清江仁發撰

稿本

外紀張壽鏞編次

峽源集

一名鶴

一卷

清毛宗蕃撰

稿本

右二十一種一百又三卷序文未成者三種

清制國考

鄭寒村文

虞預晉書序

自唐貞觀中詔前後晉史十八家未能盡善敕史官更加纂撰於是言晉史者皆棄舊從新而十八家之書若存若亡矣吾鄉全謝山先生欲修晉書首刪削本紀改宣帝爲宣王景帝爲景王文帝爲文王而皆納於武帝紀中各傳點竄亦復不少書雖未成其原稿余幸得之以藏諸笥晉書之宜修議者紛紛特以十八家之書無一完本耳有清黟縣湯球取亡逸之晉書十種曰臧榮緒晉書十七卷補遺一卷王隱晉書十一卷虞預朱鳳謝靈運蕭子雲蕭子顯名晉沈約何法盛名晉晉書各一卷及晉諸公別傳七卷各標其所自出力勤矣四明史學肇於虞氏余既刻虞氏遺書更刻會稽典錄典錄爲後人所輯晉書湯氏輯之雖略於典錄吉光片羽亦可寶也余因取以與唐修之晉書對勘本紀中如宣武元三帝御覽所著既未之及列傳中如扶風王駿僅附

見於王渾傳王浚則王渾從子也渾傳且未附見山嶽則山濤族子也濤傳亦未之錄庾琮則庾峻第二子也峻傳言子二珉數而無琮珉字子琚數字子嵩琮字子躬其遺漏可知也何楨者文雅高于楊豫劉知幾嘗稱之今亦依王隱之失不入文苑卽湯氏輯本之寥寥者觀之已若此然則永寧先生之晉書或稱四十餘卷晉書本傳或稱五十八卷唐書文志或稱二十六卷隋書經籍志原注云本四十四卷今殘佚或稱五十八卷餘姚舊文志稱者案曰豈唐代全本復出隋志既未及見并原有卷數亦未合耶果得全書其裨益豈淺眇哉若夫高氏似孫作史略謂預爲著作郎私撰晉書而生長東南不知中朝事數訪於王隱并借隱所著書竊寫之所聞漸廣家貧無資用乃征西將軍庾亮於武昌供其紙筆得成詣闕上見史略王隱晉書註此不足爲永寧諱且適足見其衣食之不暇而汲汲於著述且表彰節義不遺餘力與宏獎風流以資談柄相去爲何如耶他日有志修晉書者宜台湯氏所輯者彙採之而本謝山之削竄爲體例庶乎其可也民國三十四年一月

放齋詩說序

曹放齋先生諱粹中定海人李讀易先生莊簡公光之壻也莊簡學於劉元城其始不主荆舒之學其繼不附會之之議退而著易先生則箋詩各以其所長治經翁壻間泊如也昔王深寧著四明七觀其於吾鄉經學之士旣首推先生而困學紀聞錄其詩說者五詩地理攷取資尤多嚴華谷作詩緝雜採諸說獨於先生詩說錄之甚詳段叢桂集解亦取之顧其書雖載於宋藝文志爲三十卷而晁子止之讀書志陳伯玉之書錄解題均未之著此書鏤所不解者一也不惟宋也胡雙湖劉安成羅廬陵所見者亦多爲嚴氏所未錄是元時其書固行於世矣由此永樂大典得存

之迨清初黃俞邵編千頃堂書目以有明一代爲之主而補以宋元之書錄放齋詩說爲十卷是黃氏又嘗親見十卷本矣胡亦不傳此壽鏞所不解者二也清初取大典所存輯爲專書者多矣今武英殿活字本可按也何獨於是書則採入欽定詩經傳說彙纂明明尊之重之矣而不爲全書之版行至於全謝山既自大典中鈔而序之所謂謀諸梓者宜可見諸實矣胡竟無人任其貴乎此壽鏞所不解者三也嗚呼是豈書之傳果待其時乎今宋元之舊槧幾如鳳毛麟角然大典之散軼於天涯海國者尙夥安知後之學者不更見全書而爲之刊刻以傳世乎獨念壽鏞搜羅鄉獻三十年於茲矣曩時敍宋元之際吾鄉學術竊取深寧之意詩學首推先生及編詩史初稿聞采其說未之詳焉今見諸家治詩者引先生之說屢矣豈可聽其泯泯或渙而不爲之萃耶爰竭四月之力預斯有益悉皆鈔內仿馬氏玉函輯佚之例編成四卷約二萬數千言亟付諸梓壽鏞竊願天下學士大夫搜得全書視此舉爲多事不願留此碎玉斷金謂存什一於千百視爲抱殘守闕者也若夫先生之說詩博大精深重訓詁抉義理攷地理稽史實謝山之敍既詳言之茲者蒼萃諸家所錄益富爲有目者所共賞無待壽鏞之頌美矣雖然校書如掃落葉輯書更難於校書自愧藏書無多遺漏必衆尤望邦人君子補正之民國三十二年三月

舒頌堂詩文存序

舒信道才人耳文士耳未可以義法繩也觀其尉臨海有使酒逐其叔之妻至其前者命執之不服卽斷其首以令投櫟而去題詩於尉之廳壁曰一鋒不斷姦兇首千古焉知將相才王荊公聞而異之召除審官西院主簿是其進身之始因有超拔之才非以私干於荊公也且說者謂信道

作尉之時正荆公邑鄆之日史傳謂丞相王安石聞而異之實誤今讀謝舉羽題舒臨海故宅詩可以證之然則信道非於荆公既大用而始附之矣然而信道於東坡攻之不遺餘力則何說以解按其爲御史時指斥蘇軾近上謝表譏切時政流俗翕然爭相傳誦又歷敍詩之諷詠如讀書萬卷不讀律致君堯舜知無術如東海若知明主意應教斥鹵變桑田如豈是聞韶解忘味爾來三月食無鹽蓋其時方以明法課試羣吏興水利謹鹽禁也而東坡觸物卽事藉以規諫信道効之亦已甚矣顧雖効之於先而極救之於詔獄之後舉羽非輕許人者其詩曰於此與有力豈爲重其身則非故入人之重辟者又可證也由是觀之信道矜才使氣固不能爲之諱而謝山目爲呂蔡一流則過矣果爲呂蔡之逐勢方將登兩府以傲岸於天下安有餘暇之歲月以徜徉於月湖之濱與十洲之美景良辰相伴侶哉余自弱冠讀書煙嶼樓斜對錦里橋居人呼之曰隩底者相去數十步欲尋嶼堂遺址而故老盡矣嘗披四明舊志信道詩文往往而在且繫於吾鄉掌故者獨多因彙輯之得三卷以示馮君孟顓孟顓更取舒莘橋先生浩所編以示余余勘比之補詩三首和石尉早梅詩蘇軾詩文一首謝公詩更補附錄四則全謝山巖堂記墨莊漫錄餘則大致同也因刻之嶼堂有手編元豐聖訓三卷今既不可得而文集百卷僅存者千百之什一耳豈不惜哉嗚呼錦里橋頭官人巷畔豐清敏周四休陳忠肅晁景迂迭相唱和宜以湖山老矣而卒以移屯沅之洪江大星遽殞悼之者謂情殷報國而志未伸憫之者謂識昧知幾其出固可已而不已者也徽宗之時天下其尙可爲哉雖然其文采又豈可掩者哉余故曰信道才人也文士也時民國三十四年一月

石魚偶記序

余既刻楊慈湖先生詩傳二十卷先聖大訓六卷遺誓正續二十卷補編一卷煌煌鉅製已略備矣今更取石魚偶記一卷刻之何也

石魚見水經注湖海經石魚山下多石色黑而理若雲母間發一層輒有魚言其語誠者深也

蓋遺書中自卷七至卷

十六爲家記十卷凡先生論易論書論詩論春秋論禮樂論語論孝經論大學中庸論孟子諸子論治務論治道論封建論兵義理所在編者彙而著之而偶記則先生本所考據間發議論手錄於冊者也有與家記同者有與家記詳略差異者而要以家記未見者爲多人但知先生精於義理而不知先生勤於考據今讀斯記審訂所及孔壁之尙書古禮七略所錄誌於藝文者雖以康成之學說有不肯苟同至於物名之異同五行之變遷大而九式之匪頒細而三屯之定義一辨證無遺其立言尤精者如謂士大夫宜以得失利害歷陳於明主之前而引范仲淹居母喪移執政書曰固邦在乎舉縣令擇郡長又引趙師民言曰奇邪者其黨常衆方正者其徒常寡黨衆者則進易徒寡者見用難嗚呼君子小人消長之機盡之矣先生年事最高故其成就有大過人者斯書爲晚年作明白坦夷由博反約經師人師典型具在識大識小錯綜其間然則人之壽又豈可少哉原書爲二老閣刻本戊寅夏胡適之贈余於燕京爰並誌之民國三十四年一月

安晚堂詩集序

余曩讀安晚集因頗究其立身行事本末宋史極稱之至有小元祐之目甚矣阿私之爲害後世史筆之難信也當宋之世其苦外患久矣僥倖而有偏安之局亦久而後亡耳故卒與外患相終始是猶久病孱弱之軀將養之不及外邪時復侵之遂漸入於膏肓矣試觀寧理之世尙成何國

家又奚論寧理以後種孽於數十百年之前一旦潰壞於今日今之枋國者乃不幸而代前人盡受其過此余于安晚猶有可原書板幾燬勿復存者也近復取其詩讀之頗怪漁洋竟施多禪語之論或又謂其近似香山其實皆未有得於安晚也夫詩之爲學虞書十二言盡之矣然在後世久已析爲二派顧讀其人之詩卽其人之志行十可八九得則不誣也漁洋推近世詩宗然其工力悉耗在詞中依永和聲黍米不失卽其思與志終不能不爲所屈矣夫僅託於言志固往往失其爲詩徒耗工力於詞中卽亦失其所以爲詩之誼然則如漁洋者其弗能有得於安晚之詩也固宜至如香山其與安晚亦爲異曲所遭之時與地固弗同也雖然安晚亦嘗耗其工力於詞中焉今其詩猶有約略可窺見者徒以雅善蘊藉務使人以難窺卽其立身行事亦多用此術觀其相業可知焉已今校其詩刊之并揭發其心志之可窺稍論著之俾後之人有攷焉民國二十六年十月

梅讀稿序

梅讀先生姓楊氏諱自懲鄞人也以洪武二十八年乙亥生景泰二年辛未卒春秋五十有七父諱範字九疇世稱栖芸先生潛心理學遠宗慈湖東發近與黃南山李孝謙以道誼相契通易詩書三經爲文操筆立就醇古爾雅生子三先生其長也年十六爲童子師西塾韻語一詩卽十六歲作也聖學之源流傳述之緒統言之歷歷無毫髮差此豈尋常能及哉蓋先生之志固在推所學以覆庇斯民乃官止倉副一攝縣令仕旣齟齬志不得伸然處事以禮爲主禍福委諸命橫逆至往往自反居困不見有憂色視人之急如己之急而施與弗吝也嘗舉呂氏鄉約故事月一行

之其治獄也每求其生而不可得則哀矜之故稱爲楊佛夫以先生之爲人道積厥躬知勉諸己而已天爵之修人爵從之天爵修矣人爵之得不得於先生無與也乃不於其身而於其子孫天道不彰彰哉斯稿十卷自卷一至卷八詩也卷九卷十文也附錄五卷贈言也而神道碑則其子守陞作也子守陳卽鏡川先生諡文懿守陞卽碧川先生斯稿爲碧川編輯謂之梅讀稿者嘗於梅下翫易云先生詩文多不留稿此存什一於千百者耳而淵然之光發越已如此是爲可聽其泯泯乎余先刻文懿碧川二集今得此更刻之君子之澤遠矣民國三十四年一月

白嶽游稿序

黃山白嶽並峙黟婺明嘉靖壬辰世宗錫白嶽名曰齊雲山然高不及武當十之二袤不及雁蕩十之三而怪石奇峰刻畫肖形甲於宇內游者始入率以白嶽高至桃源則白嶽已在其下至車洪則桃源又下至齊雲則車洪益下顧余一登黃山而未訪白嶽黃山之勝皆其天然者也有三十六峰三十六源二十四溪十二洞八大巖昔人有詩曰人間有石皆奴僕天下無山可弟兄誠非虛語今讀沈嘉則白嶽游稿蓋嘉靖癸亥與吳原柏守淮唱和詩也且冠以記其詠歌所及者若太素宮飛雨樓棚梅庵石橋院紫霄樓五老亭望仙亭皆人造者也而余欲訪黃山之古迹則一無存者蓋剗削消磨於兵戈也久矣樓臺亭閣有時而盡山水溪壑歷久長留況人生數十春秋境有所牽逝焉不覺雖有佳山水其許我心心滌魄者乃偶然耳多難登臨古今致慨人無徒觀其變而觀其不變焉則游者之理悵矣抑程篁墩游齊雲記有云淳祐辛酉大雷雨裂石壞屋而玄武神像歸然獨存然則石可裂屋可壞而惟此山靈所鍾有不可泯滅者天之高地之厚雖

大雷雨其又何害時豪於詩者吳門王伯穀松陵王承父與嘉則而三嘉則有四明山記黃粟洲採錄於四明山志豐對樓詩選四千餘首有萬曆丙申刻本今更刊斯稿因誌感云民國二十六年十一月

攝生衆妙方序

攝生衆妙方十一卷明張尙書時徹所輯錄也說者謂中國醫藥始神農書闕莫能考詳或託名黃帝者僞耳周禮食疾瘍獸獸列四醫并總于醫師其法今亦不具漢以來醫藥載籍不少概見張氏仲景實最爲高至著錄方劑備急者則始于晉葛氏洪洪方八卷而唐孫氏思邈復有千金要方翼方之著翼方九十卷今張氏書亦此類也近自西方醫術入中國葺乃競言衛生中國醫書以衛生名者古亦有之衛生方三卷而孔子尤重衛生伯牛病癩不入其室沽酒市脯魚餒肉敗色惡臭惡失飪不時皆不食季康子餽藥未達不敢嘗釋者曰未達云者謂未達醫理也夫以孔子之聖飲食必謹醫理必達皆所以衛生也雖未達于康子之餽藥而審病癩之不可以入室則其究之也素矣列子注芟苴草可以療癩淮南韓詩并及焉則亦審物辨性之效也飲食不謹恆人之情故食醫首列于周官而聖人必謹夫飲食溺于所好而疾病乘之猝發而不可治下縣荒邨不得良醫備急之方乃往往有救而時驗焉則此書也比於葛孫二家之衆豈無助於衛生哉然未達於斯則亦不可苟試世有究極斯道者宜必有擇於斯與刊而布之以應世需并著衛生之說以廣其義云民國二十三年十月

徐徐集序

徐徐集者象山王參政挺作也父諱渙倡理學士多向化參政復擇其俊者時爲鼓勵鄉風爲之丕變生平博覽羣書過目輒成誦爲文閎肆豪邁詩更精詣有漢唐風從涇陽呂柟後渠崔銑游壹意反約爲躬行實踐之學復與羅洪先鄒守益趙時春諸人論辨往復力闡致良知之旨當參議江右嘗建王陽明祠正孫忠烈燧許忠節達位暇則單車過白鹿洞進諸生講學自少有大志廷對萬餘言觀政禮部抗疏論事凡六端悉中肯綮及司營繕尤以省國用恤民力爲要歸以山東副使備兵徐州開屯糧謹軍堡釐定賦役造東郭浮橋決碭山水懿沛縣城修學宮置東西兩館養文武士理閒田爲廩餼民安居樂業遂有江南富庶之風此集爲備兵徐州時所作詩文也凡六卷余得諸坊間爲明刻本無序跋象山志錄參政著述凡三種曰涉江集曰同野遺稿曰雜著均無卷數鄭寒村同野論學要語序謂集十六卷存者四卷似未見此今讀之卽景生情實事求是藹然仁者之言非徒以文藻勝者也然卽以文藻論亦豈多讓哉因重刻而敘之刻既竣更得毅齋侍郎家乘實與徐徐集同刻者毅齋子七人參政其仲也因並誌焉民國三十一年十月

徐徐集序

此爲第一首
今並存之

王挺字子長又字同野渙三子也登嘉靖三年進士觀政禮部以六事抗疏辭任兵科給事中江西左參議督糧儲轉山東副使備兵徐州遷湖廣參政忤巡按御史被劾免官所著徐徐集二卷兵備徐州時作余得自坊間爲明刻本喜其文閎肆詩雅贍志傳所稱非虛譽也因重刻之而爲序曰象山王氏世講學不尙空談子長之兄梈嘗上書議建城其後倭蹂躪始有備象邑之有城梈發之也子長之備兵徐州也造東郭浮橋決碭山水懿沛縣城大修學宮置東西

兩館養文武士理閒田數頃爲廩餼教養兼施值山東妖賊作亂會諸道兵合擊之賊遂投首更有巨賊爲民患入其巢殲其渠而餘黨遂散其才有大過人者夫才本於學其所從游若呂涇陽崔後渠其與往來若羅念菴鄭東廓趙浚谷張甬川萬鹿園皆一時大儒而守姚江之緒言爲良知之學者尤所深契宜其晚年見道益精雖饘粥不繼宴如也今讀其文如與同軒賦末段所云無終爲主有盡爲客身病可瘳心病難祛非知道者而何其城市記云徐沛固唐之汴榮也其俗輕轉徙而狎逋逃其氣崇任俠而略儒雅其計賤本業而貴末作饑饉泛濫歲有加焉所狎逋逃者或當時有爲而言然略儒雅貴末作相沿數百年余曩備位蘇省蓋觀其風俗猶有蹈其弊囚者焉無怪江北荒蕪貧困終不如江南勤儉富庶也今天下多故矣城池不足恃道路橋梁舉昔之所經營皆得傾蕩於俄頃有形之變舍敗壞惟恐不足然無形之變舍吾知其愈毀而愈堅彼則外驕我則內忍易之道羣陰盡剝而後爲復也先儒云學莫先於立志又曰其志戚讀彭東華山書院兩記尤感慨係之矣刻旣竣因序而論之民國二十六年十月

碑帖紀證序

范子宣氏所著臥雲山房遺稿灌園叢談集古印譜余均未見碑帖紀證一卷爲羅叔韞得楊龍石手寫本愛其博洽印以行世者也而藝文志未及焉子宣爲東明少司馬之猶子少司馬喜藏書起天一閣購海內異本列爲四部兼藏碑帖故書目與碑目並著於後子宣旣酷嗜鈔書尤愛法書名畫自唐宋以來名蹟及異國人所作怪雅畢集家藏搨本尤夥築室西郊緡經閱史品畫

評書者垂二十年其蓄書與少司馬各不相謀余讀紀證一編於唐明州刺史裴公紀德頌曰仲父有舊捐惜不全於唐千祿書曰仲父得之董文行者頗舊於英光帖曰豐存叔購得袁柳莊家全部今止一冊歸於仲父東明先生凡稱仲父者三恭而有禮志傳云借觀不時應拂然不惜重值購得之知爲天一閣所未有輒具酒茗迎少司馬至家而少司馬取閱之默然而去以風雅之韻事而謂大小阮局量之隘如此則言者過也抑范氏書帖多得於豐氏斯編於豐存叔物一再誌之今天一閣之僅存者豐氏碑刻尙多石之磨滅也難而物固聚久而無不散也則斯編之刊與書目碑目庶益多聞而已民國二十六年十月

甬上高僧詩序

昔李杲堂選甬上耆舊詩有其人而後有其詩詩固以人重矣其選高僧詩何莫不然甬上高僧古今可錄者豈僅二十一人哉詩以言志惟此二十一人之志與杲堂合梁公狄所謂逢其知音千載其一者蓋雖方外吾不能外之否則非方外吾亦將外之矣吾何以知之吾於杲堂引大慧禪師之言而知之大慧曰予雖學佛者然愛君愛國之心與忠義士大夫等杲堂生際鼎革目斷蒼旻聲沈碧蘿傷心於冥感之無路者久矣彼釋門諸公有與張魏公張橫浦謝晦髮鄭思肖方正學王潤伯輩遙相合者固宜尊之敬之而詞家推爲宿老文法並稱名士春雲起空秋月映水其亦足多也矣昔姚石甫序黃香石詩曰人之一身有天地民物之事至沒世而獨稱其文章未矣乃又徒稱其詩抑又末然李杜白陸竟以詩人震耀今古吾謂此二十一人者方外之李杜白陸也余喜吟中峰詩有句云香巖不作蠶雲死徒有是非喧兩耳又云掃除自己閒枝葉不打諸

方爛萬藤帆飽固知風有力柁寬方覺水無情皆見道之作雖然靈雲不死是非必辨葛藤不打枝葉猶存欲收吾帆而風愈緊雖寬吾柁水終無情質諸中峰其將百不知耶其何以就手揭開耶老宿清無侶紅葉滿霜天搔首躊躇豈所謂寒月明如此浮雲掩不妨耶重刻甬上高僧詩二卷既竣因書所懷如此民國二十六年十月

四明文徵序

柳柳州曰左右史混久矣壽鏞曰文與獻混亦久朱子曰文典籍也獻賢也馬貴與作文獻通考廣之曰凡敘事則本之經史而參之以歷代會史以及百家傳記之書所謂文也凡一話一言可以訂典故之得失證史傳之是非所謂獻也顧如馬氏解則文與獻亦混古者獻憲二字同音通用爾雅釋詁憲法也釋訓憲憲洩洩制也文獻二字簡言之文章制度也袁陶軒先生精鄭氏學尤留意鄉邦文獻因編四明文徵四明獻徵二書徵從微省從王自微而之著中庸所謂無徵不信是也獻徵吾未見以意度之其敘述一鄉典章制度無疑矣文徵則文章也然文章必有可以訂典故者始錄之徵者證也或曰成也亦曰明也成與明皆自微而之著之義也斯選自唐立國以迄清乾隆一千二百六十四年間四明人文彬彬郁郁其大者則興學校講水利修公宇建橋梁忠臣孝子之芳型義士烈婦之大節或記或傳或碑銘以立政教以美風俗莫不具焉其小者則升高能賦山川能說一事之細一物之微三雅五經頗霑滴瀝與夫朋儕之酬贈著述之淵源破天地之悶煩宣古今之鬱塞或賦或序或論說以及雜文理勝詞勝各擅所長而要以大道爲歸宿非有苟焉者也馮君孟顓釐訂爲十六卷凡文三百七十九首壽鏞既付諸梓因言其概且

辨文獻之不可混者如此抑考四明文獻明鄭千之輯王伯厚四明文獻集所自出也原彙藏吳興適園張氏四明文獻錄明李孝謙輯乾道圖經所藉以存者也舊藏抱經樓盧氏四明文獻集清盧青崖輯凡一百四十卷原彙藏吳興嘉業堂劉氏壽鏞得之皆錄副焉鄭氏四明文獻已以活字本印行斯編傳鈔者爲吾鄞湯君鴻九亦吾友也然非孟顥詳審視爲可貴又孰從而傳之嗚呼四明詩萃一百卷作者二千餘人先生輯也壽鏞僅得其初彙三十卷刻者爲鄭氏佚書讀詩偶記瞻衮堂集四明近體樂府袁氏家乘與此凡六種它則存亡不可知矣民國二十七年四月

周季編略序

春秋始周平王四十九年己未終敬王三十九年庚申凡二百四十二年左氏傳春秋至魯哀公

二十七年實後庚申十三年周貞定王元年癸酉也左傳之未及及悼之四年則爲貞定王五年矣齊次風歷代帝王年表以左傳於貞定王六年六月五之誤呂氏

兼大事記本左傳及稽古錄作貞定王五年是也然左氏紀年以癸酉爲國語迄於周元王七年壬申實先癸酉一年見歷代帝王年表

戰國策則始於貞定王十六年戊子又後癸酉十五年司馬溫公作通鑑始於周威烈王二十

三年戊寅上距春秋獲麟七十八年而去癸酉六十四年世謂通鑑闕六十四年之事者是也三

會注通鑑上距春秋獲麟七十八年是也又云左傳於周元王七年癸酉往者壽鏞讀劉知幾史通其述左傳家

曰孔子云沒經傳不作於時文籍唯有戰國策及太史公書而已至晉著作郎魯國樂資乃追采

二史撰爲春秋後傳其始以周貞王續前傳魯哀公後至赧王入秦又以秦文王繼周終於二世

之滅合成三十卷考唐藝文志有樂資春秋後傳三十卷隋志三十一卷水經注亦引春秋後傳

今其書不得見矣定海黃薇香先生少愛國策之文及長復合史記校訂其字句之異同因合史記年表本紀世家考其得失復參以司馬通鑑及稽古錄呂氏大事記及解題與朱趙綱目諸書哀集二百四十八年之事曰周季編略九卷自貞王始且自注曰貞王名介史記稱定王與定王瑜同諡沿國語之譌也後儒從皇甫謐說稱貞定王參合世本史記而臆造之今從國語韋注司馬貞索隱稱貞王云顧先生初未引劉知幾之說晉有樂資春秋後傳實始貞王古今人之相見豈異也樂氏之書既不可得然以赧王入秦以後繼之以秦文王一事觀之則尙有味於史例也赧王以西周地入秦歲在乙巳東周君猶在也至壬子爲秦所滅周三十八王八百七十四年以萬季野紀元彙考所錄爲最正周之統亡於壬子非亡於乙巳也七國自癸丑起所謂凡二十八年無天子是也通鑑表九國自丙午起稽古錄謂三十六王八百六十七歲而東周君不與焉綱目非朱子手編書也其失同之今黃氏敍列國亦自丙午始蓋襲其例耳謂宜自丙午至壬子大書東周君某年旁注某國某君某年癸丑以後無正統乃書列國史例然也抑考溫公作通鑑劉道原嘗辟實史局請於溫公曰公之書不始於上古或堯舜何也公曰周平王以來事包春秋孔子之經不可損益曰曷不始於獲麟曰經不可續也見劉知幾外紀引是司馬氏不敢續經之意彰彰明矣然則呂氏大事記始於周敬王三十九年則又何說善鏞敢釋之曰通鑑與記與錄不同東萊大事記私人就其事而記之雖稽古錄其後上其書於朝亦私人著述也道原通鑑外紀亦類是且其始魏趙韓分晉也曰非三晉之壞禮乃天子自壞之也天下以智力相雄長社稷無不泯絕生民之類靡滅幾盡豈不哀哉其託始之意微矣萬氏之作周季編略也既怪戰國策史記所載貞

考威安烈顯慎報之故實善言善行之足法者少不善之足鑒者多繼而汜覽周末及秦諸子之書始信周之衰老師大儒猶在唐韓子之言爲不誣網羅放失之文搜尋遺佚之士將使周季之衰猶見周德之盛其薄智力而軫生民哀天下之無王與溫公之意一也嗚呼智力之相雄長於今極矣安得起其衰而復其盛是尤望於老師大儒矣書鋪既重刻斯編因縱論之民國二十七年四月

徐偃王志序

典午之世有徐偃王志作者何人無可攷而其書亦亡唐韓愈作徐偃王廟碑以爲天於柏翳之緒非偏有厚薄施仁與暴之報自然異也於是天下始知偃王之行仁義子孫繁盛而其事蹟則往往未之詳焉鄭藝文志錄徐偃王志六卷爲徐柳泉先生作余欲求之不可得一日其猶子正遠袖是志示余余大喜過望乃盡半月之力爲之讐校由此益知偃王之終始而春秋時之徐有三未可訖言之也昔羅氏泌撰路史多據讖緯以說皇古本不足信卽以徐事論因水經注之誤而造徐調之名因宋康之誤而造徐康之諡因史記之誤而造徐姬之姓志中一一辨證其尤可貴者也夫古今無不亡之國暴戾眦睚視人民如草芥雖存亦亡修德行仁棄土地如敝屣雖亡亦存朱氏緒曾曰偃王避楚之鋒不忍關其民其後嗣守土不絕迄今數千年芊姓無聞而徐氏繁衍此大昌黎之說也然則有國有家者可以鑒矣志分爲六曰記事上曰記事下曰世系曰地理曰冢廟曰論說凡經傳子史預斯有益悉鈔內論辨尤必折衷至當非良史才能如是乎昔在明初有朱伯賢右者

見續修四庫全書

嘗著邾世家一書雜采春秋三傳爲之朱爲邾後孝子慈孫不忘

所有其意一也正遠鄭重遺稿保持弗失使余得校而刻之不亦重可敬歟民國三十四年一月
鄉謄證古序

古之時遺輶軒使者求方言還奏籍之藏於祕室及藏秦焚餘缺有閒矣然揚雄猶得依之爲方言服虔亦復據之造通俗文二書尙已顧俗閒行語衆所共傳積非習貫莫能原察將欲考證流俗之過謬而綜該事宜於義理莫如應劭之風俗通義蓋其書大而三皇五帝三王五伯六國細而五私四瀆林麓京陵邱墟阜培藪澤沈沛湖陂渠溝洫無一不證之於古述作之功豈淺尠哉戴表元曰後之君子平居侈然論古先王之道若不足爲而問之以目睫之事於其所服食於其所居處於其所游衍肄習有日與之接而不知其名義者焉是亦應氏所謂畫鬼魅易畫犬馬難俗語雖云浮淺然賢愚所共咨論有似犬馬其爲難矣吾鄭陳鈞堂先生以博洽聞於世著作等身鄉謄證古一書稿藏於家未定也壬午之秋其孫宗勛屬蔣鏞編次受而讀之洵哉應通之遺也四明爲文獻之邦風俗最近於古就引證之大者而言受用見於周官禮物見於尙書仍舊見於論語一撮見於中庸發財見於大學生活及狼籍見於孟子不中用見於禮之王制不敢當見於儀禮之士相見禮條條秩秩及獎之爲駟見於爾雅利之爲略見之於詩此徵之於經者也比較本於國語張羅本於戰國策當家及有何面目一字直千金本於史記不能殫本於漢書相煩本於後漢書要言不煩本於三國志金口難開本於晉書談吐及厚面皮本於南史千里眼本於北史其本於唐以後正史雜史者尤夥此徵之於史者也明白傳於老子諡病見笑不近人情傳於莊子朝三暮四變萬化及貧者士之常傳於列子不知甘苦傳於墨子能說不能行傳

於荀子吹毛求疵遠水不救近火傳於韓非子端端正正傳於鵬冠子四通八達傳於子華子一定不易傳於淮南子對牛彈琴傳於牟子其它見於漢以後諸子者亦多此徵之於子者也若百家之文不可殫述矣而先生皆一一證之吾鄉風俗之厚不由是益顯乎哉壽鏞校其原稿遂錄一再而體例則或將以類編或將以韻編題綴於書楣而莫之決也壽鏞何人敢握槩而苟且從事乎思之思之類不宜繁訓當歸一應通別爲十卷爾雅分爲十七類爰就原稿按部就班分條繫件取應氏爾雅闕麗之論卽從爾雅之類以合漢儒比誼會意之指聊便檢查云爾未敢謂當也抑攷光緒年間重修鄞鎮二志先生皆預其事方言一門悉本斯稿然甄采過簡矣今就二志而廣之凡合於鄉諺者入焉其不合鄉諺者姑舍焉蓋搜之取其富擇之取其精固先生未定稿之意也繁簡得宜庶有合於先生實事求是之雅志乎先生之歿於今五十有五年念先君子之事先生不啻李漢之於昌黎今及於予小子既表先生之墓復得於舊雨草堂叢書之中讎校其著述之一部而土物愛厥心誠之思南豐瓣香遙拜靡已亦聊以體先志也宗劬繩其祖武守闕抱殘所以督促壽鏞者尤摯非賢子孫能若是哉編旣竟僭書於端民國三十三年五月

容膝軒詩文集序

王友萊先生父執也壽鏞自弱冠時望見顏色而以未能親炙其道德文章爲憾雖然嘗聞諸先君子矣先君子曰吾儕好學無有如友萊者友萊能拒人之所不肯拒能受人之所不能受性好靜豪華之地固避之若浼卽相得之師友同居一城一年半年有欲相見輒不可得者蓋閒冷然也今數十年後得讀其文乃適如其人其自論文曰性拘而多畏不敢爲過高之言非力之所及

也不敢爲過刻之言非心之所安也不敢爲藻繪之言懼意之晦而不明也不敢爲虛誣之言懼人之疑而不信也夫先生之所述悉中今日學者之弊故先生之文典雅詳贍而一歸於清正且以文傳人以人傳事以爲文非虛作則萬季野之用心也嘉道以後慈谿鄭氏喬遷或可與匹他無能及也以其學言泛覽於經史百家尤精於漢書既補注之而心以爲未足然已行世矣其於鄉先生之賢尤拳拳思有以網羅之卽如曹放齋詩說嘗先壽鏞而輯之矣沈端憲家集五卷嘗惜其書之不傳僅得其規友人詩云爲學未能識向背讀書萬卷終亡羊已大可見師門宗旨而壽鏞幸輯有定川遺書倘亦先生之志乎嗚呼聞道有早暮壽鏞何人何敢言聞道而先生之聞道先於壽鏞者乃得承其緒焉不大幸乎哉林君滌菴先生快壻也壽鏞以斯文如星辰日月宜常照耀於世於是滌菴會合親朋肩其任傾資十萬以上重刻之是足慰先生於九原已時民國三十四年五月十一日

味吾廬臆稿序

國家取士多途在貫澈其真意自唐以降不由進士者謂之白衣公卿士類之重可知也清沿明制科舉相仍薦於鄉試於禮部然後用於朝迴翔十餘年資既深而望始重然後顯其位得之若斯之難也而說者曰求人才於詩賦經義所得幾何況復限之以資格奇材異能將何以奮焉嗚呼有清一代循良之吏骨鯁之臣擇疆圉平大難者出於科舉多矣若以資格言資格又何能限人才名曰資格而巧取豪奪者亦衆豈尙得謂資格用人乎吾師江亭英先生文學聞於時年十七爲弟子員二十八中副車三十一舉於鄉三十九成進士官刑部主事五十五選授江西永新

縣知縣五十六蒞任五十七調省五十八以疾卒於家余悲先生之遇而歎國家之待士何薄也夫一舉再舉始成進士積歲月已閱二十二年自通籍以至改外又歷十六年以天子之命吏十月繳憑到省至次年八月始檄赴任晚清疆吏之權威已可概見履任甫十月廉循之吏遽奪於異己之口此誠何說也雖然爲吏以長子孫吾知非先生之志久矣先生忠厚君子也天將厚報之故假於異己之口而使去之速而先生卒能順天之意浩然而歸如棄敝屣曾不依違其間非所謂積仁潔行者耶味吾廬者先生取莊子故吾新吾之說而亦陶淵明吾亦愛吾廬意也今讀其儘存之詩文寥寥五十六篇首以集陶詩而先生生平之志見矣有清之變莫大於甲午莫甚於庚子甲午之變先生居京庚子之變則在毋喪之中壬寅服闋適在拳亂之後與王友萊侍讀住返醇唱借足痛之什至十疊其韻不特抒寫衷腸而工部忠愛於斯寓焉當是時也東關大啓滿目凋殘感薄俸之閒曹勸兒輩以敦儉旅懷悵觸皆寄於詩輓友之章尤不苟作若論其文則祭葬趙太夫人二篇不啻永叔之表瀧岡也憶先君子之沒包蕉舫先生輓之曰二十年拙宦沈淪而先生更哭以詩今衡先生之出處實有同於先君子者特先君子未屈於疆吏耳蓋先生年三十九始通籍而先君子之通籍年亦三十七矣先生之沒年五十八而先君子指館年僅五十六也天之厄之者豈也異然先君子之著述如困學紀聞補注寸草廬奏稿及小謨觴館文集注與編輯之寸草廬贈言雖以壽鏞之不肖已次第刊之而先生所僅存之詩文伯子覺齋獨能蒐輯殘賸彙爲二卷更輯贈言及僉載爲一卷使壽鏞得以編次暨校縱區區者不足盡先生之學問而真性情流露於字裏行間者已於是得之然則厄於此而伸於彼者壽鏞與覺齋益當交勉

矣善鏞既草先生家傳固知無當於萬一今更序之如此以誌感焉時民國三十三年七月

峽源集序

先君子受業於毛谿芷先生

諱瑗字成實行年百有八石門義塾

先生丙戌赴春試余小子猶得見於燕邸陳鈞堂先

生所謂古心古貌經師人師者也

見附錄

生子二价臣爲仲實長余七歲自余乙未館甥於蔡氏

嘗過墨海樓時叔外舅萊青先生內弟月笙已下世月笙之嗣子琴孫年方十一歲其教師則价臣也於是相與往返然其行聲居余先事之在師友之間凡六七年歲在辛丑壬寅之交以萍課演算屬爲印刷萍課者江西萍鄉書院所課也演算者演課題未作之算題也自是書出而吾鄉嗜人之學莫不推价臣矣然性孤僻不諧於俗書齋應王陽明客座私祝非同志不與接談案上雜陳經史子集及算書錯然也獨余往則留之久且爲購置林香溥竹相山房叢書曰欲攷古史宜於此取資焉余知其聞之博其心之細其好學之甚願未知其能忍也能求適於時也洎乙未夏秋間吾郡議改書院爲學堂萍鄉喻太守兆蕃主持於上張蹇叟與余呼應於下一時同輩咸思撥雲霧而見天日而价臣奔走最力至臥不貽席病而出淚雖幾經震撼卒底於成往還函牘今猶在也其後相遇於江天輪上縱談往事猶嘆我兩人當日愚癡嗚呼王右仲有言人盡愚也天下治矣愚又豈可少也哉晚歲彙筆春申鬱鬱不得志以此而歿年僅四十五也余欲求其遺著輒不可得一日琴孫以其子所藏峽源集一卷亦曰鶴蘆詩鈔攜以示余詩始於乙酉終於乙巳凡二十一年蓋其手訂者也包蕉舫陳懋夫二先生序之余讀之誠如懋夫志墓之文所謂假途於昌谷玉川以漸入浣花之室者矣況如書癸巳十一月朔事記余使君廟之結規實爲吾鄉

之奇災得此可備志乘之採錄余因刻而傳之不僅傳其詩亦傳其人也而吾兩人死往之交且於見矣民國三十四年四月

四明叢書第九第十集擬目

嚴氏詩緝補義八卷 清劉學

周官辨非二卷 清萬斯大

攷工記圖紀二卷 明屠本峻

篆法偏旁點畫辨一卷 元應在

釋篆法辨一卷 元應在

三音均部略詩音譜略音攝攷略切音譜略四卷 清黃式三

六書辨要二卷 清湯容燾

前漢書隨筆二十卷 清其鑑

刪定晉書校記二卷 清金祖益

明小紀 清林時美

日本攷略一卷 明薛俊

今古輿地圖三卷 明沈鳳舉

浙東山水簿目 清龍鑄

尊行日記鈔 清姜用璋

四明經籍志五卷 張壽徵輯

四明經籍提要甲集十卷 夏啟瑜

子思子二卷 清黃以周

令貽堂家告 清陳康祺

南湖隨筆一卷 清陳英譜

硯箋四卷 宋高似孫

宋本樓鑰攻媿集校記 趙萬里

滋泉文選 明周性道

湛園未刊稿一卷 清姜宸英

批校鮎埼亭集札記 清楊鳳苞

敝居雜著八卷 清黃式山

四明風雅四卷 明戴埴

歸田老人詩話五卷 清盧蔭年

右目爲他日便於採取列此增損他日刻時定之

75 11 13 15 17 19 21 23 25



1 1 1 1

約園雜著二編卷七

雜文

今古輿地圖序

今古輿地圖三卷明崇禎十一年十月鄧沈鳳舉進呈之書也攷錢遵王讀書敏求記有古今輿地圖二卷注云述古目作歷代輿地圖卷數同又云也是圖目作三卷卽此本分上中下三卷是也遵王所見非全書豈惟非全書其云起帝嚳九州至元末羣雄是經顛倒割裂之後因以今古作古今而遵王未之審也至四庫存目題曰今古輿地圖名則是矣而云此起元末羣雄至帝嚳九州爲小異又云蓋此書本無卷數曾所藏蓋以篇頁稍繁分爲二冊故以二卷著錄仍是想當然之詞耳抑知原書固起自今古華夷區域總要圖次以大明肇造圖再次以大明萬世一統圖更次以九邊圖然後及於帝嚳九州圖以迄元末羣雄圖乎因忌諱而埋沒作者之姓名割裂其輿圖於今幾三百年矣殊可慨也鳳舉之名雖不見於寧鄞郡縣志卽選舉表副榜亦竟漏列然其父九疇爲萬曆五年進士鄧志固有傳也九疇之子鳳超字可凡萬曆四十一年進士亦見附傳張懋忠序云余友明州沈伯子定之氏究心經世起而脩輯之旣曰伯子則鳳超之兄也向無是圖之傳天下後世安知有沈定之其人哉是圖藏於平湖守先閣曩者金君錢孫借諸葛君詞蔚展轉眎余且疑李申耆之沿革圖或取於此余藏書中適有所謂東坡指掌圖爰取是編對勘北宋以前多就原文點竄而成南宋以後別爲攷輯進呈表云半本蘇文忠指掌遺文固非獵美

者比也然則沈取諸指掌圖李或取諸沈與余謀梓入四明叢書而原圖不易縮小未果也因景寫一部將此冊返葛氏不幸詞蔚基木久拱守先閣之書多付劫而是編獨存豈非天乎詠哉
吉其寶諸庚辰孟秋

附錄金錢孫跋

縣中守先閣葛氏藏書余屢從稚威借讀乙部殆將徧此其一也撰人沈鳳舉明州人明季副榜貢生書入四庫存目提要云不知撰人又未見明代專圖謂名爲今古輿圖以今冠古上胡有古而無今蓋進書時因有忌諱撤去序表及首二三圖館中未覩其全也後來李申耆氏圖歷代沿革似頗有取於是書圖皆開方後勝於前亦以彌提要所不滿吾友張君約園搜羅鄉州著述屬余借觀明人著書多空言沈君專長輿地貫串諸史實事求是明人所甚罕乃書既未顯名亦甚晦清儒治輿地學者都未之及余尤念借此書時稚威固無恙借余上閣觀書以爲尋常事忽忽數年間不勝死生盛衰之感書存佚不可預測遑論顯晦耶約園初欲刻入四明叢書慮遂寫失真遲迴久之乃付景印天壤閒讀是書者當共重之但惜稚威不見及也
吉屬書後庚辰十月金兆蕃記

詩史初稿序

詩何爲而作也感發懲創而已矣三百十一篇中美者少而刺者衆非以亂日多乎亂而思治天心然人心亦然也然天心實本于人心四始肇于文王夫文王固生于紂之世也江漢汝墳豈別有天地哉天不改其爲天地不改其爲地爲之者人也今嘵嘵曰古之人古之人古亦人也今亦

人也紂亦人也文王亦人也紂不能合乎天而文王能之于是天人應矣詩者求天人之應者也其時則皆周也雖商頌亦得之于周之時也有二南爲武王巡守采于周召之地正小大雅定之于周公周頌亦周公成于成王之時故雅止於成王而頌止於武王也西周有變風而東周無變雅蓋雅止于幽王故曰詩亡雅亡也孔子自衛反魯然後樂正雅頌各得其所樂正爲一事雅頌得所爲一事得所云者定其次第也魯頌商頌孔子錄之於史者也語云成康沒而頌聲寢康王之時非無頌也但未登之於史耳蓋正小大雅周公定之于先孔子釐之于後周頌周公成之于先孔子正之于後變雅變風則孔子所刪定者也刪定云者去泰去甚而已非如司馬子長所謂三千存三百也詩以世爲次同一世爲則以類從天保以上治內采薇以下治外是也其有顛倒者簡冊爛耳如清人之詩之類是也序之作者其聖人之徒歟然非得諸國史雖聖人不能作也程子曰國史得詩必載其事然後其義可知今小序之首是也其下則說詩之詞也故程子又曰學詩而不求序猶欲入室而不由戶也斯言信矣若夫詩之登爲樂也詩之所至樂亦至焉詩先而樂後也且非凡詩皆可登爲樂也四始首於文王攷文王之生歲在祖甲二十八祀之庚寅以迄周定王二十一年之乙亥凡歷商百九年歷西周三百五十二年東周一百八十五年都六百四十六年其間政治之得失風俗之盛衰皆可于詩見之發乎情止乎禮義而感發懲創固在人之自體之而自爲之耳我生不辰逢天殛怒瞻彼中林羶夢以痒爰本孟子誦詩讀書知人論世之意採取記傳徵諸序言竭五載之力編成詩史十六卷名曰詩史初稿別著凡例自爲準繩假我數年徐待修正嗚呼嗶嗶背憎職競由人憂心愈愈是以有悔安得周召復生佐輔文王凡民

有畏匍匐救之乎展矣君子實勞我心矣民國三十一年三月

史學大綱序

古常不適於今而今常有合於古去今而泥古舍古而徇今今與古交相戰久矣忠質文之遞嬗公天下而家天下天下而復公天下其遷變更莫可遏也況大瀛海環其外人民禽獸莫相通者今皆舉而通之赤縣神州如之者已六中國既不得自豪其政教風俗又往往各爭所長遠不必言即取近百年中變幻風雲翻覆天地其報告於吾人者事勢且常如此然而以心代天意以口代天言以手代天工以身代天事人之爲人古今中外則一也天下者天下之天下也人人與有責焉人猶是也國猶是也能治其國則強不能治其國則弱治國之方不一綜厥大端曰政治曰社會曰外交曰教育曰經濟曰財政曰農曰工商揆之以地理貫之以學術如斯而已布在方策散於紀傳善者可法不善者可戒人病不求耳幸而有求之者又其識或不足其學或有所偏故僅得其類似而莫能施之宜也夫時變叢矣應變本難史者皆往跡也居今日之變守往跡之常豈足以應之若一切舍棄於其間而惟吾心所欲爲悍然與古昔相抗既納鑿不能入僞逮世界之大勢不就病之所在而藥之區區執古方以求療則醫失其道其何能瘳余爲此懼爰於經學大綱演講既竣更及史學大綱上有唐虞三代下及秦漢三國晉南北朝隋唐五代宋元明凡史之源流與夫史之所垂可法可戒者撮其大要分別部居以古衡今爲十四講間爲表以著其實蹟且抒己見辭取質實不加修飾隨所得而論焉時勢萬變今日之所言或不適於明日況閉門造車烏能求其合轍乎亦玩其意可也癸未秋

諸子大綱序

上古官皆世守各以其學施之於政沿襲既久又各出其所以救一時之窮而收其效所謂猶水火相滅亦相生也當周之始周公以禮太公以法於是齊魯之政殊焉周公之後承其禮者孔子也太公而後承其法者管子也孔子之仁管子仁其法也孟子之卑管子卑其以霸而不以王也然讀詩至匪風下泉匪風思王下泉思霸霸何足思懷歎苞糗至不得食郇伯而在吾知免乎以是觀之凡足以救民者惟擇務而從事焉可矣況道家之法自然本於黃帝順天地之紀墨家之言兼愛發於諸侯之互相攻奪陰陽家所以授民時法家所以輔禮制名家所以正名縱橫家本行人官權事制宜雜家兼儒墨名法農家勸耕桑小說家採民謠皆足以補儒家之不足班固以爲可取者九家余謂雖小說家亦可取也孔子所謂致遠恐泥者小道對大道言凡不合於大道者致遠皆恐泥也非僅爲小說家言之也自漢定儒爲一尊董仲舒欲排斥百家而卒不可得司馬遷尊孔子列於世家且贊之曰中國言六藝者折中於夫子可謂至矣及讀其自敘引述其父談言謂儒者博而寡要作儒林傳又謂孝惠呂后時公卿皆武力有功之臣孝文時頗徵用然孝文帝本好刑名之言孝景不任儒者而竇太后又好黃老之術故諸博士具官待問未有進者余更讀班書元帝本紀謂元帝立爲太子見宣帝所用多文法吏以刑名繩下嘗從容言宜用儒生宣帝作色曰漢家自有制度本以王霸道雜之奈何純任德教用周政乎文宣爲漢賢君竇太后爲漢賢后其所好乃如此況其下焉者哉無怪由漢而唐以迄於宋雖有濂洛關閩亦徒著作垂後而已更何論明之王劉二子乎嗚呼儒家之不振也久矣然其書固在也不獨儒家之書在

也雖諸家之書可攷者亦多矣今合而論之分而別之始周初迄明末歷年二千七百六十有五人八十有三而散見者不預焉夫通天地人之謂儒今之儒者果能通天地人乎哉通天地人則卽莊子天下篇所謂天人矣神人矣聖人矣不僅所謂君子矣道術何由而裂耶道術之裂蓋係於末度而不明於本數之故也吾爲此懼敢大言曰諸子百家之說不辨則孔子之道不尊欲辨諸子百家之說亦觀其心之公與私爲一時與爲萬世而已而其要則在取所見祛所蔽凡利焉而不勝其害得焉而不勝其失者則放而絕之也固宜意有兼明志在救世政教合一適得而幾邦人君子幸以教我甲申夏

讀詩臆斷序

昔先大夫嘗詔壽鏞曰士欲通經而不識字猶航斷港絕潢以望至於海也輒誌之不敢忘願壽鏞自少誦詩則往往喜攷時代之先後政治之得失以覘風俗之醇醜而訓詁之學多忽焉一日沈君庭民以所著讀詩臆斷四卷屬爲讎校正足匡壽鏞之不逮維是屢作屢輟凡六閱月今歲暮矣幸歲厥事略貢所知持書歸之而爲敘曰詩之時義大矣哉一詩有一詩之義一時有一時之義一字有一字之義要其歸必先通一字以達於一詩以貫於一時而斷章取義者不與焉所謂齊晉鄭大夫之賦詩皆學詩非詩學也余謂治詩者如齊魯詩三家亦學詩非詩學也詩學自毛公始又所謂毛詩未立博士治毛者非以爲干祿之具故立說簡明得詩精微間有小疵無關大醇此又持平之論也

凡所謂云云皆見諸庭學詩記

自漢以來治詩者衆矣今且不論獨論清之世治毛詩者莫精於陳氏啓源之稽古編訓詁一準爾雅篇義一準小序詮釋詩旨一準毛傳而以鄭箋佐之名

物則取陸璣鳥獸草木蟲魚疏爲主其次則爲陳氏奐之傳疏蓋承稽古編之後而歷惠戴段汪丁馬胡諸家之釐訂因得擲拾舊聞蔚成大觀其或繁或簡固有待於後人之商榷耳於是陸民本其家學益伸其說許書而外兼大小徐之解凡陳氏傳疏待商者一一爲之爬梳間及作詩之時期攷證名物之異同以趨庭學詩說爲之殿其尤精者如喪如威之之威謂不能假借滅舟人之子引國語韋昭注舟人國名先祖匪人謂猶言天也神也適宜適敵之宜與公劉之宜皆訓通言宜其地之壅閉以爲溝洫也混夷駟矣謂太王事非文王事告之話言職涼善背皆左氏傳引爲證文王既勤止引陸士衡詩爲據其它粹詣不可殫述用力之勤至矣壽鏞謬輯詩史初稿遵序宗毛依譜間抒己見惴惴焉以爲未當陸民適辱有所采取滋增愧已抑讀趨庭記更敬服竹初先生以治易名家而就詩之所改正與口授者言大致在宗毛而未嘗不贊許合衆說以翼毛願取簡明耳又與馮一梅先生論詩謂序當力守不遵序則爲無題詩矣其議見超卓蓋有逾於尋常萬萬者陸民既秉之以治易更秉之以治詩宜其所造獨深也壽鏞不肖不足以承先緒而陸民乃能推闡之如此老而求學吾兩人有同心焉學無止境炳燭之明勝於無燭壽鏞今雖不逮亦豈敢多讓哉是爲序

莊子臆斷序

治經難而治子更難於治經何也治經必先識字持字義以釋經義雖其所施或有不同而合之者多治子而以字義疏之則古之訓詁皆儒家言雖爾雅亦半爲釋詩而作也以求於名法家且鑿枘不相納况道墨乎故墨子自作經而其弟子從而爲之說蓋欲明其義也道家未嘗自爲解

然注道家書者若悉以儒家之言繩之必失其立言之旨此所以治子難於治經也吾老友沈君
曉民既治易治詩更治管子所謂讀易臆斷讀詩臆斷讀管臆斷者余既爲之校而序之今更以
讀莊臆斷示余卷首且錄其尊公 竹初先生自得齋雜著一則告以治學先逐句求訓詁次定
章節三明大義不可造次因言莊子一書天下篇得其蘊蓋有序治樂之原內篇七卽闡明天下
道術七家之弊病逍遙游莊子自喻也其詳載於曉民錄中先生治莊有此心得宜曉民守而弗
失益弘其道也余於諸子獨好管墨老莊四家必以管墨之動而濟以老莊之靜以老莊之道德
而濟以管墨之事功然後可以治天下莊子與老同源異流 竹初先生一言既破其的而曉民
更取湘陰郭孟純慶藩集釋一一爲之疏解考證大而地理人物細而事跡物名與夫字之可疑
說之可商務求其邃密而不尙新奇是用力勤矣尤可貴者預斯有益悉皆鈔內而不合其旨者
寧舍而不取此又講訓詁者之所難而曉民則擇務從事焉夫豈所謂取糟粕哉亦將以明大義
耳余爲校讐竟因持原稿歸之而序之如此民國卅三年六月

謹墅文集序

陳君鈞侯余老友也年七十四卒余既爲文傳之越十年其子積樹集其遺稿曰謹墅文集十二
卷攜以示余請爲序且曰此先公所不欲示人者小子聊存手澤云爾余聆其言既悲逝者又慨
然於家有賢子孫雖沈痾至數十年之久猶得一顯其光茫爲可幸也當清德宗之中葉新舊交
訌新不敵舊荏苒以迄於亡共和建矣十五年間人各私闢有才而不能一用一二志士偶談當世
利病且掩耳走不得已絃默自甘沈淪於拙宦者何可勝數君承累代詩書孝友之後卓然有用

世之志曾莫一展其才及賢明忠勇者信之於風昔將欲親而進之而君老且病以致矣道之窮也蓋如此余嘗考吾鄉文獻自漢唐宋以迄於今樸學之士綿綿延延俾熙四賢中舒元質獨以平實著元質之學本於敝牀疏席櫛風沐雨者也當時議常平商鹽政經荒策論保長刺史守尉採而試之輒效君之學凡三變其始也功令所繫經史而外不能不涉及詞章其繼也鑒於大勢非實學無以救國於是好數術測繪冀以小試其技洎游歷西歐著德國志八卷緬甸志八卷更以平日所得者獻之於國如新疆喀什噶爾之劃界暨滇緬之訂約反還失地其猶刺史守尉於舒元質用之而輒效者歟及其後也監理貴州財政黔地陞陞周之魏檜也獨能戒重斂而圖自強在戶曹及權署必競之於綜核名實如論關稅論絲茶猶可攷其文而知之如海常關道甲斐關稅統計表猶就見於事者而得之然則君之學非所謂平實者乎今讀其詩文非有赫赫異於世而平易近人淡而彌顯則於朝章國故鄉獻家乘皆有裨焉豈與世人爭一時之名哉蓋其疏席敝牀之中櫛風沐雨之下所以成其學者非偶然矣書有之天難謀命靡常又曰天棐忱辭忱卽謀也君之名其暨曰謀君旣自信之家有賢子孫世修其業今益信之予亦喜爲文辭者悵念夙昔益有以自諶焉是爲序民國三十一年五月

恆簡齋詩文集序

丁丑之春吾老友勵君建侯歿於上海其子寄洲奉遺命以藏書整者皮諸金石絲竹匏土草木八大麓零者別儲之都數百餘種贈光華大學余率弟子二千餘人謹再拜受之詔於衆曰勵氏三世孝廉自紫章先生舉於道光乙未聽和先生舉於光緒丁酉及吾友建侯先生舉於光緒壬

寅世德相承科第綿延而寄洲克紹家學更以高等文官考試第一任財政部僉事今奉命以遺書惠我同學蓋本先人樂育之素志也烏可不誌於是光華校史大書曰某年某月鄧縣勵平奉其父勵公延豫遺命贈我校經史子集凡百餘種目列於後云越七年甲申春寄洲又錄恆簡齋詩集四卷外編詩餘各一卷文集七卷語余曰此先父遺著也詩集高閑雲年丈已序之文集請序於丈抑詩文集合序焉唯丈度之余曰諾自余登勵氏之堂於今四十七年矣聽和先生父執也始見於丁酉秋捷之日道貌端凝重然諾慎言笑與人相接和藹謙冲以孺子爲可教殷殷勸勉雖歷數十寒暑猶低徊焉憶庚子春先給諫卒於官旣扶柩歸先生輓以詩曰品學敦崇式梓桑家修廷獻誼俱彰星曹衡鑒規裁卓風憲敷陳氣節剛軫念民艱多燭隱關懷時事盡謀臧於今悵仰成千古稱述頻留齒頰芳弔先給諫之詩多矣先生非獨見其深且大者哉余之應秋試也始丁酉次壬寅終癸卯初試之歲年僅二十二耳未敢望售也然其時先給諫猶在及壬寅服闋再試一時朋輩皆破壁飛去而建侯亦預余子焉作劉蕡歎幾致病殆至次年癸卯始獲售猶及博慈親之歡每與建侯談壬寅之妬諸君子非敢技也彼時蓋有求耳求爲升斗以養母耳由今思之甚矣寂寞荒涼之際不伎不求之難也甲辰以後余奔走四方建侯方居家侍老親父子形影相依環堵之中卮酒娛對圖書四壁郁郁芬芳供奉之於慈湖正獻之於蒙齋其樂豈異也誦建侯所爲先君行述與祭告文終養於八十四歲壬戌久可知已夫風氣者時爲之也雖聖人不能違乎時科舉之敝久矣建侯慨然曰布帛知可衣菽粟知可食性使然也自布帛雜以敗絮菽粟亂以粃糠於是乎人厭之醜衰之堅煖勝乎敗絮乳酪之甘腴加乎粃糠於是乎厭之者

趨嗜之則又勢使然也

見君最清開

由是益探討應時之學施教南洋公學益智公學其後又長縣

高等小學府中學而長府中學者六年爲最久凡定學制築校舍莫不與鄉父老共之當乙巳之歲郡守萍鄉喻公兆蕃創議廢書院爲學堂張丈讓三與余和之一月之中廢三書院老成持重者幾目余輩爲怪物然同志亦復萃於斯建侯爲余同調之一也外似和易而中實有所主故咸倚重之而事以集論者至謂甘草足以和百藥也遂乃鄉之事皆任焉如自治籌備會城議會縣議會教育會凡扶植新政莫不推及之或爲之長更膺省選參議政余每與之商榷鄉事悃悃無華依然少年書生本色也而一塵不染之概先世之流風餘韻存焉是非所謂以不變應變者哉晚年坎軻不得志隱居海上以詩文自娛暇則與三五知己結爲文社飲酒賦詩且以網羅鄉邦文字爲己任其已成者則有四明談屑十數卷闡微揚潛涉筆成趣而生平所作詩文甚多隨意抒寫其性情更惓惓於朋友死生之際或寄其牢騷抑鬱之懷昔劉楨死於文學左思終於記室鮑照卒於參軍常建淪於一尉不得已託之於文墨又豈建侯之志乎雖然建侯之詩文傳吾鄉耆舊者不少余感故交之寥落讀之深增悽愴縷縷述之不獨歎其遭際之困阨亦悲逝者之多未竟其緒也然則余與寄洲益宜堅其志矣時民國三十四年一月

潛龍漕李氏家乘序

壽鏞少時讀蘇老泉族譜引竊怪其譜爲親作詳吾之所自出尊吾之所自出之說以爲與聖門追遠之意戾及觀韓昌黎所云愈之族鮮少無扳聯之勢於今者乃知魏晉以來九品中正之制行相誇以聲勢相恃以門第至有不恤爲他人父爲他人昆者矣蘇氏之譜於所自出者詳焉尊

焉豈無意哉吾甬潛龍漕李氏世居邑東或曰遷自砌街或曰由五鄉硬俗稱牌門李者是也砌街與孝聞坊同爲宋太尉顯忠公裔在明季以衣冠氣節著牌門李氏亦代以敦樸矜式後人皆巨族也顧年湮代遠必欲究其所自出往往難之於是欲立譜以垂後因書其一二三世行次而其名諱之著則自四世始曰法蘇氏云綜觀體例之精善書法之謹嚴而不知蓋闕且有合於君子之道焉舊譜序云延明達方正之師而俾之秉筆焉洵哉不謬也譜始成於同治癸酉其時德懷先生已捐館舍有子五人承暘承昉承皓承昱承暉暘皓先卒成之者承昉承昱承暉也暉生維錫是爲味雪先生以商籍入上海縣學補增生今年八十一矣嘗慨然曰譜宜三十歲一修吾譜未修亦越五十有餘歲非余任之而誰與因躬自採訪手爲鈔錄歷十餘載而事集蓋歲在民國紀元戊寅也體例一循舊無敢易命其子厚瑾持以使壽鏞序之壽鏞因之有感矣李氏自世昌先生以恩愬稱天不永年其配王太孺人守節撫孤實生啓陽先生性好施濟所謂設薦於十六舟橋以防雨行之泥濘者乃先生啓之而繼公晴峰歌詠及於德懷先生者蓋述父志也其事實與吾曾祖孝達公述吾高祖忠豪公之志同以其時攷之德懷先生長吾曾祖八年實與吾曾祖共有事於浮橋之役者也吾張氏以節孝燕庇後人者若吾族曾叔祖母沈太恭人吾祖母李太淑人則又與王太孺人類也厚瑾吾族妹婿實沈太恭人曾孫婿也壽鏞爲孝達公之曾孫而亦李太淑人孫也兩家淵源之遠而天之報施善人且於斯見之矣然則壽鏞之文不足傳而兩家先德則藉斯譜而並傳質之味雪先生必色然喜而十餘寒暑用力之勤鄭重於所自出不誇耀聲勢門第實事求是所以聯族敦宗承先啓後者世世子孫其又可忘耶民國三十一年八月

象山姜氏宗譜序

姜之錫姓肇自唐堯其後曰呂曰甫曰許曰紀曰申曰離吾曰姜戎皆姜姓之國而齊爲大漢武帝以山東大族實京師姜氏與焉於是姜氏始居天水淵源所自枝葉攸繼白巖先生作統譜考言之詳矣象山之姜氏來自粵東而發源於天水分派於九真譜始修於高隱公其時不可攷或元末明初乎越百餘年而雲川公修之又百餘年而恭齋公修之時在清之順治十八年辛丑也又越九十六年爲乾隆二十二年丁丑懋齋公又修之懋齋諱森爲炳璋之兄炳章卽白巖先生也原序所謂考核森司之潤色炳璋任之是也非惟潤色其文藻而例義亦所編定者矣然舊譜既有懋齋公序又有白巖公序白巖之序無年月顧序中述其事自丁丑以迄丁巳則當嘉慶二年然白巖卒於乾隆四十八年癸卯序稱丁巳疑爲傳寫之誤序爲攷證而作非爲重修而作觀於光緒八年虞峻之序所謂自乾隆二十二年懋齋白巖二先生修後至今一百三十五年云云者三爲二之誤其修於丁丑而非重修可證也今又去壬午六十二年矣白巖先生之玄孫紹祖字梅塢者持舊譜序跋及統譜考宗譜例義來告余曰續修之譜將就事矣乞子一言以弁端余方讀白巖先生尊行日記竊歎其道德文章爲不可及今又見譜例是又孝子仁人之用心也所謂不託始神農尙父而始伯約公所謂福五公四世以下殘闕者十餘世補之則妄合之則誣者皆深得歐蘇遺意以視牽強附合妄攀門第者相去爲何如哉今梅塢與諸族人繼承先志重修斯譜既有譜例在其精益求精不問可知吾願後之人遠繼礪溪釣叟時維鷹揚之績近紹涼州上士膽大如斗之才國之華不第族之光也因攷其作譜之源委而敘其譜例之特長而勉其繼

志述事之大且遠者而爲之序時民國三十三年歲甲申十二月也

酸鹼工業序

高君礪若既精化學又研工程出而施於世者久矣曩歲輯化學字典余嘗爲之序今更以所編酸鹼工業一書眎余且曰此曹惠羣先生屬綴將刊諸化學叢書者也余無專門學識顧喜與專門家談科學尤喜談化學而求其實施慨念海通以還國勢不競其故多端而物未盡其能人未盡其力所繫者尤大十餘年來急起直追學校既以造材爲務有志之士各以所得或施之於事或筆之於書雖在世界擾攘之中而風雨如晦雞鳴不已就余所見者若中國科學社汪君胡楨順君世楫所編實用土木工程學十二冊厚生社出版之工程學各種手冊三大種以及曹君惠羣與寶維廉君合編之近世無機化學皆新出之書切於日用者也而未見者尙夥矣今者礪若更以斯書問世而自以爲未足余既讀其自序又細審其目序中所云由路布蘭法以製造鹽酸及硫化鈉者謂可暫保一時終必淘汰余又詳詢其原因蓋往昔炭酸鈉皆得諸植物之灰法國革命之際來源斷絕路布蘭遂代政府別究製法自食鹽中直接製炭酸鈉終見成效後百餘年索爾維起更爲進一步之發明所用之原料爲食鹽與石灰而所需之炭酸氫鉀無事外求由此路布蘭之法轉覺相形見絀然今猶不廢者蓋副產品多而成本之收回易也余聆礪若之言余益信物競天擇之說固不可破而適者生存其中更有至理在焉大自然之宇宙何時何地不可取材非常之相遭必別有一途示人以不絕迷津既渡逢源左右而輒輟藍縷鑒造之精神終未可忽者乃知一時期有一時期之適用躡等以施往往有蹶者顛者矣此又不可不知也雖然學

無止境術亦無止境人病不求耳以礪若之好學深思其卓卓施於世者今已如此區區是編不足顯礪若之才識且將進而探求化合物之種類益有以大其嚆範而盡其質與能者焉是書特爲學者利於審辨而已民國三十二年七月

工程師手冊序

考工記曰知者創物巧者述之守之世謂之工百工之事皆聖人之作也昔者舜命垂作工與禹稷契皋益伯夷夔龍並重說者謂唐虞爲文明中天蓋創制顯庸莫堯舜若也故舜之時有璿璣玉衡矣而申之曰在在者察也有律度量衡矣而詔之曰同同者齊不齊也禹之治水謂本於蒼水使者之秘書妄也然自有其鑿山通道之計畫觀於東別爲沱知之矣卽以乘四載而論四載者水舟陸車泥輶山標也輶史記作橈漢書作輶以板爲之其狀如箕擲行泥上標史記作橋漢書作楫以鐵爲之其形似錐長半寸施之履下上山不蹉跌也實爲後人所取法由夏及殷殷之輅最堅樸由殷及周周禮爲體國經野之書無所不包而冕制尤善顏淵問爲邦孔子有取夏時殷輅周冕韶舞者蓋求其適而不拘於今古也三代以後惟漢之初猶有工學之專家存古法於什一錄之爲考工記其它如唐李誠之營造法式明宋應星之天工開物與清程瑤田通藝中之考工創物小記繫之以圖皆其著者也外此則寥落如晨星豈不大可哀哉今天下岌岌矣汪君胡楨學博而志堅論宏而行銳自新運河之計畫書出久已欽倒而未相接也比年朝暮往還縱談家國事不啻祖述之擊楫中流並先後以所纂土木工程師手冊相示都四十一編其詳已著於汪君緒論不復贅然藏稿以待者尙夥其間艱難困苦至鬻居宅以濟其事洵可謂人能弘

道者矣願汪君與余談輒以未能取材本國爲憾余謂中國無科學之名有科學之實世特未之求耳然古人所謂人惟求舊器非求舊惟新者蓋風會所趨人莫能遏今日之新明日舊矣月異而歲不同雖海外各國皆然何論我國故必竭人之心思耳目而一一求其適使科學思潮日進而不已以工程爲之基基立而運用得宜天賦資源胥皆發學術無國界況禮失求野乎又何憾焉抑余尤有言者知創巧述之云非一手足之烈也汪君縱有志使無諸同志各奏爾能其何能濟諸作家盡其能矣使無大力者出而相助雖汪君日營其產產有限而業無窮其何能繼然則有作必成始簡畢鉅者余老矣且願爲之執鞭況全國同志高掌建撫扶衰起敝以昌明科學津逮後進爲己任勝於衰朽萬萬者哉若夫青年得此不啻鴻祕尤宜人人手一冊矣爰書以爲序

領袖學序

大學云自天子以至于庶人壹是皆以修身爲本古之學無上下一也顧賢如子貢又以識其大識其小莫不有文武之道爲言則何也蓋嘗思之天地事物之變古今治亂之理必隨所施爲而無不可然後足有以臨天下所謂可使南面者也其學固與效一職擅一藝異矣故稷勤其稼而不恥其不知教夔司其樂而不恥其不明禮猶之農工商賈各勤其業相生相養各以其能獻焉由是五臣爲舜用而無爲而治十人爲武王用而同心同德卒以樹八百年之基當此之時所謂領袖學者修身而外知人則哲能官人濟濟多士秉文之德而已洎乎帝降而王王降而霸霸降而盜卽所稱某某領袖志在救世者也某某領袖志在立功成名者也某某領袖專好權力者也

某某領袖則專貪金錢者也夫至於專好權力貪金錢其亡也不卜可知姑置弗論獨惜志在救世志在立功成名者往往於意義所在功用所著修養所宜統治之方策範型之何去何從失之毫釐謬以千里又復濫用權術失夫中且正是則深可歎息者矣於是余君景陶生長遠瀋目擊時艱本所經歷探厥本原著有領袖學一書已成孤本一日方子衡錄以眎余且告余曰語淺而顯人人易曉况領袖學者推之士農工商與夫一技一藝爲之長者皆應加之意也持此以往其庶幾乎余因盡三日閱之它日子衡又來曰書中權術一章余擬刪焉是章固深痛乎濫用權術者然不善讀之適足滋弊昔人謂戰國策宜放而絕之曾南豐謂以戒則明猶可說焉若權術不待教者也丈謂何如余曰善哉善哉余以是益知子衡之志之所在矣子衡行輩幼於余蒯方氏之先世鎮海柏墅巨族也自亨寧公以義行旌仁高公繼之好善積累祖駿華先生以孝廉父粹彥先生以拔萃皆篤守儒術及子衡紹其家聲既游美利堅學成而歸就其所學發揮其事業者多矣尤著者爲設中國無線電工程學校造材徧於大江南北漸達於各行省自余識子衡卽知其所志者宏然子衡既不誇多鬪靡專精其業生當濁世而不爲世濡染今復慨然以王佐才自任且引濫用權術爲戒此又由識小以進識大之壯圖也余嘗與從學之士言人不可有領袖慾而不可無領袖才然則子衡又與余夙昔相期者有合焉子衡勉乎哉子衡亟亟欲以是書印行因有所感而題於端

跋黃吳仲允璘上苑國燁光陽論周元公太極圖說札

余好讀周元公太極圖說及通書太極圖說云無極而太極朱子解之曰上天之載無聲無臭而

實造化之樞紐品彙之根柢也故曰無極而太極非太極之外復有無極也如何明白了當往者
余與諸弟子講學嘗以爲有朱子之解而他說均可不必矣今讀吳仲先生此札謂易言太極夫
子發三聖所未發而周子敢加一無極子太極之上此是絕大膽量觀周子者正當於此二字辯
周子一生學力此二字之是非周子學力之是非所係古無太極夫子見之而言之古無無極周
子見之而言之然周子之言原非離夫子之言而爲言也惟恐後人錯認太極二字故言太極本
無極而曰無極而太極此以無極解太極而非謂太極之上別有一無極也妙在一而字當將無
極二字連而字遞下讀不當將無極二字頓讀猶云太極者何無極而太極也若將無極二字一
頓則而字著力便覺太極之上又有一無極矣世人紛紛聚訟正坐于此又謂無極之義周子早
自解明何煩另下註脚其言太極生陰陽陰陽生五行惟恐人誤解錯認故急急挽轉曰五行一
陰陽也陰陽一太極也太極本無極也曰本無極此本字較上兩一字更真切是言太極無形象
之可指本無極耳太極之外何處討一無極無極之外又何處討一太極乎不謂後人之騎驢覓
驢一至此也云云嗚呼吳仲先生斯辯真得周子之本意而與朱子之解復相符合其兄在中
稱其別透眼光非阿私之言也抑余又有進者孔子曰天何言哉曰時行爲百物生焉天何言
哉天何言即無極也四時行百物生而太極之功用見矣無極而太極亦體之於孔子之言非襲
老子之說也更無疑焉此札史君兆琳得之余愛玩不絕既錄副以藏復跋於此兆琳其寶諸苑
國愛董在中董吳仲皆梨洲高弟鄭志有傳國愛居官嘗書廳事曰澹泊明志平易近民在中文
學南豐詩學東坡吳仲謂學當鞭辟近裏者也觀於此札益想見其爲人惜年三十六而卒哀哉

甲申夏六月

浹江李氏南壽祀記

浹江李氏世以孝友聞自余年十四始省伯姊登其堂時則太親翁梅塘先生太親母張太夫人上奉樂祖太夫人維孝下督諸子諸媳維嚴維慈而如山姊丈與其兄雲書玉塵其弟薇莊徵五遵陸屑清雍雍怡怡此景此情余猶追慕之蓋於今五十三歲而余年六十有七矣姊丈有五子祖恩祖基祖楨祖薰祖齡四女適王適胡適章適張其生皆後於余始登堂之日顧此五十三年中人事雖有遷變而兄弟姊妹之雍睦患難之相共勤儉之相勉得以綿其先澤於不墜者余又目擊之壬午之春祖基過而告曰知吾家事莫若舅氏吾父不治生產又舅氏之所知者也回憶丁卯之秋吾父病篤詔告小子等遺言具在今復十六年吾父留遺於吾兄弟姊妹者幸無替焉維是整之齊之負者償之有償必有變毀者謀恢復之而今猶有待存者或公之奇零者或分之而尤以奉祀吾父者爲水源木本之尤要者也因出口述之遺命與今日兄弟姊妹協議書而求評焉余曰善哉善哉夫周之興也肇於后稷其後世德作求至有天下享祚八百年之久家之與國一也在詩曰禴祠烝嘗於公先王說者曰其所因者本也本莫大於宗祀今日之父祀即他日世世子孫之祖祀也且以隆祀而議及遷葬祭之以禮葬之以禮其誠一也爰告祖基曰定其名曰南壽祀取詩如南山之壽之詞而爲戡穀之頌當亦姊丈吾伯姊所欣慰於九泉者也其詳別書於籍不復贅民國三十一年歲在壬午三月

題史兆琳藏陸純嘏山水畫冊

語云得一知己可以無憾雖書畫亦然陸純嘏者諱介祉鄞志有傳以孝聞明社既屋棄儒冠如敝屣真畫老松古柏以寄意然非其人不相贈也王備五者諱典仁和人也杭州藝文志有慎齋詩存往年余刻周茂山春酒堂詩文集附以外紀嘗得陳祚明慎齋詩序謂其與茂山相似矣今觀此畫純嘏作之曰以貽曾見古人者思惟備五而茂山因而題之曰桑滄之感隨物中人獨晤純嘏猶見古人且謂純嘏少知之者而獨見賞於備五然則三人之契合皆在塵壒之表豈偶然哉余更徵之於三人之詩純嘏詩曰蕭疏世事驚人老談笑閒情盡夜餘茂山贈純嘏見過詩曰自起開籬慨翻嗔僕婦除備五寄茂山詩曰詩書難易世天地久忘才茂山寄備五詩曰亂久山川窄交深天地寬嗚呼畫與詩豈異也茂山所書乙未二月及七月實明亡後之二十有一年蓋於今二百八十年矣摩挲遺蹟感慨係之兆琳珍之如拱璧裝潢成軸不徒敬鄉獻也其亦曾見古人者乎爰攷而題之癸未清明日

贈徐君肅青序

余喜讀徐北海中論因詳攷其立言之舛旨以求其爲人北海生於漢魏之間獨能抱質恬澹篤行體道不耽世榮觀其治學貴驗藝紀務本諸篇尤足規流俗於千餘年之後此豈尋常者比哉書中論焉則以仁者得利萬物萬物亦受其利爲言尤兢兢於文王之所以既受帝祉施於孫子者惟在於德所見亦大余持此以衡天下士久矣顧輒不可得其後遇徐君肅青君固北海苗裔也實長余六年以同治庚午生今年七十有四矣先世居鄞西費顙橋之朱袁村生四歲君父曉瀛先生以宅燬於火遷居前王村與朱袁村鄰村之左右皆農家也君自幼溫文不與村兒習七

歲已能讀四書五經領會其講解十八歲出就外傳游老師宿儒之門學既進益復枕經菲史孜孜不倦爲文必根六藝藻采紛披視天下之樂無以易此也北海有曰君子心不苟願必以求學身不苟動必以從師言不苟出必以博聞又曰學者不思才之不贍而思志之不立君之始基肇於此矣及爲諸生不屑屑於科名慨然有大志時吾鄉風氣蔽僂而國勢岌岌君內度於己外度於人獨能舍其舊而新是謀廣購譯籍而讀之凡歐西政藝諸書以及歷史地理無不悉心探討既而知譯籍之不足以廣聞見也必習知佉盧文字乃得其深奧於是遂入震旦書院蓋其時馬相伯先生爲成人而設盡二年即能通二國文字君欣然趨之者以是也北海又曰見人而不自見者謂之矇聞人而不自聞者謂之瞶慮人而不自慮者謂之瞽故明莫大乎自見聰莫大乎自聞睿莫大乎自慮易曰日新之謂盛德而君有焉無何震旦中輟君於是專攻理化兼習東文取日人丹波敬三所著無機化學定性分析而遂譯之且與友朋十人組織實業研究會創辦祥生皂燭廠以小試其技北海曰事莫貴乎有驗言莫棄於無徵又曰因智以造藝因藝以立事君其取於斯乎抑更有進者君子智以辨物固也而仁以博愛義以除惡信以立情禮以自飾北海以爲豈可無一哉君爲學凡三變而仁以澤物之意則一也不獨親其親不獨子其子有禮運大同之思焉有觀於鄉而知王道易易之意焉於是畢業於全浙地方自治研究所壹意於鄉之事而治河興學尤其大者也斯非務本者歟及爲代議士建樹尤宏辭受取與之間絲毫不苟意在除惡而未嘗使人以難堪與矯激以爲名者異矣昔漢有鄧禹使子弟各執一藝君既師之以爲法而遂推之於人人始設學於宗祠繼廣之於其里更暨之於鄰鄉其後所謂某某小學某某小

學者卽當年之鄉立小學而君創之者也君尤重然諾親友中有以子弟求學事相屬者必扶掖而使之卒業有友葬及期千里來會如范巨卿之於張元伯焉凡聲伎博弈之所蹤跡不一至而家庭無嗃嗃嘻嘻之聲于吉凶二禮更兢兢無敢忽信以立情禮以自節舍君其誰與歸余讀君七十自訟文自謂隨得隨失老而無成夫古今之所謂成者固無限矣余無成中之一人也然君將視富貴功名而謂之成則誠無成也若以道德學問而謂之成雖古聖賢固自視以爲未足也吾輩亦惟於無成中而勉求其成不知老之將至可矣況如君者六子二女三孫得皆畢業大學北海引詩云其德不爽壽考不忘者聲聞之壽與王澤之壽行仁之壽並之矣雖欲謂之無成得乎君固北海之苗裔也君旣取梁徐勉所詔示人遺子孫以財我貽我子孫以清白之言以貽清名其堂余更以君之言行有合於北海不惑於所甘而至乎所淡者因采其說而進之其有當於君之意歟

贈陳君九皋序

昔柳仲塗贈高銑序曰自信而不惑自任而不廢自擇而不忘自混而不固聖人之徒也又曰不惑則樂天不廢則隨時不怠則勤己不固則順人能樂乎天則無憂能隨乎時則無患能勤乎己則無闕能順乎人則無過且謂渤海高生者備于四者也今吾於陳君九皋亦云九皋名學源宋文介公諱禾之二十二世孫也世居鄞南鄉走馬塘清初分居城內倉基又爲忠貞公夏謨之族裔而禾生先生之猶子也禾生先生豪於文著有韜廬文存余嘗爲之傳矣九皋承其世澤固有異於人者在然自始生以迄於今六十年矣其間世變迭乘內憂外侮擾擾無窮大抵君子用道

之日少小人用機之日多善亦不足爭亦不足怨亦不足愛亦不足所謂天下之害不足爲大者將何以不惑不廢不忘不固以樂天隨時勤己順人乎余久爲九皋懼瀚九皋之始莅海上也年纔十一耳新學萌芽之始肄業於明強學堂其志未嘗不欲終始於學也無何而輟學就商既置身於商矣歲己酉橡皮風潮突起所業又不卒會值清廷倡勸業會於金陵俾掌匯兌事事畢又應上海友華銀行之招旋兼任杭州造幣廠駐滬辦事處事共和紀元之十年遂入中國通商銀行通商銀行者吾國銀行之嚆矢也九皋佐理其事歷二十四年非勤己而不忘隨時而不廢能如是乎今以聯易銀行之改組更任西區分行主任九皋嘗謂業非素習不可爲其設施不離於此者本素習也雖然人也者物之至也人之至者謂其能以一心觀萬心一身觀萬身也其能以心代天意口代天言手代天工身代天事者焉九皋豈自爲謀而限於一技一藝者哉觀於創鼎華製革廠倡煙臺漁業公司固將開風氣利民生也乃所與不諧所志未成蓋時爲之也性喜山水尤好考察各地歷史古蹟風俗人情如平津武漢曲阜大同綏遠包頭張家口足跡所至悠然與物會更以餘晷練習太極拳以鍛鍊其筋骨調攝其心身則又至靜至樂至動至憂至常忘極至樂忘寧者歟余更就仲塗所以論高生者推之天下皆知九皋之不忘不廢矣而余謂九皋且以不惑不固將之者何哉貨財臨於前威勢迫於後稍不自持必控縱而失御而況處世綦難若膠執不化聲色拒人動與世違惟行我是鮮不敗矣九皋外圓而內方隨時而不徇俗要其本歸於恬淡夫惟淡者乃得其真斯又余與九皋平日所交勉者也余忝長九皋九年以余之逸視九皋之勞九皋將妬余然余之勞昔有甚於九皋者亦惟勞乃能壽也九皋謂何如

贈胡君錫安六十壽序

錫安胡君今年甲子始周介弟次橋一日造余而言曰君與家兄交既久知兄莫如君昔人有譙集多推儒雅士爲文以紀其盛家兄感慨時事既卻譙集况言紀盛乎願贈言爲昔人所不廢君其許之余曰諾憶余自識君四十有五年矣君先世當明季自滄洲徙鎮邑西陲清泉鄉之矮竹邨世務農咸同之間一鄉稱素封及韞山先生更以貨殖振家生三子君其長也君少余八歲君年十五已爲弟子員時先君子居鄉一時少年結文社以爲課余兄弟皆預焉君崢嶸露頭角下筆輒驚人寧獨吾兄弟畏之早見許於先君子云此一時也世變既亟張弛隨之君於是肄業於南洋公學是爲辛丑之歲越二載癸卯韞山先生捐館而君又病遂輟學就幕然君求學之志猶昔也會值浙省撤公帑還浙籍子弟赴日本習法政經濟之學君預選居東瀛亦三年學大進然又以病歸此則君引爲大憾者也自戊申春應汴省之聘教習法政學堂者凡四年迨辛亥浙省光復始入湯公盤仙幕壬子余司浙計君枉訪余於蒲場巷公署以私情相笑語余固視天下事謂無不可爲而君意氣亦復慨然何其壯也此一時也其秋君赴北京主任法政專門學校教務明年任京師地方審判廳推事庭長又明年任京師高等審判廳推事庭長越三年戊午任大理院推事凡蒞法院七年本其所學施於有政綽綽有餘裕矣顧以廷尉爲天下之平失入與失出厥愆維均君秉性慈祥嘗謂與其失入毋寧失出既而曰法官終不可久居也遂辭院職有意計然之學余亦由鄂調京初任職幣制局與君共事君昔困於條目余昔疲於期會一旦落拓閒曹如釋重負每當夕陽西下互相過從雖無黃岡竹樓之勝而棋聲琤琤然致足樂也此又一時也

余自己未以迄壬戌之冬浮沈郎署四年其時財源枯竭貨幣紛歧有志之士欲爲根本調節之計終奪於債帥上之所經營與下之所供給皆困於斂賒之一途年積歲增國與民大病余與君私憂竊計以爲無源之水涸可立待而無如之何又况軍事迭興長安如弈雖小小貨幣周轉之地且爲大力者負之以趨而顛躓者多矣可勝歎哉由是君北余南不常合併者數年其間余之或出或處均無足言獨是有君南歸相見於海上杯酒話舊猶復如少年時而不惑於甘相安於淡君固有以自守余亦於君時吐其胸臆四十五載中彌年聚散若此而余亦老矣君久於四明銀行樂勤厥職且和易近人而不肯苟同以徇俗及與君談文藝娓娓不倦偶有所作則斐然猶夙習者而其雅潔且過於恆人豈君有獨異歟蓋自少時薰沐乎詩書及長精妍乎法律又復歛歷乎世態不爲外物所搖其志然也君有弟次橋定安篤於友愛遇事互相助詩云式相好矣君有之焉丈夫子三人女子三人孫男女四人瑤珥蘭芽郁芬一室福正未有艾也夫大壽百二十歲君方得其半耳贊之深者其光燁將益崇明德以施於時次橋謂君堅卻讎集余曰此固君之威德也且待七十時國家昇平大開壽宇余更握筆以紀其盛今惟共勉歲寒而已是爲序

陳季壽先生八十晉一暨鄭淑人七十晉一壽言

慈谿西北四十里曰掌起橋橋古名孔敬兩旁石如掌因改名掌起居者獨陳氏爲盛余四十年前嘗一至焉陳氏世其家子姓繁多循守禮法累代同居事無大小秉命於家長人不敢私其財親親之義其歸於厚者歟自峻峰先生潛德世延施於孫子若瑤圃侍郎若季壽先生皆其孫而爲余父事友事者也侍郎居京久熟先朝掌故識拔寒畯虛心下士休休唯謹有古大臣風年少

於先君子余自幼即相親稱之曰叔先生其從弟也當光緒甲辰之冬余始需次吳會先生實先之八年之間無時不相過從每談輒移晷忘倦余少先生十三歲忽忽三十有餘年而先生則八十晉一矣歸震川曰人生百年之內其變故多端而於歲時節序親朋聚會談說生平感今懷昔之意爲多自余與先生相別於蘇臺此卅年中睽違之日多而合併之時少焉先時令子慶泰嘗從余學文余喜其理趣會心神融而意暢也其後望泰攻業於光華大學專精理化余忝長斯校適與先生相逢於海上又諄諄以望泰屬余而望泰亦勤謹自矢今與登泰順泰卓然皆以其能獻於世四美具矣癸未冬望泰謁余因詢先生起居備述邇來頤養里第健飯如昔耕讀自娛以其餘暇興學造才遇人緩急慷慨以應慈北素有衽金革而不怨之風本其仁愛之懷往往以魯仲連爲己任人咸服其誠而渙然冰釋卽如丁卯之秋有葉姓者欲掘塘放水以隣爲壑陳姓知之將起與抗賴其周旋化險爲夷云吾聞其言欣然者久之昔讀邵康節觀物篇有感於人之所以靈於萬物者其能以心代天意口代天言手代天工身代天事也又讀王陽明拔本塞源論深痛竊者之徒傾詐之謀攻伐之計一切欺天罔人苟一時之得以獵取聲利之術鬪爭劫奪不勝其禍知識聞見辭章適足以行其惡肆其辯飾其僞也聞先生之風亦可以憬然矣抑又有言者當先生筮仕之始風俗猶近於古也上以察吏爲任下以循職爲事爲牧令者旣集刑名錢穀於一身更負民人社稷之重貴於是必先有以試之曰發審局曰督審局所以重民命也曰警察局所以重民政也又凡釐稅漕運各有攸司所以重民財也失入旣不許失出亦不可多取旣爲暴少取亦徇恩其防於未然者更在周官評士之職蓋牧令未佩印綬以前多方試其才而後授以

實任其慎之又慎矣先生於斯五者嘗從事焉且旁及電政局官錢局莫不措之裕如長吏既謂之曰能同列皆曰是君子人也由其不察察以爲明而懇懇以爲誠所以異於人者非有他也夫人之處世唯厚德可以載福世俗之徼倖以逞者既不足持久而強暴者無論矣卽柔曼訥戆者且適足自損我兩人在當時則勤且拙也迺今日獨受天之所賜以有其子孫以優游於林泉先生既不虛居於鄉余雖久客春申而略盡心於里之文獻更以暇日集羣弟子講學於風簫雨晦之中猶憾不得與先生相見傾談夙昔耳顧見不見何足介介相與交勉歲寒使一歸於厚而已去年爲先生八旬壽辰繼配鄭淑人亦復七十先生悉拒賓客其意善矣然親朋謂宜於今歲以文字爲壽屬余序之余與先生道義交也因述先生之所以自壽者如此先生之德盛矣然曾南豐有言古之君子未嘗不以身代也家人之義歸於返身士之苟於自恕而不知反者往往以家自累故也今得鄭淑人爲之助則又相成之道然矣淑人固鶴浦望族也其父海曙先生旅杭久于時立四明同義集修張蒼水祠岳王廟尤與餘姚朱久香侍郎善紅羊之劫佐鄉團以義著淑人秉其家教故凡先生爲義於鄉者皆有以贊之然則白首偕老又豈偶然哉慶泰兄弟其益以厚德施世者爲景福之祝乎是爲序時癸未仲冬之月也

方君椒伯六十壽序

方氏爲鎮海望族世居柏墅村累代以好義聞子孫繁衍各以才能著於時椒伯先生固方氏之賢子孫而亦爲今日方氏之賢父兄也甲申夏正十月十九日爲其六十誕辰族人謀所以壽君者而徵文於余余與君交久矣有始相識以迄於今忽忽二十有餘年世事波濤而君之雍容冲

穆一如昔時卽此已足以自壽又將何以壽君哉雖然吾有說焉君子之澤惟積焉而弗斬由五世以至於百世在人之自爲耳君之祖性齋先生有隱德當五口通商之初以絲茶貿易見信於海外西人著書述其事盛稱方七先生誠信不置云積著之餘廣行布施及君之考崇年先生以名孝廉善繼先志任俠好義有父風君之妣爲章采南祭酒之姪女而渠卿州牧之三女也生長名門熟嫻家教不幸早失所天撫君成立君之通達詩禮固由君之所自爲而亦章太夫人有以教之也其世德作求有如此者夫少成若天性習慣成自然君秉於庭闈者既久且深又復以諸葛孔明靜以修身儉以養德非澹薄無以明志非寧靜無以致遠之說引以自勵故能處濁世而不爲所染和於衆而不同於人義之所在則不讓焉其持己處世有如此者當居鄉也時值代議士之制始興縣議會爭聘之草創潤色悉合機宜君尤以自治之本在於教育適鄉鎮設立谿海學校以君董其事君謂物力艱難設置無妨簡陋而規制必求端嚴於是熱忱之士相與攸助桌椅什物而師資多賴專家造就人才於風氣初開之會得士最多更以餘力設族學曰培玉君自始主持之族舊有宗祠義莊其規劃措施皆出自君而手訂章制悉臻美備族有拙於謀生者君則引之使足自立於是族之人皆以生佛稱之禮云觀於鄉而知王道之易易焉其儀型鄉里族鄰有如此者上海爲大都市與甬一水相通夕發而朝至甬之人以爲第二故鄉焉夫澳而使之萃其道在聯周禮太宰之官聯申之以小宰之聯事釋之者曰連事通職相佐助也國之與鄉勢異而誼同滬之有四明公所百歲於茲矣君既董其事者三十年南北東三廠之推廓醫院之設置凡所殫盡人皆稱之而四明同鄉會創始於宣統二年庚戌至辛亥始分科治事其後改曰寧

波旅滬同鄉會君初以總務攬其成歷年亦久而其效丕著其大者遠者尤在育才與排難而其本則以君有足以容人之量而復有不可奪之志此所以連事通職而人樂爲之助也其在異地敬恭桑梓有如此者憶乙丑之夏余尹滬海受事甫二日南京路事起卽所謂五卅案者也時商會會長虞君洽卿方他往君佐會務余每事輒咨之多得體要其後洽卿返益相與聯繫昔人贈君言以爲委輸殷閭商旅錯雜情有所未達議有所未協平亭區處靡勿當者余躬預五卅之役而益可以徵言者之不虛也其好謀而成有如此者君之自謀也少而其爲人也多卽其自爲謀者如久於通商銀行樂勤厥職每於工商業之調劑往往樂以款貸其有久假不歸者反累於已而不恤人有笑君者君曰誼固然也其舍己從人有如此者余曠觀古今人之所具耳目口鼻肢體皆固而善用之與不善用之其歸則異焉者何哉內之外之勢之所趨如此相違也務外者往來軒從駟蓋填擁歲時會合鼎食鐘鳴疊榭飛樓東西跨構不數十年間反觀宮室衣冠皆非舊物無他德不足以將之也務內者曰夜謀所以居吾躬者百方欲使舊德由我而綿延時時求吾心之所安久而覺焉其境願固可以處其境逆亦無不可處而兢兢在學之中子孫濡染者詩書之澤不惟無愧於後而益有光於前如君者旣以法律專家創立商業研究會啓濬一時風尚又復嗜義若渴腹上所述非務內而不務外者耶近十年來國家多故兵革方興君主持難民救濟協會募捐給養幣達千餘萬之鉅時垂四年之久閱規遠圖如有追而莫及然事變未已稍不自持控縱失御矣於是養晦遵時不顯絕於人而務以和雅溫厚者令人無能浼焉此尤爲可貴者也仲子善楨有會計才主任中國銀行有年妙譽斐然季子善桂秉其家學負笈美洲畢業於哈

佛大學又復博學著書得博士學位諸孫疑疑露頭角易曰積善之家必有余慶君之景福方未
有艾也稿成以報方氏族人曰是實語也君其以余言爲不濫而輒然晉一觴也乎

傅德予先生六十壽序

壬午孟冬二十六日吾鄉傅德予先生周甲壽辰詰嗣其鈞其椿其達其霖女菊蓓菊蕙菊萍與
其壻馮仲會等稱觴上壽禮也先是子女豫以祝釐爲請君曰今何時乎拒之堅親友復再三言
之亦弗許一日韓君長生偕其友三十人進於君曰大學有言一家仁一國興仁又云仁親以爲
寶此諸子女之心也君不自壽而以壽人可乎君笑而不答於是集議于一堂醇壽資充善費以
謀爲君植福且爲親朋植福馮子伯禾君姻家子也與余有連走告余曰菊萍幸隸丈之門丈必
有所以序其事者余曰是可壽也爰據大學之義進一解焉大學一書以明明德親民止至善爲
三綱領而明德與親民實相輔湯之盤銘曰苟日新日日新又日新湯能日新其德故商之世賢
聖之君六七作高宗尤爲中興主夢賚良弼有傳其姓說其名者用佐鹽梅以厥德修垂訓君之
始祖也在趙宋時始遷居鄞甬東之傅家壩傳三世曰教諭公隨其太君鮑避疫隣村五鄉礮遂
家焉子姓蕃衍代出顯貴二十傳至爾瑞公爲君之尊翁世有潛德祚流後昆其在大學曰其儀
不忒又曰以能保我子孫淵源所自來者遠矣君封翁之叔子也生而穎慧爲父母所鍾愛昆弟
無間言在大學曰宜兄宜弟又曰孝者所以事君也弟者所以事長也其爲父子兄弟足法而后
民法之也故不必天子諸侯謂之君凡主其事者皆君也不必受廬爲氓謂之民凡下於我者皆
民也朱子釋絜矩之道曰絜度也矩所以爲方也彼我之間各得分願也而其道豈是皆以修身

爲本蓋未有學養子而后嫁者也君之有諸己者則自幼始夫可盡者人也不可必者天也康誥曰惟命不於常君十七而失怙二十一而失恃當斯之時在常人處之身有所忿懣則不得其正有所恐懼好樂憂患則不得其正事有必至理有固然而君於四載之中兩遭大故哀矜畏敬之餘不敢有所辟勉勉焉惟誠心求之業無論鉅細事無論大小辨潤身潤屋之意懍惇出悖入之戒自始就業以迄於今四十餘年困苦難難以底於有成所謂先慎乎德者非耶且夫大學理財之書也生財大道必本於生衆食寡爲疾用舒君子大道必根於忠信以得之驕泰以失之而其樞機則在知所先後則近于道故曰其所厚者薄而薄者厚未之有也君性孝友慷慨好施與營先人窀穸爲弟妹婚嫁莫不獨力任之其意以爲其家不可教而能教人者無之此一也君爲累世置祀田又與族人修支譜更創立傅氏學校思源會施材會其意以爲止孝止敬止仁止慈亦安其所止而已此二也曩歲山鄉歲歉哀鴻遍野君怒焉憂之與鄉人共籌賑濟之策貸鉅款採白米二千石平價以糴活者無算竝以鄉之河道久淤出資疏濬爲根本計其意以爲財散民聚施之一鄉尤易耳此三也其他見義勇爲者皆類此然則明明德親民以止至善者君固有合於大學之道歟余因之有感焉德者本也財者末也外本內末爭民施奪互市百年民生亦憔悴矣吾農國也駸駸而趨于商又駸駸而趨于工此時勢之使然也卽就君之所業與所有事者言若布若呢絨若棉若紙若煤炭若火柴若染織若藥材若工業原料統而名之曰貨若錢莊若投資管理公司統而名之曰財而物值之貴賤民生之休戚繫焉願今之與昔其相去有倍蓰於千百千萬而猶未已市利者方因以爲便聚斂者從而甚焉譬彼舟流何所屆乎得衆得國其權在

上發身發財其運在下如君來自田間時艱蒿目必有感焉不安者矣况回朔風昔修之於家以及於族於鄉而進之於社會國家所謂以義爲利者益將溥其宏澤如苗之碩如竹之猗威德至善與日俱新以自壽者壽人用能保艾其子孫楚書曰惟善以爲寶更爲君頌之

贈葉君叔眉六十壽序

余少時讀韓昌黎送孟東野序其假於鳴以寄其意者凡三十八字心竊怪之以爲鳴者自然者也何取乎不得其平及由少而壯而漸漸老閱世既深乃知天下之事不平者多矣昌黎有爲言之也然其中有所謂善鳴者焉有所謂不鳴其善鳴者焉善鳴者無競不鳴其善鳴者競而已矣夫天下相率而至於競其志又安在哉然天下相率而至於無競其志亦何由立哉憶余侍親蓊燕得始見葉覽仙先生樸學士也爲余室人之姨父以名孝廉終老於學正至寂寞者也讀其詩稿恬澹絕塵埃誠入於無競之境矣歲乙未冬余再應童子試當郡試之日有慈谿二童子清才靈稟擅秀一時而作文多奇氣余甚羨之詢之則皆學正子也蓋其一爲伯元其一卽叔眉也叔眉方十二歲耳今之自號无競老人者是也自余識叔眉於今四十有八年矣雖犂角之童子亦復作六十翁余長叔眉八年不益嗟耄耄乎其無能競也蓋可知已然余質諸叔眉方余兩人鏖戰藝場蟻蝨科名視同性命各不相讓豈云無競幸而得之旣入泮宮思賦鹿鳴旣賦鹿鳴思宴瓊林吾兩人固以不競於瓊林爲憾矣此猶競於名也更以余之庚子叔眉之壬寅言之博微薄之館穀出門茫茫負米仲由爲慈母尸饗耳當斯時也懼晏楹之或墜借富枕而有懲念昔先人弗克負荷雖欲不競爲得而不競則謂之競於祿利也更何飾焉其間從事記誦之學而競之以

爲博從事詞章之學而競之以爲麗者無論矣卽卓然自奮溫故而知新聘奇而闢巧前瞻後盼應接不遑相競於有用之學以見諸行事之實者謂之與學問競毋寧謂之與富貴功名競者也夫富貴功名而出於學問之中則競之善者也競之善者而與競之不善者競其不競也必矣何則彼得其競之方耳競之不善者正其善競者也叔眉自畢業北京大學無日不競於學之中僕僕於魯衛之郊退而施於桑梓之鄉抗顏爲大宗師門牆桃李競秀一門詩曰無競維人四方其訓之誰其能與之競乎及游長春歷四鄭涉四洮走津浦慨然欲見諸行事之實於路政者其始亦未嘗不稍稍如其願而爲人之所莫能競迨其久也競之善者轉爲不善而競之不善者轉而爲善矣叔眉之無能競將與余之老無能競等矣然則自號曰無競老人誰曰不宜且自言曰吾非真能無競者亦藉以明志而已蓋於人無競而其自競者志也澹泊以明志志非人之所能奪也其競亦遠矣抑尤有言者當辛亥之冬余返里陳君杞懷告余曰育德將改爲中學請子命其名余方讀天演論遽答之曰物競天擇效實儲能其以效實名可乎杞懷曰善斯時叔眉方與諸鄉先生棄北返南而教效實諸弟子於是效實生徒之學業漸水以東莫與之競焉叔眉既教誨之又飲食之先後捐資鉅萬其它鄉黨之事若保黎醫院雲華堂咸董其事好助人而口絕不言人有受其惠而莫知所由者皆與效實類詩云不競不綽百祿是求叔眉有焉且爲名父之子難爲佳子弟之父亦不易而其兄若弟既燦然發揚其門楣鄧禹諸子又復各執一藝不難之又難者哉今叔眉有兄弟皆擅才名有三子二女皆畢業大學有孫四人蘭茁其芽此又誰與之競乎上壽百二十歲叔眉方其得半今後之競又在益崇明德矣今後之無競尤在益堅歲寒矣爰書

以爲頌

江亭英先生家傳

江亭英先生既沒之三十六年其子義修編先生所著味吾廬詩文牘稿示壽鏞又取生前贈言及沒時輓什彙爲一卷屬爲整齊且曰君知吾父最深乞一言爲家傳俾與鄴通志傳並存壽鏞受命逡巡自維譴陋未報師恩雖義修不言猶當勉爲之顧未能得其萬一耳嘗憶先君子詔小子曰先生敦篤君子也實少余七歲聯之以文酒劇之以道義更使汝兄弟師事之師其人非僅師其文也是知先生莫如先君子矣歲庚子先君子捐館先生哭以詩讀辛苦文章難造命消磨貧病易傷生句知先君子者又莫先生若也及今思之不啻先生有道矣壽鏞何足以知先生而先生之真性情固有可傳者在爰述其概先生姓江氏諱仁徵字定甫一字亭英號懲菴浙江鄞縣人也江氏系出皖江宋宣和間始祖少虞公以宣教郎知定海縣卽今鎮海未及考績而卒葬於邑之白鶴山子孫遂家焉故曰白鶴山江氏又曰江家山循山而西曰靈巖鄉聚族而居不下七百家清初十五世祖文公始遷郡城和義門至二十世是謂企漁先生卽先生之考也妣趙氏封贈如先生官生二子先生居長贈公以居積起家有潛德衣食贏可給先生自少靈敏好讀書性復慈祥愷悌外和而內介作事有恆日之所行夜則筆之積成巨帙顧遇事有不安於心者往往以贛直出之故不諧於俗而以齟齬終先生身材短小弱不勝衣然趨義則不後人爲文以清真雅正爲宗戊辰年十七爲弟子員有聲庠序卒未遭贈公喪而趙太夫人積哀成疾幾殆先生於苦由中延醫嘗藥調治萬方露禱中庭願以身代真誠所感幸得無恙然自是公私叢集於

一人先生雖復跌宕文史不以境遇豐嗇爲憂而甘旨之奉惟恃脯脩指授生徒根柢經史作文尤重義法先後受其學者皆掇科第各盡其材己卯中副榜壬午領鄉薦庚寅成進士觀政刑部假歸省母壬辰秋復入京供職明年壽鏞偕弟壽鎬始受業焉甲午中東事起朝臣無離京者先生日則趨部以其餘暇與友朋相酬唱且刻香聯句爲消寒集陳雪樵比部康瑞馮時香孝廉毓華童柘滕廣文賡年與先生四不啻乾隆間四明李謝鄭萬四友焉而詩格清高以先生爲最今其詩可稽也明年馬關約定先生遂歸養母居鄉之日掌教鎮海觀瀾書院三年得士尤盛而子弟多自課與弟仁綸相友愛然督之嚴與諸子等以是皆成名己亥四月趙太夫人卒壽鏞往弔之哭泣之哀有逾孺子先生則年已四十有八矣壬寅服闋入京時拳禍之餘瘡痍滿目旅懷振觸又皆寄於詩鎮海王友萊侍讀榮商容膝軒詩集中與先生唱和之作尤多先生四疊韻詩所謂今我憩京塵蜩曲如伏蝻鬬捷愧未能索居亦所恐者紀實也蓋迴翔郎署者非白首未得遷除且適有王侍御祖同者奏請令六部候補司員回籍不扣資俸屆補缺再傳到部議雖未決而汰官之說起矣先生自遭甲申家業中圯子女累重京曹薄俸杯水車薪雖布衣菜飯繁重節儉又復天懷沖澹到此實無以支措遂決請改外丙午選授江西永新縣知縣壽鏞適以輪漕入都與先生朝夕相見一日酒微醉謂壽鏞曰子知我能爲吏者乎今天下號爲能吏者供奔走聽使命我能之乎趨利避害我能之乎不顧良心不怕輿論我能之乎知其不能而爲之鮮不敗矣壽鏞因慰之曰事盡在我而已不在我者可聽也自古循吏皆出書生先生旣領之而鬱抑之懷形於顏色十月繳憑到省明年八月始抵永新任下車伊始即訪問疾苦延聘方正勸學平訟與民

休息永新索號難治先生一矢以誠往者輸納錢糧多不如期及此則先時畢集且巷歌街謠莫不欣欣有喜色以爲酷烈之餘以煦嫗噢咻出之永之鄉人士皆曰是本醇儒爲循吏敷教化以文章也會有司江西官銀錢局者與先生不協排斥異己當道不察蒞任十月遽調省而繼之者則昏庸貪婪吏也嗚呼先生之醉言果驗矣毒鏞所謂循吏出於書生者亦驗而惜乎設施止於此也及巡撫馮公汝駿由浙調贛察知其任命布政司檄令同任其邑之公正士紳僉以還我使君環而請也先生卒不顧浩然而歸歸逾年己酉七月二十七日以疾卒春秋五十有八所著味吾廬詩文存二卷藏於家配王氏子五義修邑庠生義耕義銘義均邑庠生義準孫七人曾孫八人以民國元年十一月葬於鄞東新建鄉包李畧之原

贊曰死生亦大矣當先生之生也贈公使祝史卜之年至五十七八而終嗚呼命之說豈謬哉然君子之死也年不必永志不必伸亦視其人與文可傳與否而已如先生所遺詩文寥寥五十餘篇讀之使人孝弟之心油然而生推之持己交友齊家治國無施而不當區區一邑之長特小試耳猶未能如其志焉天下事概可知已雖然天厄先生之遇而不能厄先生之真性天厄先生之志而不能厄先生之真情然則人之生也真性情又豈可少也哉

擬紹興志王家襄傳

王家襄譜名福球字幼山浙江山陰人曾祖諱元鎬邑庠生祖諱汝棠廩膳生歷任平湖縣訓導瑞安縣教諭嚴州府教授考諱官亮道光乙酉科順天鄉試舉人選授永康縣教諭揀發廣西知縣洊任知府署河南懷慶府知府家襄年七歲生母方氏卒越年又失怙賴伯叔父母撫以成立

自幼有志於學屢試未售棄而讀律光緒三十年以縣丞分江蘇會兩江總督考取出洋官費生家襄中選赴日本學警政三十二年畢業浙撫張曾放徵充全省巡警局參議三十二年紹興始設巡警局時董其事者胡毓筠也被舉爲總理任事盡職邑人稱之旋任省會高等巡警學堂教習兼提調宣統元年浙省始設諮議局當選爲議員地方興革多所建白三年應吉林民政司韓國鈞之招時囊橐蕭然屏斥家產乃得成行抵吉任巡警總辦是年八月武昌起義至吉聯絡軍警者衆家襄知之以吉之軍警多滿蒙人語以革命必水火犧牲無益密陳大吏外示鎮定陰調護之未幾南北統一共和告成吉省易幟而民不擾吉人德之民國紀元被推任杭縣知事兼軍政分府未赴會省議會選舉中央臨時參議員家襄當選及選舉第一屆參議院議員家襄又當選乃辭職入關時政團紛起家襄本爲民國公會會員尋民國公會與他政團合併而爲共和黨家襄遂爲共和黨員二年國會既成立共和黨又與統一民主二黨合而爲進步黨家襄任黨務部長旋任兩院所組織之憲法起草委員會理事是年冬當選爲參議院議長於是開選舉總統會袁世凱當選爲大總統黎元洪當選爲副總統家襄以選舉會主席資格授證書於袁世凱并赴武昌授證書於黎元洪國是爲之一定而袁氏之野心亦漸起矣會湖州二次革命失敗袁遂解散國民黨追繳其議員證書國會人數因之不足開會不成袁氏藉爲口實以明令停止國會職權次年三月政府組織參政員任參政者百二十人家襄亦與焉四年夏皖人孫毓筠等叛設所謂籌安會者意在推翻共和擁戴袁氏參政院本爲諮詢機關其時已代行立法權袁氏更嗾各省區軍民長官地方團體紛紛以共和不能救國宜早定大計爲言向院請願於是副院長汪

大變指定梁士詒等七人爲特別審查員以審查請願文書家襄在院初未嘗發言至此已無可忍乃起而言曰參政院因代行立法而收受人民請願然立法院之根本法即臨時參議院法也該法規定不得收變更國體之請願今日之事除將一切請願書却下外無他辦法全院爲之愕然是日所議遂無結果次日報紙宣布其友均爲之危家襄亦知爲袁氏之黨所不容遂託故出京未幾蔡鍔在雲南起義梁啓超孫洪伊等實爲其謀皆進步黨之中堅家襄之友也家襄既潔身以去所謂請政府召集國民會議所謂國民代表大會組織法所謂國民代表大會總代表者凡參政院之建議決議家襄皆不與焉時梁啓超與人言吾輩擲此聰明才力助人養癰於心何安於義何取於是具有異哉所謂國體問題者一文而家襄奔走呼號雖未能壓抑洪憲之鉅禍而反帝制之勢力固已鬱勃而綿延於各省矣五年六月袁殂黎繼恢復約法召集國會裁撤參政院廣東軍務院亦於七月十四日經唐繼堯等通電撤銷南北復歸統一八月一日國會重行開會九月五日憲法會議繼續開會至七年一月一日凡九次各黨協商至一至再始有地方制度十六條之商定交由憲法起草委員會標列章次提出於二讀會僅將地方制度標題通過家襄斡旋之甚力而反對者乃大譁一律否決且紛紛辭職出京二月德國採取無限制游艇政策吾國抗議無效因有絕交之議三月九日國務總理段祺瑞宴國會議員於迎賓館陳述對外意見十日參衆二院各開秘密會祺瑞蒞會衆議院先通過參議院討論文翌日以大多數贊成通過吾國乃於十四日宣告對德絕交時家襄力主擁護國策嘗與人言正義所在成敗可勿論蓋其時府院政見相左家襄本與黎黃陂相近顧於參戰案則表同情於段合肥謂是非所在不容苟

焉已也五月一日國務會議議決對德宣戰七日咨衆議院同意時府院之衝突已啓國會議員多袒總統段祺瑞乃以參戰名義召集督軍團而議場又有所謂公民團者包圍之於是議員益憤時伍廷芳張耀曾谷鍾秀程璧光先後提出辭外交司法農商海軍總長職未奉批准段祺瑞孤立於國務院仍於十五十六兩次咨請衆議院從速議決宣戰案十九日衆議院復議宣戰案褚輔成謂閣員辭職者甚衆不如緩議卽以此議咨復政府而參戰案遂暫擱置於是政府因解決軍務及研究對外計劃先於四月二十五日召集各省督軍等開會及國會擱置不議益滋不悅更以反對省制加入憲法者從而利用挑撥遂於是月十九日聯名呈請總統改制憲法解散國會時憲法尙在二讀二十三日國會遂羣請黎總統免段祺瑞國務總理職黎允之以外交總長伍廷芳代理國務總理並以李經羲任國務總理二十五日提出於兩院越日通過二十九日倪嗣冲首先通電宣告脫離中央相繼者奉魯閩豫浙陝直先後凡八省也而張勳則用十三省省區聯合會名義電請黎總統退職時黎總統電請徐世昌從中調和徐謂國會若不解散調和無從著手黎又電梁啓超梁以退處海濱與世暫絕答之湯化龍則辭去衆議院議長家裏始終在京雖盡力周旋其間而各趨極端仰天太息而已六月七日張勳率兵五千北上並電請黎總統限日解散國會乃違法下令解散國會因代理國務總理伍廷芳未允副署乃於是月十二日准伍氏辭職特任步軍統領江朝宗代理國務總理副署解散國會是月十三也然家裏仍居京三十日夜張勳等入宮奏請復辟翌晨張勳爲清帝草諭稱張勳馮國璋陸榮廷等合詞奏請復辟瞿鴻機等奏請御極聽政黎元洪奏請歸還大政允如所奏並宣示革新大政九條任命張勳

等七人爲內閣議政大臣。襄聞信卽微服攜帶參議院印信赴天津以參議院名議發通電致討黎總統亦以通電否認歸還大政並任命段祺瑞爲內閣總理電請馮副總統代理總統。七月六日馮副總統遂於南京布告代行大總統職權。段祺瑞亦先於二日在津就職並先於五日親赴馬廐調遣舊部發電致討。未半月亂平時樂啓超實同策畫。家襄雖與啓超爲友但事平之後啓超不主張召集國會而組織臨時參議院。家襄爭之不得謂惟有各行其是共保私交。然從此護法戰爭起而南北分裂矣。政府欲任以某部總長某省省長皆拒不受其後所謂重定國會組織法選舉法召集新國會者皆未嘗參預。寂居都門痛心北方情狀之惡劣西南黨爭之激烈於廣東非常國會會議南北對等會議既未敢有所主張所謂安福俱樂部則絕跡不相往返。其後馮段分離馮氏謀和失敗段氏再起斯時借款累累國民危懼七年五月二十一日因有北京大學及各專校學生請願廢止中日共同出兵協定之舉九月新國會選舉徐世昌爲總統十月十日徐氏就任馮段鬭爭雖止直皖鬭爭漸啓。八年六月南北和會破裂九年七月有皖直之戰南方軍政府又復瓦解各省爰倡聯省自治運動。十一年四月又有奉直之戰奉軍旣敗五月十五日孫傳芳通電主張恢復法統請黎元洪復位召集六年解散之舊國會以謀南北統一。二十四日民六舊國會在天津開籌備成立會議定進行方法。家襄亦與矣。六月一日舊國會議員一百五十人在天津開會卽日行使職權主張取銷南北兩政府另組合法政府。次日徐世昌退位曹錕吳佩孚卽領銜聯合十省區督軍省長電請黎元洪復職說者謂家襄等早窺得曹吳意旨秘密商洽以恢復法統之計畫獻之曹吳爲過渡之計然徵之後日曹氏以五十萬元賄選之款囑

參議院議員楊永泰言之於家裏而家裏拒之獨堅則其非附和曹吳可知矣民六國會既已恢復民八國會於六月三日在廣州通電主張繼續民六國會否認家裏等在天津籌備之國會卒歸無效民六國會漸足法定人數於八月一日在北京開會時雲南唐繼堯先於六月二十日電黎表示擁戴更發兩電一則以恢復國會及總統復職固爲護法各省所主張惟根本解決之方則在集合南北各省代表開聯席會議解決以前糾紛一則以經驗所得及國民心理所嚮集權主義既不適於國情民治潮流復運輪於宇內此時仍惟有實行聯省自治爲救國不二法門胡南趙恆惕於一月一日通電不否認國會恢復及黎復職惟主張首在完成國憲并予各省以自由制憲之權或納省憲大綱於國憲之中曹吳則不贊成唐趙主張謂統一事件應由國會解決反對另開聯席會議并以各省軍人不宜取軌外行動趙恆惕更有與曹吳論國是書洋洋數千言時學者團體之言論勸告國會努力制憲又主張採用聯邦制以免軍閥割據之禍北京又有所謂修正憲法草案請願團者主張將天壇憲法草案重加修正將中央與各省事權劃分成爲一種聯邦憲法家裏歐洲事勢以潮流未便抑壓而軌道不容岐異因建議政府七月一日黎總統爰頒命令大意以地方自治原爲立憲國家根本要圖現在國會業已定期開議將來制定憲法所有中央與各省權限必定審中外之情形救偏畸之弊害一俟憲典告成定能遵守國家統法前途實嘉賴之於是憲法審議會一次通過省之事權應取概括主義中央取列舉主義二次通過各省于不抵觸國憲範圍內得自制省憲地方制度章內應規定關於省憲各原則蓋所以應府聯治要求也家裏時方聯合同志主張此次國會應專事制憲暫時停止行使其他一切職

權且語人曰民國成立十一年無憲法前此責任或可諉爲外力干涉此次開會若不專力制憲或因政爭阻礙制憲進行則國會咎無旁貸願贊許者雖多而別有一派謂宜先解決現總統是否合法問題若是不合法是否承認現政府爲臨時政府而另舉大總統是卽欲以選舉總統便其私也於是製造賄選之時機來矣十二年一月八日如蕭耀南張福來等致電曹錕切勸慎重而一般議員有不恤自貶人格者致熱心制憲一派之主張黎氏任期延長候憲法公布再選總統之議成爲泡影家裏憤恨填胸迨六月十三日黎元洪被逼去職赴津於是家裏又託故出京而十月五日五百數十議員之投票家裏未蒞會也然曹錕篡奪成矣曹錕就任之日卽公布憲法所謂一部份聯邦分權之憲法亦譏之者所謂遮塞之憲法也家裏鬱鬱致疾自此不問國事惟囑中公司礦務署辦則未辭焉迨後曹氏傾覆段氏執政以迄張作霖稱大元帥家裏雖居燕京貧病交迫與一二知己文酒聚會絕不以私干人及國民革命軍統一南北家裏病已不可爲十七年六月十六日卽夏正四月二十九日卒年五十有七綜家裏生平刻苦攻學持己接物一以和平外雖豁然可親而內有不可犯之氣概居議席先後三四年惟以製成憲法爲主旨屢遭波折斯志不餒而卒未能償所願其命也夫娶袁氏伍氏李氏子紹堅紹坊紹垓紹培女六人長適周慶修次適宋鏡寰三適屈瑞四適汪家堡五六待字葬於紹興謝墅燕窩山之原

贊曰國於天地必有與立立之者法也法立則人從法法非因人而立也彼昏不知密絨膝固局鑄以一人之才力心思而欲顛倒天下人之耳目惑矣士生其際稍不自持納諸罟獲陷阱之中而莫之知辟豈不可哀也哉家裏三居議席志不得行獨能於衆所拘忌之地侃侃陳詞又於大

疑大事衡其是非而無所苟不曰堅乎磨而不磷不曰白乎涅而不緇家裏有焉因傳其事且爲苟於自恕者戒也

馮雪卿先生家傳

慈谿馮氏系出有虞氏齊五侯上大夫之後至漢莊憲公閔始奏置宗院以主宗事其時宗派一十六支句章一支乃莊憲公四世孫忠貞公冕漢末爲句章錄事參軍府中尉生三子善光善慶善寧以避董卓之亂卜居句章爲其詳見於宋寶慶間裔孫繼新宗譜序所謂馮氏表名記善宗譜是也由是綿延迄於茲以德行著以文學著相傳弗絕余考諸史徵諸志乘於隱逸之士獨寥寥焉今得一人以藝隱曰馮雪卿先生倘所謂軒裳珪組不足勞其形憂患思慮不足勞其心者乎是烏可不傳先生諱灝別號臥雲雪卿其字也宋禮部尙書文直公毅齋二十三世孫曾祖諱光祖祖諱个臣考諱煦妣沈氏繼妣陳氏生周歲妣歿賴繼妣鞠育之性穎異及長好學不倦尤愛書畫金石年二十六是爲同治己巳之冬遂慨然有志於學藝出游滬上書師錢唐吳鞠潭畫師嘉興朱夢廬相與爲友者任伯年胡鐵梅舒萍橋也其行草及山水花鳥法晉唐宋明諸大家皆能造堂奧顧猶以爲未足歲辛未秋始走京華尋師訪友與惇親王弈齡及杜故相受田之次孫庭璆氣誼相投因得與諸王公大臣游爲人偶儻天真爛漫喜議論抱不羈之才而非求用於世者惇親王嘗勸之從宦輒婉辭以謝其志可知矣歲乙亥更由京之鄂之湘之川之閩之粵之東瀛既遍歷名山大川以廣見聞而藝學益進居東瀛四十九年愛其山水幽雅足以助詩情畫意且其地士女多講求書畫一時列門牆者不下數百人如隴野雨香如神谷千春皆女士中之

錚錚者咸慕先生名而來就學蓋知先生於書畫鐵筆外復精佛學與少林術彼二人者固傾慕我國學術舉形上形下乃文乃武而有之又藉印度哲學以發揚至理而先生能得其秘者也於是先生姓名載入東瀛畫譜絕詣傳於海外矣吳鞠潭贈以文云勤學礪品夙好鑒藏始有研癖嗜胡鐵梅贈以詩云倒峽懸河筆一支流傳三絕畫書詩多君爛熳生花舌海外逢人說項斯王治本贈以饒有轍趣四字且許其無一些俗氣望之似神仙中人然則先生之所以成其名者豈偶然哉先生以民國十五年夏歷丙寅五月十一日卒距生於道光二十四年甲辰十二月三十日春秋八十有三娶錢氏繼汪氏子彥聞錢出孫乃嘉亨嘉曾孫懿時懿正懿咸懿壽懿豫懿昌葬於邑東花嶼湖之原

贊曰孔子有言君子疾歿世而名不稱焉又言君子無棄寡無小大無敢慢斯不亦泰而不驕乎夫名之成各隨其分心之泰不限於地牢云予不試故藝子路聞子欲浮海而喜彼二子者雖不足真知孔子然原孔子疾名不稱憂心不泰之意固不得不謂之有見也今先生勞勞奔走日夕不遑終身寄於藝術之中雖遁跡海外而罔恤惟不外慕斯能得真名而心益泰乎先生之生於茲百年矣其流風餘韻猶令人低徊留之而不能去歿世之名固君子之所必爭者也余故樂爲之傳以表其隱逸之志且以見術業有專攻非好之篤嗜之深烏能成其名乎哉

陳萊生先生家傳

君姓陳氏諱家錕浙江鄞縣人世居鄞南鄉走馬塘後分居城內倉基宋名臣諱禾諡文介二十

一世孫也祖諱安塘考諱定春生二子長諱家鑑次卽君君爲人自少有大志年八歲誦三百篇琅琅上口受經畢師兼課唐詩尤心愛之稍長復工韻語因上朔蘇李河梁贈答暨建安七子下及晉與南北朝以窺宋元明清諸名家獨以性靈出之故於詩卓然有古風其爲文也多奇氣不拘於義法而以詞章攷據勝甫冠入泮旋食廩餼貢成均屢應南北鄉試不售遂絕意進取始留燕京繼客滬濱與名流相往還蕭山湯蛰仙先生尤器君酬應文字多屬之時上海創設中國圖書公司當事者慕君名挽蛰仙先生敦聘任編輯於是有中國農業史工業史商業史今商務印書館再版者實君所草創者也自中國圖書公司合併於商務印書館君遂從事教育初執教於上海中西書院凡六七年繼執教於杭州蕙蘭書院及育英書院歲在庚戌英人費佩德始創之江書院其地傍六和塔占錢塘之名勝大江曳練於前羣峰環屏於後奇秀之氣四溢君性喜山水居而樂之自辛亥以迄丙辰膺教席兼長教務者凡六載嘗曰自西學灌輸學者之目光恆多偏射試問地球十餘強國曷嘗有甘舍祖國文學而專治外國文學者乎教科宜折衷至當勿任學者有側趨之勢藉以教學者之病學規則取寬嚴之適中學科則期勞逸之合度並以時起居以時游息節止使毋稍過嗟乎如君者誠得教育之道矣故從之游者多傑造之士至今猶嘖嘖人口君爲人倜儻每當良辰美景輒頭春香舉杯屬客彈詞弄曲晏如也工隸書山水尤嗜畫菊雖盛夏輒揮汗應之所著輯廬文存詩存各一卷藏於家君以同治元年壬戌六月初四日生以民國二十二年癸酉八月十二日卒春秋七十有二配麥氏繼配嚴氏喻氏葉氏嗣子學溥女三長適羅次適錢三適沙孫四葬於鄞西鄉任公橋畔其兄子學濂乞爲傳余爲之敘次如此

贊曰讀君所爲冰壺先生傳云先生之爲人富貴者招之不來貧賤者磨之不去其君自道歟余耳君名久歿逾十載始得見輶廬詩文之中如攷函谷關主王伯厚之說以靈寶爲函谷攷古婦瀛謂指石罅非盤蟠千蟠攷曲沃則分河南北皆精核作金孝子于烈婦傳與烏春草傳丁張二孝子邱張兩節婦同詩之中感時爲多其詠四獸不啻吞月子之擊狐傳也蓋生不逢時中心憂悼而一一寄之於詩文執教三十年士皆歸之嗚呼忘懷得失以此自終如君者又豈世俗所能及哉

方君選青家傳

余伯姊歸鎮海李如山如山仲妹壻則方選青也選青席豐厚而行敦飭又好黃老家言知攝生術尤慷慨急人之難余嘗歎以爲難能久與之游遽哭其死可謂也其孤傳沆持狀乞爲傳雖不文寧忍辭按狀君諱啓新諱諱積銓姓方氏選青其號也方氏先世居閩之莆田宋時有諱軫者官於鄞因家慈谿之鳴鶴山再遷鎮海之柏墅遂爲鎮海人君祖潤齋先生用貨殖起家義行著聞上海之有四明公所先生始之考黼臣先生繼志述事家益隆盛生四子君其仲也性仁厚與兄式如弟叔陶季揚最友愛自黼臣先生捐館式如出爲幼鹿先生後家事悉由君任之方氏以懋遷著於時凡蔗糖質庫錢肆之屬世傳其業而錢肆設於滬濱者四設於甬上者二君顧不屑屑家人生產而有事乎詩書又能不墜厥業因時推變督教其子益弘大之儻所謂擇人而任時者非耶嘗謂鄧禹子弟使各執藝非惟守業且所以立身也因使傳沆從德人寶伯來受化學傳沆既精其學爰設化學工業社及國貨公司不獨弘其世業駸駸能持商戰之籌而收裕國之效

矣余每慨五市幾百載出與入莫之衡天下攘攘羣玩巧而事末國以是蒙其病而或莫之省也彼務長子孫守富貴者則唯較銖黍競錐刀效賤丈夫之爲然則如君之志行寧不足稱哉寧不足稱哉君垂老既絕塵氛日以蒔花藝木自娛會海上變起君憂憤成疾竟以民國二十七年八月十八日卒距生於同治十三年甲戌春秋六十有五配鄧陳氏繼配同邑李氏梅塘先生女也側室歸氏陳氏陳氏子二長傳沆李出次傳樑陳出女三長適慈谿裴光煥餘待字孫二之渠之渠孫女一

贊曰昔太史公傳貨殖稱陶朱公治產積居與時逐而不貴於人君與友同貿易喪其資獨任之無吝色又喜講求醫學遇貧乏勸之醫而君任其費無識與不識皆然也君貌瘦弱如不勝衣臨大事決大疑定論不可搖惟宏毅者能任重非仁厚無以發身彼性天之所篤固如是夫

李節母王太孺人家傳

李節母王太孺人既卒之一百四十七年歲癸未夏玄孫維錫錄其伯祖恭安遺墨撰爲行略命其子厚瓊持書示壽鏞曰子爲余家序譜綴及我高祖妣守節事略以爲兩家淵源之有合而皆起於節孝天之報施善人於斯見之然子已能言其略而爲之孫玄者不能道其詳紀其實將何以揚先德昭來茲乎況維錫行年八十二矣幸有先伯祖遺墨在爰敘述以投諸子子其傳之壽鏞肅然起敬雖不文奚敢辭謹按鄞縣志列女傳王氏李世昌妻夫亡守節三十七年乾隆四十七年旌攷其時節母健在徵諸事略蓋自乾隆十五年庚午世昌公卒距節母之歿爲嘉慶二年丁巳實守節四十有八年當乾隆四十七年歲壬寅已守節三十三年志傳誤三爲七云節母少

世昌公十一年孀居時年才二十六子昌乾昌坤均在襁褓中適姑方太孺人雙目已瞽家有園田八畝且質於它人歐陽子所謂何恃而守者情景似之節母有幹才送死養生一身任焉先捐攜服飾以贖園地更織蒲爲屨以所入糴米及昌乾八歲卽命學圃晨起肩菜鬻於市歸則督令灌漑而其織屨也日四雙可易米升有半歲時佳節及祀期必於旬日前增織蒲屨一雙積至十始餘五六十文供祀事及奉姑甘旨秋冬日短益以夜作無燃鐙資輒於月下操作苟非月夜則借鄰壁光如是者十餘年其含辛茹苦支持家政豈恆人所能及歟節母旣以持家在治生又慨然以爲能養宜能敬也李氏世居潛龍漕族旣衆賢不肖遂不齊其姑旣盲一日扶壁而行經中宅東衙有出言凌辱者與之辨竟揮跌於地頭破血流節母聞之馳往救憤不欲生告族人曰我家孤兒寡婦刻苦勤儉以侍奉老姑人同此心心同此理不矜憐之而欺凌之是可復忍乎族人於是仗義執言聲罪質實彼無禮者服罪而去人以此益敬之平日侍奉雖疏食菜羹必先以進然後分食二子凡可以娛親者無不爲也其孝親有如此者能養又必能教世之溺愛其兒女而不能正之於始者亦多矣節母之督子也嚴當其子昌乾幼時習茶歸糴米不足額大斥責昌乾以實告曰因飢購一餅充腹故少錢一文節母曰吾非惜此文所以責汝者防汝之漸也凡人之操守必觀之於微耳且居必擇鄰不使稍有濡染有孟母三遷風由是二子益自奮昌乾年稍長每逢八月命往餘姚捉花捉花者木棉成實之時代地主採取是也以所傭值購棉而歸紡紗織布以益所入而昌乾兄弟服勞維謹其所以訓子有如此者昌乾年二十入半邊街彙春鹹貨行充棧夥昌坤亦就業爲帽司時節母織屨植蔬猶昔也子婦或勸止之曰吾業是久矣吾豈可

忘本乎願積而聚估之不待二子負販矣昌乾年三十昌坤年二十八先後爲之完姻昌乾之配盧氏卽幼年童養以佐節母織屨與操家務者也乾隆三十六年生孫恭安明年姑方太孺人卒年七十八節母率子婦居喪盡哀衣衾棺槨較之世昌公之喪加厚焉鄉黨咸嘖嘖稱之曰微節母之支撐烏足有財以悅親乎乾隆四十七年有司上其事旌於朝里之人更相慶曰禮亦宜之節母晚歲茹素誦經每日往無相禪院禮佛有恆課既老不倦以嘉慶二年丁巳某月某日卒距生於雍正三年乙巳某月某日春秋七十有三嘉慶某年某月奉主入節孝祠鄉里戚友相率稱頌不置衢巷喁喁走告曰惟節母之賢而有才以濟之故能至此與世昌公合葬於鄉大孟橋子二昌乾昌坤孫恭安等曾孫某玄孫某來孫某

贊曰自禮重陰教詩書所載姜源太姒無論已而江漢之女不可犯以非禮卽見周俗之美反之婦無公事休其蠶織卽可知周室之所以東劉中壘傳列女以謂王政必自內始曾南豐推其說曰士之苟於自恕願利冒恥而不知反己者往往以家自累故也以今日之生計言之固千百倍於一百數十年以前而未可相提並論然觀於王太孺人憑入壙之田園且藝且織上足以奉遵姑下足以撫弱息養親而能敬養子而能教卒使二子成業終生送死無憾變而通之是亦堪爲天下後世法矣故過其地者猶招之曰此節母種菜園也此節母織蒲處也鄉之人莫不加敬斯非有忍其乃有濟乎抑讀韓昌黎序張中丞傳深惜許雷兩家子弟材智下不能通知二父志今李氏有賢孫玄使其先人潛德歷久不歿韓愈曰莫爲之前雖盛弗彰莫爲之後雖盛弗傳不益信哉

財政部庫藏司司長李祖恩墓誌銘

自共和肇造以迄國民軍統一南北之前旅舊京者上而公卿大夫下而輿臺莫不知有李祖恩者祖恩自爲謀也少而其爲人也多此十五六年中內亂靡已國家時困於財然猶未敢縱無窮之欲橫征疾費以取怨於吾民移東補西悉出於賒歛一途不足始益之以楮楮之消長則責銀行爲之備而其間非有和與信者周旋其事輒閉閤而不相通顧任之愈專而應之彌苦嗟乎是乃所以爲祖恩者也祖恩吾伯姊之長子名光啓少敏捷嶄然見頭角性好動方九歲來吾家一日思取物小狹江上託故外游不三時即返吾家居月湖側蓬舟排列偶嬉戲所維繫者悉放諸中流其舉止簡直豪縱自幼然也一應童子試不售入學堂肄業長於法盧文字年十八留學英國倫敦治政治經濟學越三年返國任郵傳部主事會光復入財政部充公債司科長晉庫藏司司長幣制局參事其先嘗任漢口中國銀行行長其後則任印刷局局長它兼職者不勝數凡其受事大抵皆際危難公義所激私情所動故人皆鑒其志而稱其勞日常奔走駭汗夜或夢寐中輒呼某某喃喃不休戊午冬余由鄂調部居燕四年乙丑重入北京或與同居或日相過從固嘗目擊之矣夫以祖恩之嶢然出其類使不爲人用而專創一業必有可立者在也迺鞅掌風塵以至丁卯國都南徙浩然而歸歸時余方副部務不忍更以相累于是祖恩遂得盡心養其母且以餘閒致力於礦若工其時六河溝煤礦天廚味精廠方在蕪蕩中私憂竊歎以爲曩日理財皆不從根本設施是猶無源之水今若舉已成之業不爲善其後益使人視事業爲畏途爰遁出而肩任之病中於六河溝事尤拳拳不忘其實心任事類如此天性仁厚事父母至孝父母在凡可以

博父母歡者無不爲父沒則益專之于其母家庭之責往往一身任之教育子弟尤視爲先務之急雖在伯叔兄弟苟有可以相助者必盡力以赴而兄弟無論矣親朋偶告乏必傾囊相與己之有無不恤也當吾伯姊沒時余實侍側祖恩哀毀之餘私竊語人謂幸獲送母以終聞者怪之嗚呼孰知其卒距母喪未六閱月也是可傷已李氏其先由閩來明卜居奉化之江口南宋多以文學知名禮部郎官諱元白其尤著者入元有曾孫信之者避地鎮海之新堰頭數傳而轉徙小峽口遂爲峽江李氏曾祖諱容是爲也亭先生黃岡洪良品德清俞樹銘其基祖諱嘉是爲梅塘先生桐城馬其昶爲之傳父諱厚祺字如山寧海章榘銘其基曾祖妣樂氏彭氏祖妣張氏妣張氏卽吾伯姊也余爲之傳世德作求可攷而知今綿延及於祖恩而爲基誌者其子乃乞於余蓋以知祖恩者莫余若也祖恩生於光緒十六年庚寅八月十五日卒於中華民國二十六年丁丑六月初一日年四十有八配同邑方氏廣東瓊山縣諱紹震之女生男子子二人長民偉日本早稻田大學修業東京鐵道講習所畢業次民漢滬江大學畢業文學士女子子二人長燕雲滬江大學修業適鄧張景明次慶雲復旦大學修業適吳興吳季和孫五人維綱維紳維紀維經維綬孫女三人以民國三十二年六月三日葬于上海市法華鄉霍必蘭路永安公墓銘曰

氣邁而堅方飛方騫自爲則拙人謀則淵胡抑其志遽嗇其年志固不滅年實在天我懷瓊瑰克紹其先銘茲塘石以勛後賢

約園雜著二編卷八

詩

哀季弟兼自述十二首

用陶淵明雜詩韻

歲時嗟條忽天地起風塵顧皆悲境同胞賸予身我生逢丙子廿五失嚴親庚戌摧慈竹吁嗟
淞水鄰丁卯傷仲弟骨肉不重晨祔歸哀去歲今又失斯人

斯人病歿江而我歸峨嶺欲向牀前言共知塵外景無何膏肓深服藥熱兼冷氣體本單羸况纏
二豎永忽焉伏枕號恐慮分形影曰德多未耐斯心靡所聘弟昆無報施慰弟養宜靜

弟心常失厚弟度未堪量荆樹原連理蓮心亦共房後生豈先死縱悴未遽央樂天且知命剝深
必來陽誰知一霎時使我裂心腸

人生本無涯夙昔不知老遭遇忽非常朝暮若難保昨夢何不祥前一首夢魂已不知不覺揮淚已乾燥我實
忝爲兄教養嗟未早樂趣鮮家庭隱憂滿懷抱忠厚博虛名往事不堪道

憶昔我祖慈曾無一日豫課讀挑秋鐙撫雜翔鳳肅先君愛奮興飛黃騰突去書箱縱有基又生
後嗣慮積德乃久長積金總不如廣廈與高軒忽焉非我住教督惟諄諄用心在此處五世澤誰
綿念之益生懼

我母生富家布荆每自喜先君方課徒母躬烹爨事京曹二十年相從未得意大椿遽爾凋黃巾
又復值時年匪歸來每淚含十載光陰駛養薄祭不豐小子傷棄置

嗟哉痛鮮民飢寒復我迫滬瀕彙筆時吳市吹簫陌仲氏守施南板輿楚雲白當年博母歡路艱心不窄而今怙恃亡羞為名利客歸耕欲終身家無舊田宅

無功愧從官支計始梓桑既非季路米聊伴孟光糠轉鄂又三歲仍無一宿糧慷慨入幽薊粟碌辭漢陽忽捧鄒魯檄龜山蔽何傷遭逢嗟不偶愚拙失其方一官本久厭惟欲近醇醪

吳都賦再熟朝雲更無端王孫惜落魄九年時序遷酒漬杭州舊骨埋西山巔骨埋復發掘念之不忍殮兒女多反累鴻泥亦夙緣我心終不負惜逝寄斯篇亡妻顧氏常為人作我九生一千三

重攬西湖勝往跡七年稽龍蛇大陸起時奔走世事等危崖一官如敝屣用以暢吾懷越年尹淞滬又遇塵埃彌重修墓生育才國之本三樂原不離經營十四載不恤身為羈一旦風雲驟遂令

日月虧光緒大學堂督學十四年去歲校舍落成

昔佐度支使世風挹炎涼吳月先看罷先辭紅幕財東鄉獻逮津梁文翁思化蜀此四州住

春申作故鄉兄弟重相遇不及話風霜如何病不起悠悠恨彌長

本是同根生吾子為爾子二女方營營門庭聊可倚悼弟且自憐俚言無文理

詩付星聯用前韻明實子韻

深崖有老松子落成實聿追祖肇端田硯與耕筆長子汝星聯訓以凡民匹汝謂士宜豪我持疏廣術憶汝呱呱時我年二十七冊載駛駒光艱難時戰栗為業非以官存心惟濟物

願我亦非他喜汝矢忠實鹽官十一年陟險仍彙筆取巧非我兒激退勇無匹易父重見幾作者況人七汝不受其軀風塵復碌粟精神用愈多慎毋役于物

余方和陶韻述往事星聯見之極喜因以淵明責子韻漫吟二首勉之明年正月十二日星聯四十矣深喜二老康強兄弟怡怡得以奔走四方而余欣然於諸子各求自立諸孫聰秀將傲義皇上人矣雖然天公厚我祖宗畀我非倖而致其各勉之又勉庚辰冬約園

詠楊見心宋元輿志題識叢錄

用昌黎石鼓歌韻

楊子示我輿志錄題識不足更詩歌蒼萃宋元冊九種其它散佚可奈何散佚猶自存其目龍文不使失雕戈粵稽禹貢言物產周官士訓更研磨蕭相經綸收圖籍班馬八書十志羅魏晉六朝代有作李唐吳郡最嵯峨昌黎入粵圖經借蠻疆迢遞識山阿五代錢王撐半壁石屋經轅兒神呵君迺搜求始天水佞宋志在無虞訛掃除今古文聚訟珍崇金石隸與蚪結撰精心三十載庖公堪慶鼓奏鼙新安愴感渭陽澤煜煜豐華不改柯幼抱楹書勤紹述壯視名僵如擲梭雍錄作於淪金後恢復中原無委蛇左氏述志最精審惠惠悠悠賦義娥嗟余與君世相契有懷先澤涕滂沱昔歲精刊訪士禮君獨補我以宣和余得士禮居書惟宣和遺事我搜鄉獻君輯志盈盈一水進同科十年以長宜兄事十年我訂學案未足多吾謂宋元輿志余曾訂王康軒宋元學案前道五年始成書可憐風雨難鳴日茫茫世事付銅駝人生百年會有盡著書歲月非閒過舊學商量期遼密安得暮朝相切磋晉時甲子陶元亮漢將精神馬伏波文章淵懿博兼雅箋注源流薄奇頗吳越人文稱獨盛旁及秦楚與其他臬堂選詩以人重考訂毫不事嬌嬖臨安碑目稷山刻關中殘石亦摩挲左圖右史資娛樂金書玉簡供吟哦景仰新都丹鉛錄日坐蒲橋綴黃鶴片羽吉光勤搜剔雲煙過眼一剎那補亡訂鑒任斯責不顧此身歷轉軻古今匝地有遷變兩戒守此舊山河我讀君書增惆悵老來秉

燭散選疏

古確室歌

維昔之富不如時維今之疾不如茲富也疾也剎那耳不尙有舊召晏詩舊豈拘泥古典籍噫乎
 瓊契與皋夔况復神州環海九陰陽鑑炭壘新奇天柱已折河梁圯迺欲持符鈴其癡我癡君癡
 兩併合無地樓臺空自欺我笑約園園何在君驩古今古豈追抱經天一雲煙散木難珊瑚存者
 誰歌半主人拂袖起曰自倉公文字綴天粟神號局輪啓湯盤孔銘爛厥施秦燄終難鏤絲竹千
 秋物則而民奔深藏時可供老宿嗜古歐陽性顓斯足吾所好玩吾老垂垂髮髮已成絲余俯無
 言蒼茫顧天下大癡我與而東更有館曰通藝抑何光怪亦陸離君驩今今更驩古項煩福地福
 無涯此確此福人莫奪微獻徵文取用之余刊四明叢書一幅畫圖涵萬象太炎大千筆淋漓君
 好賓朋且置酒取次不求甚解詞

伯岸老哥屬題爰作長歌以應久不作楷筆極生硬幸老眼無花也壬午暮春

題先父賜伯姊扇面遺墨壬午夏

五十四年翰墨留喜將庭詰作孫謀男婚女嫁時方始伯姊已丑春出閨乃吾父士學農耕澤獨悠中

所屬員勤於耕士勤於學女勤於工所以無憾者至矣十載家書同梓腹吾父自庚寅迄己亥十年一函諫棄亦珙球寸草虛糜已刊

即今小子成詩史珍重葛覃勤儉修伯姊史闕發周家之興即在此太叔

思嬰屈子況生辰維五月二十九日生念母孟郊寸草春吾父託以寸草名直生日後向慈容結蕩仁風離

鳳翼清剛仙骨老龍鱗同時困學丹鉛舊戊子前僕吾父曾庄今日謀觴藥棗新吾父又往彭璧寶久

知藏可散

吾父嘗爲通議韓昌黎作書書堂開南壽此銘紳

吾父爲伯姊題扇時在戊子初夏猶寓京時比秋假歸賃宅於縣學前柯宅旋復返京明年春伯姊于歸李氏此扇舊品也祖基諸甥珍之裝璜成軸附以滇南繅女士花卉卽此扇之背面亦藉此以見賜物之全耳子孫其寶諸

題虞和欽蒔薰精舍圖用杜工部樂遊園歌韻

西山風月何蕭爽薰兮蕙兮滕薛長道園韻事屬君家陶邵雙庵麗合掌老彭妙筆能傳神太行幽意此堪賞偶對翠微還讀書青松夾道爲排仗我亦與君少年游久恥文章互標榜相期願作太平民坐看蘭階秀色上那識蘭芳猶昔時荆榛滿地遽生悲但聽哀猿連臂叫問天天醉天無辭滄海橫流震盪甚區區何足擊皇慈留得此圖勤拂拭浮雲南北少陵詩

少陵詩云見身如醉天無辭滄海橫流震盪甚區區何足擊皇慈留得此圖勤拂拭浮雲南北少陵詩

六十五歲生日

一角天涯寄海濱榴花六十五番新歐陽聊葆平生志
歐公六十五既休致各門生日其平生志歸焉後生極重豈唯有退以全晚節乎康節權爲快活人
郭康節安樂今日爲快活人六十五歲何處容身天宇小儘看奇態夏雲真殘書破硯空齋老爲有兒孫未算貧

題天遊廬詩

和陸其韻

停雲榮木學陶歌

余方和陶詩

忽有諧聲舊侶過何許吾廬空宇宙

君有吾廬詩云

寧無淨土挂山河

又君

有詩云新土君真下筆狂傾海我笑園城屋補蘿丁卯七月君有園城屋補蘿
本詩各及余同是年十五年年前憂患事龍潭猶喜見晴波

贈錢士青七十

一瓣馨香錢武肅泉唐江上又逢君當年鹽筴紆籌筆壽世經綸在誦芬漢水不波千氣象海牙猶夢息風雲最難城外絃歌地笑說先生是廣文

游蹤南北壁題詩儒雅風流總可師我愧十秋身亦隱君珍三寶老彌慈吳山越水光先德薛鳳荀龍競秀姿洛社七旬年尙少渭濱佇看太平基

壬午夏光華同學來會戲作光華歌

用韓昌黎石鼓歌韻

一堂鏘濟光華客謂我宜作光華歌諸君意長義鄭重其奈頭童齒豁何憶昔六三血淚漬吾黨同揮魯陽戈十七年來銳進學於今志氣豈消磨況復門牆桃李徧天南地北羣才羅中山路上朱門兀錦官城外巒舍峨源泉滾滾宗大海鳳皇翺翺耀卷阿當年鷹掠爪牙折今日雞鳴風雨呵絡緯空吟厭嘈雜蜘蛛結網無差訛秦燄終難鑠絲竹孔壁猶堪藏蚪蚪不見干城置蕭兔總由豐鎬鼓成鼙夏師賢弟真投漆白鹿匡湖恍夢柯天地悠悠愴下淚縷絲一一織於梭回思革輅開疆日羔羊退食勤委蛇躊躇萬事財爲母嚮歌市上同韓娥珠履三千應者少邛須海濱與江沱募金不足爰舉債大地凍釋春風和築之登登約閣閣植棠經歲便成科安得萬十皆廣廈竹籬茅屋野情多雨淋日夜全不管風霜脰練見明駝慘澹經營合衆力流光如駛五年過昭德亭成慰王叟童碑錢銘供切磋勸哉任道惟弘毅宗慙氣排萬里波格致誠正張吾幟知行本來兩不頗擊鼓一聲忽異色相將避地計無它舊巢小別重棲燕雄姿逸態羞嬋嬰十年差慶椒聊實豐壽堂中冠珮摩科學健身館巍巍病來療養免呻哦月滿忽虧花石暝吁嗟挾彈射文鵝輜

銖積累十三載霧散煙消一剎那地窄雉飛雖帶箭奮刷羽毛忘轉軻信知君子法天運淨洗甲
兵造山河長歌激越聽者喜曰吾流輩敢蹉跎

和李木公自況韻兼示恩廉

一別小蘇又五年

與蘇淵明別後已五年矣

老泉和易寄詩篇

蘇老泉詩論云曾治然而無思和易而便求以從事於此

不須衡麓尋仙侶但

讀聯經使俗捐到處風塵聊作客老來棟鄂喜分賢家鄉我亦思歸未況復兒曹隔海天

勁剛書法柳誠懸不讓文豪太白專流水多情桃葉渡君有柳詩傳我前尤健每傲霜晚節菊花憐香山九老年

猶少蜀水五丁夢莫牽欲問天公天不醉春光漏洩到梅邊

憶昔贈寧波公報

用杜少陵體昔第二首韻時吳未季夏

憶昔一千八百日

於公報始於今五年

歲月艱難嬰記室山甫吐茹兼剛柔陳穎商量及事實不啻洛陽紙飛

昂佗求莊卮言日出主人殷勤徵我文我欲相酬恍若失自笑梓桑亦敬恭惟與往賢結膠漆鄉

書編綴十三年風雨晦瀟瀟勤不律百五十種先棗梨其年而先出版余曾以編輯四明叢書敢使古人湮

心血曹詩徐志今編校陳公鄉諺探其穴

宋曹詩選先生集有徐王志六卷才已於定陳公先生康漢有詩餘集先生時

大因者均已編刊此外如定海黃元明先生以周十新書與昔宋槧齊梓工簿粥不待說以今紙價計之每本書非

異後錄及宋衍信遺文等皆納入於第八集楊張二乘病未能宋元六志昔時物泉先生刻之今余既刻黃南山曾讀其志而楊氏實成化等志及張

香海齋安得鄉人分祿秩俞樾友中有好義者約出資五轉羨里聞日日新鷹隼不嫌風霜疾

輓方母王夫人

井引

夫人王友萊侍讀二女也侍讀與先君子先後入詞垣憶辛卯壬辰間余侍親燕邸寓康家胡

同侍讀寓鎮海試館相隔僅一巷余嘗執世家禮往見忽忽五十有餘年世事滄桑而余亦老矣茲者夫人西歸子勤子藩述其母夫人懿行余檢寸草廬贈言有侍讀題先祖母旌節詩敬用原韻輓之顧侍讀為五古余詠為五律聊伸竊取之情以深懷舊之意云爾

惆悵東華道瞻依侍讀儀漢書勤註日侍讀儀漢書勤註日季女有齊季女有齊時夫人十二歲以義馭雖云邁靈根豈

曰萎教從庭誥授法本祖堂慈夫人學佛實樂只鐘琴協于時蘋藻尸婦身兼子職戚鄰慰輞飢撫

育如春盎薰陶廢夏答羣雛翹遠翮別鵲賦悲辭大地山河幻人間煩惱醫卅年宏梵典三寶作

糧資福德隨情種恩施蠶產支娑婆悲世界慧定入心期講錄隨聞見夫人講經於諸經啓

識知歷歷在掌最難名剎地如願及時為于靈巖東麓廣濟寺諱藹林懷樂建安樂林為英

英雲煥于白雲堂如何功甫滿空使望生悲軼轍材同秀劉樊樹渺思飄然華蓋引夫人諱林有

去絕志俗塵羈淨土今修到香珠豈莫追韓公示疾以梵香從知祇樹近莫謂綆如縻

題汪宏聲藏海日樓遺墨用題扇原韻

試歌變積成篇句先生有寒面橫門難書連橫正是先生高隱時細字札留銜袖去贈石道神云奈何

去蕭關水漫望雲思趙處首黃何斷雲雲詩句源流久熟蒙疆史先生有零落我深浙志悲甲

已新省修志先生為總纂時余司新計適奉微服至至為之集集約款其五年故事比王成再訪新詞及志事知新

在新編振綺新有振綺堂汪氏藏其裝潢成百衲昂頭海日挽西馳

沈子培先生諱曾植別號乙盦浙江嘉興人光緒庚辰進士歷官安徽布政使署巡撫先生治經精小學治史熟遼金元三史西北地理融通貫串探討所得多出前人畦經之外詩自宛陵

山谷諸家上而躋其奧卓然自開門庭其爲人也布帛菽粟藹然可親著作極富余所見者蒙
古源箋證流寐更題跋海日樓詩集而已

附之盒題湯家詩云 蒼涼六代青山色慘澹三灾大劫時詩窟尙留遺墨在雅材空復昔人
思稷城祭酒行焉向洛下書生詠自悲那似丹青長照耀吳戈犀甲國殤馳

爲史北琳題二老遺翰

註集例帖一跋或半月與於不如今向未可知也此札神府考不知向可被力否唯老兄助之彼府中來便故一言之同老
下弟教力病頓首帖二家信及徐書後俱領到領使者見而心甚不安老兄當有新著可見示否弟近於經書多有與
前帖一二而苦其病近因欲修志新書事強來致語解之行三向不食已獨得有關工夫讀畢雖也直可一笑焉老兄
集時先期山知有如雲面忽忽防從來貝項少一醉亦當談詩三東湖楊外氏甚往經即及三章朝開郭郭神來星思思沈
所與一紙書一紙書從後分白通遠合法內詞繁雜他不但此處添容書山容淨幽靈覺可等悼亡亦有劍連潭
更無軍國恍惚下緊愁事而吟人生同此劫安與古和今境目湖光森森風動心較枝枝作淚凝結怨生音調草吹香
異山遠走勢辭辭看影影懸懸不盡禁其三情花謝草黃豈是食野無一物飲花神才公故遺囑若范風雨朝來誠却
奔其四老錄宗室桂陵友地甚空桑不以駁遺我於下不以易三公士
大夫均知此味而百姓易有此客矣已季冬月蘭舉子更於書帶草堂

遺墨飄零三百年不教魚蠹食神仙堂前書帶新詩本

雨裏藍溪小洞天

宗薑桂老縣田

四明山寨等迹遭阿護斯文欲額天遺獻我慚千卷輯

張書倪盡神情並

淵源再世證詩篇

焉又有大禹梅峯畫再世源於此益農梨園書中謂禹老者蓋明季集社互呼焉老倪梨園序禹梅峯亦解吾友且稽諸集州年譜公六十七歲葉安人卒焉禹梅作墓誌銘歲禹梅作志繪集序七十一歲自訂南窗文集禹梅序之文字之與合倪偶然哉鄭平字瞻詩大觀得觀高風已有年山川管領神仙幅中第幾何須廣谷口雙友別有天爲入骨快煙溪溪面來江蘇葉田田眼前景物都收盡真是詩宗百尺類生平無事不地遠呵壁置來飲問天方仗如合真百碎盤人便爾只三逆頭眼不信雖然老伴何人世亦傳華足先生多假借終懶拂于十三篇大節禹梅峯畫後學政府吳龜年詩庚子分買頂仙花到葉聚成鬼符村寒楊柳邊天春光已入簾亭笛燕子爭銜細雨田不長病中多感慨此生豈易至事類

題鄭江送別圖并引

史君兆琳以所藏鄭江送別圖屬題攷鄭禹梅五丁集有秋郊餞別圖記爲季野貞一作也初疑與鄭江送別或非一地一時及細讀記末所圖之人與所執之事須俟歸時按圖而記恍然於記中所云介眉雖有翰林乞假歸尚未入里者爲記憶之誤介眉陳父同里八月入不然或介眉是日不得預而於繪時加列焉未可知也然則其地爲黃過草堂其時爲己未之八月三日其人則介眉而外又復相合固不必更有所疑矣禹梅能畫王文三請爲秋郊餞別圖圖未成而記作於次年之八月今此圖乃陳克諧韶所繪克諧嘗客西湖從謝彬章聲遊得其術妙於傳神林吉人信善書法季野一一指示其人而此十五人藉此圖而得其形貌以傳真今二百六十五年矣誠藝林韻事也斯時也果堂五十八爲最長介眉小同均四十六禹梅四十三季野四十二貞一四十一子政三十五文山三十有斯二十六東門十八爲最少此可攷者也外此允誠則四十四五直方則四十一二和仲則四十左右志呂德符均未滿三十也此證諸先世或其兄弟年齒約略而知之總之斯十五人生有自來雖果堂亦謂之賢公子也可余老矣念昔先人深慚負荷既得展覽斯圖依依不舍余因攷其生平人各繫以一絕聊表景仰之私特愧詩之未工耳其序次依圖由右而左倩善畫者臨之癸未人日

陳介眉錫嘏又號怡庭東垣孫文典子康熙乙卯解元丙辰進士翰林院編修著有卷山集集鄉志有傳

解元翰苑一黃梁依戀白雲歸故鄉清戊午舉領修自庚子未建呈其子成咸以戊午鄉舉封翁與經學於斯重振響于無所於式修舉其弟青銓半夜兼山堂蓋在中贈詩斗大三國屋青銓半夜明舉為良太史不改舊詩生均見歸再振振怡庭行狀

萬季野斯同號石園舉人子見於鄉黨文志者所著有經入禮史十五種子二種集二種鄉志有傳

好秋色照黃過堂寒什年謝望雲到張氏草堂與陳變戲馬竹村讀書偶商盛名竹村曰此黃先生所選可名黃過山斗航航萬八郎鄉志本傳云學者三百

卷書廿四襖布衣事業報高皇明史劉卷數余別有政大都三百卷為先生手定

李杲堂文胤字靜園以字行稱于生著有果堂詩文內外集西京師義學等凡十七種鄉志有傳為孟顥有著述致

推原道藝不分離舉州撰基誌錄云因東浙文章一代師又云於是東浙始得相與推原道藝之一碧血蒼憐空洒淚舉以葬日東坡將使句錄一片地盡續篋錫笛獨搜詩舉州又云舉州上著古詩有之風化為蒼憐碧血使人心惻

鄭禹梅梁初字子夏又號香眉字仲生又號晴庵後號樂村又號安所曾舉因亭病後改名風字聲雅號半人著述二十種見茲路藝文志茲志有傳

南雷脈望叢山劉從舉州歸闕瀟灑風儀企邵周自署其齋曰雲月光風周茂叔青天白日郭亮夫一息尚存完鉅作君著作等身舉以作書

南雷脈望叢山劉從舉州歸闕瀟灑風儀企邵周自署其齋曰雲月光風周茂叔青天白日郭亮夫一息尚存完鉅作君著作等身舉以作書

萬允誠斯備一字又庵舉七子著有

搜索鄉詩佐婦翁君為某堂督舉登科而上辦香李杜句精工之精妙心今有國萬氏詩學者吾輩不推允誠乎最

難風雨庇兄子晚年粗給數株均之於其兄子言深省堂前孝友隆

王文山之坪文山又作文三別號易庵字希堂又字近尼納舉子諸生鄉志附兄之坊傳

獨持名理紹南雷舉州云名理簡淡高風恬退來鄉再振振千秋先生傳世家萬有假山生而恬退能甘淡泊三

黨騰歡君子澤秋霜夏電仰丰裁君東條所人處及三食與再條誌蓋云介眉餘日王文三知夏電我霜

萬貞一言字什付來孫新年于若有餘

寒松孫登最能文史筆本來班馬孫處先生有寒松問集孫訓謂後起作者惟言與茲蜀亂偏成天下禍

忍教黑白啓疑贗君之得罪在作偽

黃直方正誼又名直又宗義次子

尙論九江與二胡憑將學案見工夫余得謝柳東家集抄本集訓元儒學第見直方案語甚多於二胡九江攻之胡

吳山越水隨游地集訓年譜公八十歲康臨二十九年三月之杭次子直方隨海鳥如何集會鵲又云

至五夫見大鳥諸田初以爲鸛察之則鶴也公謂所車無鶴其如魯之鸛鶴乎

陳小同自舜一字堯山又號同亮胡鶴子諸生著有

黃門經學有傳人集訓云窮經尙論七賢殿後塵金謝山七賢傳以君得殿云小同願不雲在樓同天一閣

百城坐擁並琳珉天一閣薛氏之亞

陳和仲寅衷未東弟郎志

蘭若楚楚憶當年康樂才名掩惠連其兄難得大師親講授陳介眉撰陳母訓太百六十壽序云黃先生來

如何晚境苦屯連手東門詩陳家大

張志呂錫璜號廣壽士項長子東臨甲午舉人

領袖英髦契湛園張西原書以英文章經濟紹高門送季野詩云童年誌學一生澹泊琴書寄外學琴文

爲有棟華友愛敦與弟翁道景友

陳子政之瑤子

果堂折節下通婚果堂為陳太君之夫人六十序云說曾有弟日和仲子孝謹恂恂化一門鄭為陳母六十

黃仲友愛無間而令畢竟名公賢子弟黃仲友愛無間而令老彭雙鏢詠寒村黃仲友愛無間而令

張德符錫璫字童羅一字祖山士風文

待人陳寔處家美全謝山故書舊傳云其觴政風流不類狂又云雅雅風流憑弔南雷深仰止最難

兩世列門牆在南雷山居黃梨洲詩仰

張有新錫琨一字通儒士著于詩

別業西郊出俗塵云有別業在西郊之外淵明摩詰鏡中人自風小影詩却是榮榮客北窗傲四青山

下楹書在君自號四青山人海再修文學張君基法云家有萊猗不算貧

李東門瞰字東伯文魁于著有松蘿閣集

證人社裏小門生果堂為黃門弟東門少時亦證人不羨輝華魂夢清自疑者軒詩云竟無榮榮華處

圖畫九人詩四友鄭為梅侯李寅伯九人圖詩又有四友集九人待友四相偕山水寄閒情四友之士至而止者

東門好作日

為瞿季剛題詩禮永懷圖用杜工部古柏行韻

昂首蒼松與翠柏其旁環繞竹兼石噴噴鶴聲唳九皋迷離柳蔭垂千尺乾坤六子分男女止止

吉羊虛室白本來富貴等浮雲喬木獨令人珍惜瞿侯徒自虞山東年甫弱冠入泮宮清癯道貌

深澤古擢塵高談塵垢空家國類隣風俗頽詩禮鯉庭獨可風吁嗟天靳崇公壽歐鄭繼之竟其

功如何四維兀一棟季子營營閱負重涕泣王褒夢我篇依戀秘歸女嬃送誓將繼述晏嬰極萬里桐華鳴雛鳳秋鎧課讀我懷悠古語事爲名教用先君子嘗錄秋鎧課讀圖以誌母教手附之意耳也其始之守無負先志者所獨也季剛日然此所課事爲名教用歟

題孫華成桐蔭高逸圖

終軍未遂長纓願陶令猶安五柳居昂首桐岡鳳不至未知把讀是何書

書蔣竹莊七十二首

十六年來慶盍簪又從誦經祝壬林安禪妙趣白居易養性奇書王仲任口嚼菜根彌有味手栽桃樹久成陰稀齡步履天行健省識春風講易心笑余十載謝朝簪未有涓埃答士林瓜蔓那堪經再摘文壇於此仗肩任啄餘香稻鵲留粒爨後焦桐鶴在陰樂育總爲吾輩事一杯共勵歲寒心

覺園有小池池邊白梅初葩偶賦二絕

欲問春消息橫斜水一灣有慚林處士此地亦孤山

天心含數點大地正嚴寒何待吹陽谷巡檐只久看

壬午夏王蓉卿以袁爽秋先生墨蹟見贐爰用遺詩本事題一律焉

瓊花依舊綴年年公有詩云瓊花依舊綴年年穹谷無人大可憐公有詩云瓊花依舊綴年年四海月營營俗子公有詩云瓊花依舊綴年年五

車業富只書甌公有詩云三車業富只書甌險遭蟻醴偏成識公有詩云險遭蟻醴偏成識歌到風衰欲問天公有詩云風不凋

畢竟遺形游物外公有詩云遺形游物外道微世喪姓名傳公有詩云世喪姓名傳

輓顏煥奎同學

計學研磨青出藍長途跋涉朔兼南心懷未濟身先死苗秀家風不忍談

輓徐積餘

擁書百萬擬王侯爾雅文章第一流白鶴朱霞標妙格桓碑彝器久旁搜丹鉛歲月聊齋異管枝
功夫中壘劉鹽筴江南何足道長懸鏡影照高樓

題史兆琳永儀閣圖

衰絹居士清高筆繪出永儀書閣圖隱隱遼山情欲接依依老樹影相扶闌軒明淨瑤窗几插架
珍奇鐵網珊瑚廿載苦心勤蒐訪從斯鄉獻得規摹君所藏多真先曾遺其

錢別光華大學十六屆畢業同學

十六年中此四春光華創始於今十六年艱難歲月見精神無多弟子重談舊中山路時舊月學多畢業矣獨嗅馨香祝命新
羽振雲霄初從軻胸羅經濟不憂貧老夫空抱蒼生願珍重諸君報國身

壬午除日

攬鏡鬢毛白增前艱難又復過壬午完成詩史慚初稿補綴鄉書到七編巾履空懷萬季野詳云相思一肩背中版有餘情桂菱聊學鄭秦川晦瀟風雨談經學畢竟長宵欲曙天

贈張孟劬七十癸未孟春

舊雨江南卅八年余與君先後曾大吳越始是君於乙巳年開建安文骨本如仙看花曾記經游地用君月下舊詞留夢猶驚故苑
天用君念奴等是志和非釣叟那如元亮有桑田夏方却老聊相語滿架殘書任倒顛

魚龍世界太屯遭消息梅花欲問天一部史微今古貫百篇樂府徵商連放翁攬鏡初心在少尹
能詩後進傳洛社尋常何足道最難爭獻見黃篇黃篇漢劉向奏川二人最相得後人為建二志則余何敢在後
而君若之更厚亦可處也

贈別壬午畢業同學

桃李居然發歲寒時在夏正二月十九日素餐我轉笑懸瓊光華停辭後由滿教師設立誠正格致二社今日之
會諸同學自備茶點我愧素餐不啻詠代體詩矣濟時平
準孔桑易有人謂我善理財我每不悅今日
畢業諸君當求理財之本故及之報國文章董賈難他日吾軍張嘆惜今朝無酒且盤桓仔肩
十七年來業儘使老夫任褐寬

癸未夏與光華戊辰年畢業同學攝影

硯匣留塵十五年最難風雨集羣賢回頭一笑芳華地拜手重賡紉綬天今日才名爭社會舊時
文字結因緣漢陰久已忘機事閒讀南華齊物篇

癸未冬與光華三三級畢業同學攝影

醞釀寒雲欲雪天頓開光霽意陶然盈門桃李如春麗回味桂甚悟性堅消息三三丹轉鼎才名
濟濟國儲賢桐花萬里鳴朝鳳猶戀舊巢十八年

癸未生日滬上攝影

雁塔題名四十年癸未年所寓今朝團敘印前緣今日到者三十三人正余英
癸未年所寓今朝團敘印前緣今日到者三十三人正余英間關萬里如鄰比親友輩在西
邇列諸峰有後先老去對談金粟理老夫婿相與
嘗談佛理興來且傲竹林賢逍遙豈藉
河東酒歲歲桐花綻壽筵

癸未除日二首

柴米油鹽屬老妻弟昆妯娌自和締家無恆產年年度庭有賢孫簇簇齊閒坐圍爐寒夜裏靜來

吟句小窗西余日親朋問我忙何事過去光陰書下迷

八齡小子舊京華涵涵當年積善家爆竹今宵依巷雜時作風聲風華明日舞衣斜余少時喜

京師舊人一周甲子如波電四代淵源賦陸瓜更憶十番成臘祭春暉寸草意無涯已丑年吾父

作風聲用有宋書事後日食酒母知在
有此已救天害地矣由今思之乃之懷也

甲申元旦

昨夜丹霞曉雨濛昨曉雨濛今期起雨蒼生澤望謝天公一陽初轉梅葩發萬國休爭劍氣雄我愧園籟人

冷竈客嘗肥肉野噉鴿不平世事真難寫且作嘖嘖六九翁

壽周止庵先生八十甲申暮春

計相經綸華國身齊眉夫婦案如新莊開綠野醉春候燭耀青廬周甲辰憂國心胸杜正獻石林

正獻諸事家居年已八濟人懷抱范純仁幾生修到駢蕃福莫謂癡頑獨守真

晏楹等有鯉庭思况共他鄉作客時道義欣爲伯子友詩文愧街女孫師女孫伯康姊妹俱君如野

鶴饒清骨我出焦桐戀舊知仕時公及財東余道太極通書家寶在本來天地至公施通書曰天地

甲申夏與光華校友敘舊

回首滄溟十九年蒼顏白髮兩茫然不隨戰伐銷鴟業各有風標奮鳳拳受饋晉文飧反璧持旆

蘇武雪吞旄欲談豐壽堂前事漫漫長宵到曉天

成蹊桃李最宜人雨雨風風總是春大道老來纔有悟交情亂後始知真但期宇宙皆仁域敢謂紅胡有隱鱗傳永年年稱六九我緇朋語且孩身

乙酉元旦

陰晴參半霧連天臘雪飄殘老澗邊不已晨雞鳴破晦無聲萬木靜如禪梅花初透兩三點椒頌已獻七十年但願民勞歌汔可非關兒女得團圓

欽懋長姪孫合卷

晨興整肅拜慈容歲在甲申月仲冬椿蔭百年萱九六曾孫登禮喜初逢風和日暖贛江濱本是當年共學人戒旦雞鳴今勵志一門五世兆祥麟

乙酉三月初三日五十年花燭重逢

花燭重逢五十年白頭夫婦意陶然平分春色川滇外嘹嘯維音美亞天事在甲申弗組糟糠同氣味書聲唄韻總神仙雙修庵外如人問余夫婦雙修之地曰雙修庵我道心田是福田

有悟

碩果剝來止一場新春大地發韶光三千世界皆看破七十年華惟守常浴詠乃知真禮樂中庸只在網衣裳天心畢竟仁臨物強者兢兢莫恃強

乙酉五月二十九日七十生日用六十生日原韻

河漢江淮半涉身文章典籍過吾春顛狂世界天生我艱險工夫事在人今後士林肩任重宜探根本見聞真老翁七十無他望坐看專家弈弈神

治吏薄民禍起韓漢家鹽鐵且談桓恢宏大業羣聯易

後漢書桓恢字叔元汝南人明憲及吾黨舍事以從事必有成

搜索殘編獨綴難

此大搜索抄本一一為之編次與編本四明叢書已至八集

長子歸來知國況百般策劃在坭寬批攜老幼游

沂水

金京吳六十五人

門下萬千盡珮冠

